





群書集事淵海卷之四十六

紀異門

感應

感善惡之報應者

成王啓金縢反風起禾 事文類聚

周公居東二年天大雷電以風禾盡偃大木斯拔成王啓金縢之書迎周公天乃反風禾盡起

上帝報享靈獸史記

漢武帝元朔末郊雍獲一角獸若麟然有司曰陛下肅祗郊祀上帝報享錫一角獸蓋麟云於是以薦五時時加一牛以燎錫

松坡圖書館藏

群書集事淵海



諸侯白金風符應合于天也

夏統歌感天變 晉書

夏統武帝時人也母病市藥船寓洛濱時三月上巳賈克於洛謂統曰昔堯亦歌舜亦歌子與人歌而喜必反而後和之明先聖前哲無不盡歌卿頗能作卿土地間曲乎統曰先公惟寓稽山朝會萬國授化鄙邦崩殂而葬恩澤雲布聖化猶存百姓感詠遂作慕歌又孝女曹娥年甫十四貞順之德過越梁宋其父墮江不得尸娥仰天哀號中流悲歎便投水而死父子喪尸後乃俱出國人哀其孝義為歌河女之章伍子胥諫吳王言不納用見戮投海國人痛其忠烈為作小海唱今欲歌之衆人僉曰善統於是足扣船引聲喉轉清激慷慨既大風應至含水漱天雲雨響集叱咤謹呼雷電晝冥集氣長厲沙塵烟起王公以下

皆恐止之乃已諸人顧相謂曰若不游洛水安見是人聽慕歌之聲便髣髴見大禹之容聞河女之音一不覺涕淚交流即謂伯姬高行在目前也聆小海之唱謂子胥出平立吾左右矣

苻帝神陰助有驗 南史

梁武帝天監六年旱甚詔祈苻帝神求雨十旬不降帝怒命載荻欲焚苻廟并神影爾日開朗欲起火當神上忽有雲如織倏忽驟雨如瀉臺中宮殿皆自振動帝懼馳詔追停少時還靜自此帝畏信遂深自踐祚以來未嘗躬自到廟於是備法駕苻朝臣脩謁是時魏軍攻圍鍾離苻帝神報勅必許扶助既而霖雨水長遂挫敵人亦神之力焉凱旋之後廟中人馬脚盡有泥濕當時竝目覩焉

高駢開道有震碎石唐書



高駢字千里唐懿宗時為檢校刑部尚書仍鎮安南兼諸道行營都討使始築安南城由安南至廣州江漕梗險多巨石駢募工剗治由是舟濟安行儲餉畢給又使者歲至乃鑿道五所置兵護送其注青石者或傳馬援所不能治既攻之有震碎其石乃得道因名道曰天威云

審知德化開港五代史

王審知梁太祖時加拜中書令封閩王雖起盜賊而為人儉約好禮下士王淡唐相博之子楊沂唐相涉從弟徐寅唐時知名進士皆依審知仕宦又建學四門以教閩士之秀者招來海中蠻夷商賈海上黃崎波濤為沮一夕風雨雷電震擊開以為港閩人以為審知德政所致號為甘棠港

廢帝焚香擇相五代史

後唐廢帝欲擇宰相問於左右皆言盧文紀及姚顛有人望廢帝因悉書清望官內琉璃瓶中夜焚香祝天以筋挾之首得文紀欣然相之

仁宗禱雨太乙宮事文類聚

宋仁宗慶曆間京師夏旱諫官王公素乞親行禱雨帝曰太史言月二日當雨一日欲出禱公曰臣非太史是日不雨帝問故公曰陛下幸其當雨以禱不誠不誠不可動天臣故知不雨帝曰明日禱雨醴泉觀公曰醴泉之近猶外朝也豈憚暑不遠出邪帝每意動則耳赤耳已盡赤厲聲曰當禱西太乙宮公乞傳旨帝曰車駕出郊不預告卿不知典故公曰國初以虞非常今久太平預告使百姓望清光者衆耳無虞也諫官故不扈從明日特召王公以從日色甚熾埃霧漲天帝玉色不怡至瓊林苑



回望而太乙宮上有雲氣如香煙以起少時雷雨至帝却道遙  
輦御平輦徹蓋還宮明日召對帝曰朕自卿得雨

匠氏毀司馬墓碑壓石事文類聚

司馬溫公宋哲宗紹聖初有旨令毀隨碑豫章先生自黔安至  
荆南作詩云司馬丞相驟登庸擢用元老超群公揚綰登朝天  
下喜斷碑零落卧秋風謂此也孫全人君孚云方毀拆之際大  
風走石群吏莫敢近獨有一匠氏插斤而擊未盡碎忽仆碑下  
死其碑元賜精忠粹德

雷擊女黨碑事文類聚

宋哲宗元祐所立女黨碑以司馬溫公為首一旦為雷所霹張  
山人有詩昨夜風雷起擊碎女黨碑若問張山人不知

祭文成其始息宋史

辛棄疾嘗同朱熹遊武夷山賦九曲擢歌熹書亮已復禮夙興  
夜寐題其二齋室熹歿偽學禁方嚴門生故舊至無送葬者棄  
疾為文往哭之曰所不朽者垂萬世名孰謂公死凜凜猶生棄  
疾雅善長短句悲壯激烈有稼軒集行世理宗紹定六年贈光  
祿大夫度宗咸淳間史館校勘謝枋得過棄疾墓旁僧舍有疾  
聲大呼于堂上若鳴其不平自昏暮至三鼓不絕聲枋得秉燭  
作文旦且祭之文成而聲始息

應驗言吉凶之有應驗者

東方朔奏對泰階事文類聚

東方朔對漢武帝曰願陳泰階六符應邵注曰泰階六符經曰  
泰階者天之三階也上階為天子中階為諸侯公卿大夫下階



為士庶人中階上星為諸侯三公下星為卿大夫之階之階  
則陰陽和風雨時天下大安

嚴昌諫蜂集不祥事大類聚

豫章嚴豐字孟侯為郡主簿太守賈萌舉兵欲誅王莽有飛蜂  
附萌車衡豐諫以為不祥之徵萌不從果見殺

田者當貧後漢

有夫婦夜田者天帝見而矜之問司命曰此可富乎司命曰命  
當貧有張車子財可以借而與之期曰車子生急還之田者稍  
富及期夫婦輦其賄以逃同宿其婦人夜生子問名於其父父  
曰生車間名車子其家自此之後遂大貧敝

徽之兄弟俱盡事文類聚

王徽之字子猷晉孝武帝時為黃門侍郎棄官東歸與弟徽之

俱病篤術人云人命應終有生人樂代者則死者可生徽之曰  
吾才位不如弟請以餘年代之術者曰代死者以已年有餘得  
以足亡者耳今君與弟俱盡何代也未幾獻之卒

秀之擲粟入柱南史

劉秀之字道寶宋孝武時累遷至益州刺史以起義功封康樂  
縣侯徙丹楊尹先是秀之從叔劉穆之為丹楊與子弟聽事上  
宴聽事柱有一穿穠之謂子弟及秀之汝等試以粟遙擲柱入  
穿者後必得此郡唯秀之獨入焉其言遂驗

晉夢婦識皆應南史

陳武帝始即位其夜奉朝請史普直宿省夢有人自天而下道  
從數十至太極殿前北面執玉策金字曰陳氏五帝三十二年  
及後主在東宮時有婦人突入唱曰畢國主有鳥一足集其殿



庭以甬畫地成文曰獨足上高臺盛草變為灰欲知我家處朱  
門當水開解者以為獨足蓋指後主獨行無眾盛草言荒穢隋  
承火運草得火而灰及至京師與其家屬館於都水臺所謂上  
高臺當水也其言皆驗或言後主名叔寶反諍為少福亦敗亡  
之徵云

賀拔岳見異人 北史

賀拔岳魏孝武時為尚書左僕射加關中大行臺岳營河曲軍  
吏獨行忽見一神謂曰賀拔岳雖據此眾終無所成當有一宇文  
家從東北來後必大盛言訖不見至是方驗

潘彌知吉凶 北史

魏孝武時潘彌奏言今日當甚有急兵其夜帝在逍遙園宴阿  
至羅顧侍臣曰此處彷彿華林園使人聊增懷愁命取所乘波

馬使南陽王躍之將拳鞞躡而死帝惡之日宴還宮至  
門馬驚不前鞭打入謂潘彌曰今日幸無他不彌曰過夜半見  
大吉須臾帝飲酒過醜而崩

山偉逢尼言果驗 北史

山偉字仲才仕魏孝靜除衛士將軍中書令監起居先是偉與  
儀曹郎袁昇屯田郎李延考外兵郎李真三公郎王延業方駕  
而行偉少居後路逢一尼望之歎曰此輩綠業同日而死謂偉  
曰君方近天子當作好官而昇等四人皆於河陰遇害果如其  
言

羅暉靈顯陷城北 北史

周羅暉仕陳宣帝封侯降隋文帝賜爵義寧郡公討漢王諒餘  
黨於晉絳中流矢卒送柩還京行數里無故輿馬自止策之不



動有飄風旋繞馬郭雅稽首呪曰公恨小寇未平邪尋即除殄  
無為戀恨時即風止馬行後其子仲隱夢羅睺曰我明日當戰  
其靈坐所有弓箭刀劍無故自動若人帶持之狀絳州城陷是  
其日也

僧孺拜官事文類聚

河南伊缺縣前每僚佐有入臺者即水中灘出石爍金沙清徹  
可愛牛僧孺為尉一日報灘出縣僚共觀之有老吏曰此必分  
司御史若是西臺常有一雙鷓鴣僧孺因舉杯祝曰既成有灘  
何惜鷓鴣言訖一雙鷓鴣飛下灘中不旬日僧孺拜察院

張率梟鳴改官事文類聚

唐張率有梟鳴于更庭樹其妻以為不祥連唾之張聞之曰急  
洒掃吾當改官言未畢賀者已在門

知往

人生而知前事如符合者

羊祜識環晉書

羊祜五歲時令乳母取所弄金環乳母曰汝先無此物祜即詣  
隣人李氏東垣桑樹中探得之主人驚曰此吾亡兒所失物也  
云何持去乳母具言之李氏悲惋時人異之謂李氏子則祜之  
前身也晉武帝時祜為都督荊州諸軍使征南大將軍

鮑靚記并晉書

鮑靚字太玄年五歲語父母云本是曲陽李家兒九歲墜井死  
其父母尋訪得李氏推問皆符驗晉元帝時靚為南海太守

文澹五歲謂母香囊事文類聚

後蜀文澹生五歲謂母曰有五色香囊在杏林中往取得之乃



澹前生五歲失足落井今再生也

向靖女復生索刀事文類聚

向靖有女數歲而亡始病時弄小刀子母奪取不與傷母手後又產一女年四歲曰前時刀子何在母曰無也女曰昔爭刀子故傷母手云何無也請覓數刃合置一處令女自識女見大喜即先者

### 高夢徵得夢而有應驗者

黃帝夢得二佐事文類聚

黃帝夢大風吹天下之塵垢皆去又夢人執千鈞之弩驅羊數萬群帝悟而歎曰風為號令執政者垢去土解清治者天下豈有姓風名后者哉夫千鈞之弩異力能遠者也驅羊數萬群是

善牧者也天下豈有姓力名牧者於是依二夢之占而求之得風后于海隅登以為相得力牧於大澤進以為將

黃帝夢遊華胥事文類聚

黃帝憂天下之不治竭聰明盡智方焦然飢色肝黷昏然五情爽惑於是放萬機退而閒居大庭之館齋心服形三月不親政事晝寢而夢遊於華胥氏之國其國無帥長自然而已其民無嗜欲自然而已不知樂生不知惡死故無夫殤不知親已不知踈物故無愛憎棄空如履實寢虛若處林雲霧不礙其視雷霆不亂其聽神行而已黃帝既悟恬然自得曰今知至道不可以情求矣又二十有九年天下大治幾若華胥氏之國而帝登遐

禹獲金簡事文類聚

禹傷父功不成乃巡衡山血馬以祭之仰天而嘯忽夢男子自



稱玄夷倉水使者謂禹曰欲得我山神書者齋焉禹乃退齋三日遂獲金簡玉字之書得治水之要刻石山之高处

高宗夢得良弼事文類聚

商高宗夢得說使百工營求諸野得諸傳岩王曰夢帝賚予良

弼

秦穆公夢觀鈞天廣樂事文類聚

秦穆公夢至帝所觀鈞天廣樂帝錫之以策秦遂大昌

子玉夢河神弗禱致敗左傳

魯僖公二十八年初楚子玉令尹自為瓊弁玉纓未之服也先

戰夢河神謂已曰界余余賜女孟諸之麋弗致也大心子玉與

子西使榮黃即榮諫弗聽榮季曰死而利國猶或為之况瓊玉

乎是糞土也而可以濟師將何愛焉弗聽出告二子曰非神敗

令尹令尹其不動民實自敗也果敗

貞伯古夢左傳

魯成公五年原屏放諸齊嬰曰我在故樂氏不作我亡吾二昆

其憂哉且人各有能有不能舍我何害弗聽嬰夢天使謂已祭

余余福女使問諸士貞伯貞伯曰不識也既而告其人曰神福

仁而禍淫淫而無罰福也祭其得亡乎祭之明日而亡

聲伯夢涉洹左傳

初聲伯夢涉洹或與已瓊瑰食之泣而為瓊瑰盈其懷從而歌

之曰濟洹之水贈我以瓊瑰歸乎歸乎瓊瑰盈吾懷乎懼不敢

占也還自鄭魯成公十七年冬壬申至于狸脹而占之曰余恐

死故不敢占也今衆繁而從余三年矣無傷也言之莫而卒

昭公夢襄公而適楚左傳



魯昭公七年楚子靈成章華之臺願與諸侯落之太宰遷啓疆曰臣能得魯侯遠啓疆來召公公將往夢襄公祖梓慎曰君不果行襄公之適楚也夢周公祖而行金襄公實祖君其不行子服惠伯曰行先君未嘗適楚故周公祖以道之襄公適楚矣而祖以道君不行何之三月公如楚鄭伯勞于師之梁孟僖子為介不能相儀及楚不能答郊勞

衛逐莊公左傳

魯哀公十七年衛侯夢于北宮見人登此吾之觀被髮北面而誦曰登此昆吾之虛縣縣生之瓜余為渾良夫叫天無辜公親筮之昏彌赦占之曰不害與之邑寘之而逃奔宋衛侯貞卜其繇曰如魚窺尾衡流而方羊裔焉大國滅之將亡闔門塞實乃自後踰冬十月晉復伐衛入其郭將入城簡子曰止叔向有言

曰怙亂滅國者無後衛人出莊公而與晉平晉立襄公之孫師而還十一月衛侯自鄆入般師出初公登城以望見戎州人之以告公曰我姬姓也何戎之有焉翦之公使匠父公欲逐石圃未及而難作辛巳石圃因匠父攻公公闔門而請弗許踰于北方而隊折股戎州人攻之太子疾公子青踰從公戎州人殺之公入于戎州己氏初公自城上見己氏之妻髮美使覘之以為呂姜鬣既入焉而示之璧曰活我吾與女璧己氏曰殺女璧其焉往遂殺之而取其璧衛人復公孫般師而立之十二月齊人伐衛衛人請平立公子起執般師以師舍諸潞

燕姑夢蘭史記

鄭文公有賤妾曰燕姑夢天使與己蘭曰余為伯僚余而祖是以是為而子以蘭有國香人厭媚之如是既而文公見之與之



蘭而御之辭曰妾不才幸而有子將不信敢徵蘭乎公曰諾  
穆公名之曰蘭事見宣公三年

曹國人夢公子立社史記

曹靖公時國人有夢衆君子立于社宮謀欲亡曹曹叔振鐸止  
之請待公孫彊許之旦求之曹無此人去夢者戒其子曰我亡曹  
聞公孫彊為政必去曹無罹曹禍及靖公卒子伯陽即位好田  
弋之事六年曹野人公孫彊亦好田弋使白鴈而獻之且言田  
弋之說因訪政事伯陽大說之有寵使子為司城以聽政夢者之  
子乃亡去公孫彊言霸說於曹伯十四年曹伯從之乃背晉干  
宋宋景公伐之晉人不救十五年宋滅莊巨執曹伯陽及公孫彊  
以歸而殺之曹遂絕其祀

衛襄公妾夢康叔史記

衛襄公有賤妾幸之有身夢有人謂曰我康叔也令若子必有  
衛名而子曰元妾怪之問孔成子成子曰康叔者衛祖也及生  
子男也以告襄公襄公曰天所置也名之曰元襄公夫人無子  
於是乃立元為嗣是為靈公

孔成子夢協立靈公事文類聚

衛襄公夫人姜氏無子嬖人媯始生孟縶孔成子夢康叔謂已  
立元余使羈之孫圉與史苟相之史朝亦夢康叔謂已余將命  
而子苟與孔烝鉏之曾孫圉相元史朝見孔成子告之夢夢協  
故立靈公

衛平為宋元王占夢史記

宋元王二年江使神龜使於河至於泉陽漁者豫且舉網得而  
囚之置之籠中夜半龜來見夢於宋元王曰我為江使於河而



幕網當吾路泉陽豫且得我我不能去身在患中莫可告語王  
有德義故來告訴元王惕然而悟乃召博士衛平而問之曰今  
寡人夢一丈夫延頸而長頭衣玄繡之衣而乘輜車來見夢於  
寡人曰我為江使於河而幕網當吾路泉陽豫且得我我不能  
去身在患中莫可告語王有德義故來告訴是何物也衛平乃  
授式而起仰天而視月之光觀斗所指定日處鄉規矩為輔副  
以權衡四維已定八卦相望視其吉凶八蠱先見乃對元王曰  
今昔壬子宿在牽牛河水大會鬼神相謀漢正南北江河固期  
南風新至江使先來白雲壅漢萬物盡留斗柄指日使者當囚  
玄服而乘輜車其名為龜王急使人問而求之王曰善於是王  
乃使人馳而往問之陽令曰漁者幾何家名誰為豫且豫且得  
龜見夢於王王故使我求之泉陽令乃使吏案籍視圖水上漁  
者五十五家上流之廬名為豫且泉陽令曰諾乃與使者馳而  
問豫且曰今昔汝漁何得豫且曰夜半時舉網得龜使者曰今  
龜安在曰在籠中使者曰王知子得龜故使我求之豫且曰諾  
即系龜而出之籠中獻使者

殺龜見夢史記

江上有人得名龜畜置之家因大富與人議欲遣去人教殺之  
勿遣遣之破人家龜見夢曰送我水中無殺吾也其家終殺之  
殺之後身死家不利人民與君王者異道人民得名龜其狀類  
不宜殺也以往古故事言之古明王聖主皆殺而用之宋元王  
時得龜亦殺而用之謹連其事於左方令好事者觀擇其中焉

孔子燕坐兩楹而卒孔子家語

孔子蚤作負手曳杖逍遙於門而歌曰泰山其頽乎梁木其壞



乎詰人其萎乎既歌而入子貢聞之曰泰山其頽則吾將安仰  
梁木其壞吾將安杖詰人其萎吾將安放夫人殆將病也遂趨  
而入夫子歎曰賜汝來何遲予疇昔夢坐奠於兩楹之間夏后  
氏殯於東階之上則猶賓之而丘也即殷人夫明王不興則天  
之殯於西階之上則猶賓之而丘也即殷人夫明王不興則天  
下孰能宗余余遂將死遂寢病七日而終

景公因夢致國人稱善說苑

齊景公畋於梧丘立猶登公姑坐睡而夢有五丈夫北面倅廬  
稱無罪焉公覺召昆子而告其所夢公曰我其嘗殺不辜而誅  
無罪耶晏子對曰昔者先君靈公畋五丈夫罟而駭獸故殺之  
斷其首而葬之曰五丈夫之丘其此耶公令人掘而求之則五  
頭同穴而存焉公曰嘻令吏葬之國人不知其夢也曰君憫白  
骨而况於生者乎不遺餘力矣不釋餘智矣故曰人君之為善  
易矣

二世夢虎史記

秦二世夢白虎齧其左驂馬殺之心不樂怪問占夢卜曰涇水  
為祟二世乃濟於望夷宮欲祠涇

王美人夢日生武帝史記

漢景帝為太子時王美人夢日生其懷以告太子太子曰此貴  
徵也未生而孝文帝崩孝景帝即位王夫人生男是為孝武帝  
王莽夢高廟神靈譴責前漢

王莽地皇二年莽夢長樂宮銅人五枚起立莽惡之念銅人銘  
有皇帝初兼天下之文即使尚方工鐫滅所夢銅人膺文又感  
夢漢高廟神靈譴責遣虎賁武士入高廟拔劔四面提擊斧壞



戶牖挑湯赭鞭鞭灑屋壁令輕車校尉居其中又令中軍北壘  
居高寢

蔡茂夢未得秩事文類聚

蔡茂字子禮為司徒在職清儉匪懈光武建武中茂初在廣漢  
夢坐大殿極上有三穗禾挑取之得其中穗輒復失之以問主  
簿郭賀賀離席慶曰夫殿者官府之形象也極而有禾入臣之  
上祿也取中穗中台之位於字禾失為秩雖曰失之乃所以得  
祿秩也衮職有關公其補之旬月而茂徵焉

漢靈帝夢父怒已後漢

漢靈帝後夢見桓帝怒曰宋皇后有何罪過而聽用邪孽使絕  
其命勃海王惺既已自貶又受誅斃今宋氏及惺自訴於天上  
帝震怒罪在難救夢殊明察帝既覺而恐以事問於羽林左監

許永曰此何祥其可禳乎永對曰宋皇后親與陛下共承宗廟  
母臨萬國歷年已久海内蒙化過惡無聞而虛聽讒妬之說以  
致無辜之罪身嬰極誅禍及家族天下臣妾咸為怨痛勃海王  
惺桓帝母弟也處國奉藩未嘗有過陛下曾不證審遂伏其辜  
昔晉侯失刑亦夢天厲被髮屬地天道明察鬼神難誣宜並改  
葬以安寃魂返宋后之徙家復勃海之先封以消厥咎帝弗能  
用尋亦崩焉

濟婦夢亡兒求托魏書

蔣濟字子通仕魏齊王芳為領軍將軍進封昌亭侯其婦夢見  
亡兒涕泣曰死生異路我生時為卿相子孫今在地下為泰山  
伍伯憔悴困辱不可復言今太廟西謳士孫阿今見召為泰山  
令願母為白侯囑阿令轉我得樂處言訖母忽然驚寤明日以



白濟濟曰夢為爾耳不足怪也明日暮復夢曰我來迎新君止  
在廟下未發之煩暫得來歸新君明日日中當發臨發多事不  
復得歸永辭於此候氣彊難感悟故自訴於母願重啓侯何惜  
不一試驗之遂道阿之形狀言甚備悉天明母重啓侯雖云夢  
不足怪此何大適適亦何惜不一之驗之濟乃遣人詣太廟下  
推問孫阿果得之形狀證驗悉如兒言濟涕泣曰幾負吾兒於  
是乃見孫阿具語其事阿不懼當死而喜得為泰山令惟恐濟  
言不信也曰若如節下言阿之願也不知賢子欲得何職濟曰  
隨地下樂者與之阿曰輒當奉教乃厚賞之言訖遣還濟欲速  
知其驗從領軍門至廟下十步安一人以傳消息辰時傳阿心  
痛已時傳阿劇日中傳阿亡濟泣曰雖哀吾兒之不幸自喜亡  
者有知後月餘兒復來語母曰已得轉為縣事矣

蔣琬夢牛頭得郎蜀書

蔣琬字公琰夜夢有一牛頭在門前流血滂沱音甚惡之呼問  
占夢趙直直曰夫見血者事分明也牛角及鼻公字之象君位  
必當至公夫吉之徵也頃之為什邡令先主為漢中王琬入為  
尚書郎

魏延夢頭生角事文類聚

諸葛亮蜀後主時出北谷口魏延為前鋒延夢頭生角以問占  
夢趙直直訴曰麒麟有角而不用此不戰而自破之象退而告  
人曰角之為字力下用也頭上用乃其凶甚矣果不為楊儀所殺

堅母夢腸繞昌門吳書

孫堅字文臺孫武之後也堅世仕吳家于富春巷并於城東冢上  
數有光怪雲氣五色上屬於天曼延數里衆皆往觀視父老相



謂曰是非凡氣孫氏其興矣及母懷妊堅夢腸出繞吳昌門寤而懼之以告隣母隣母曰安知非吉徵也堅生容貌不凡性闊達好奇節子權既稱尊號謚堅曰武烈皇帝

人曰魚之呼延氏夢兆晉書

劉豹妻呼延氏魏齊王嘉平中祈子於龍門俄而有一大魚頂有二角軒鬚躍鱗而至祭所久之乃去巫覡皆異之曰此嘉祥也其夜夢旦所見魚變為人左手把一物大如半雞子光景非常授呼延氏曰此是日精服之生貴子寤而告豹豹曰吉徵也吾昔從邯鄲張周母司徒氏相云吾當有貴子孫三世必大昌仿像相符矣自是十月而生元海左手文有共名遂以名焉

司馬懿夢王賈晉書

晉宣帝司馬懿內忌外寬晚年大行殺戮夷人示族以立威權

及病篤夢賈逵王凌為祟甚惡之嘉平三年秋八月崩于京師

趙染夢引弓中弩晉書

趙染晉愍帝時寇漢劉聰北地夢漢將魯徽大怒引弓射之染驚悸而寤旦將攻城中弩而死

王敦夢犬啣晉書

王敦尚武帝襄城公主晉元帝時累加征南大將軍始病夢白犬自天而下啣之又見刁協乘輅車導從瞋目令人左右執之俄而敦死時年五十九

戴洋應夢晉書

戴洋為都水令史將赴洛夢神人謂之曰洛中當敗人盡南渡後五年揚州必有天子洋信之遂不去既而皆如其夢果立元帝於建鄴



王道守夢悅得錢晉書

王悅字長豫導長子也東晉元帝時為中書侍郎事親色養導甚愛之導一日夢人以百萬錢買悅潛為祈禱若石備矣尋掘地得錢百萬意甚惡之及悅疾篤導憂念特至不食積日忽見一人形狀甚偉被甲持刀導問君是何人曰僕是蔣侯公兒不佳欲為請命故來耳公勿復憂因求食遂噉數升食畢勃然謂曰中書患非可救者言訖不見悅遂卒

陶侃夢八翼晉書

陶侃字士行少時嘗夢生八翼飛而上天見天門九重已登其八唯一門不得入闔者以杖擊之因墜地折其左翼及寤左腋猶痛及成帝時都督八州據上流握強兵每思折翼之祥凡事自抑而止

姚襄夢長服袈衣晉書

晉穆帝時姚襄之寇洛陽也夢子長服袈衣升御坐諸酋長皆侍立且謂將佐曰吾夢如此此兒志度不恒或能大起吾族

羅含夢鳥晉書

羅含字君章曾祖彥臨海太守父綏滎陽太守含幼孤為叔母朱氏所養少有志尚嘗晝卧夢一鳥文彩異常飛入口中因驚起說之朱氏曰鳥有文彩汝後必有文章自此後藻思日新弱冠州三辟不就晉廢帝海西公時累遷至侍中

李雄母夢雙虹晉書

蜀主李雄字仲雋李特第三子也母羅氏夢雙虹自門升天一虹中斷既而生蕩後羅氏因汲水忽然如寐又夢大蛇繞其身遂有孕十四月而生雄常言吾二子右有先亡在者必大貴蕩



竟前死雄身長八尺三寸美容貌少以烈氣聞每周旋鄉里識  
達之士皆器重之有劉化者道術士也每謂人曰關隴之士皆  
當南移李氏子中惟仲雋有奇表終為人主雄後果據蜀稱王

符健母夢大羆 晉書

前秦主苻健母羗氏夢大羆而生及長而勇果自稱晉征西大  
將軍都督關中諸軍事既入關夢天神遣使者朱衣赤冠命拜  
堅為龍驤將軍健翌日為壇於曲沃以授之健泣謂堅曰汝祖  
昔受此號今汝復為神明所命可不勉之

姚萇夢符堅得疾 晉書

後秦主姚萇如長安至于新支堡疾篤與疾而進夢符堅將天  
官使者鬼兵數百突入營中萇懼走入宮官人迎萇刺鬼誤中  
長陰鬼相謂曰正中死處拔牙出血不餘寤而驚悸遂患陰重

刺之出血如夢萇遂狂言或稱臣甚或殺陛下者兄襄非臣之  
罪願不枉臣

慕容德母異夢 晉書

南燕主慕容德字玄明號之少子也母公孫氏夢日入臍中晝  
寢而生德年未弱冠身長八尺二寸姿貌雄偉額有日角偃月  
重文博觀群書性清慎多才藝

傅曜夢托呂光 晉書

傅曜為張掖督郵考覈屬縣而立池令尹興殺之投諸空井曜  
見夢於後涼主呂光曰臣張掖郡小吏案校諸縣而立池令尹  
興賊狀狼籍懼臣言之殺臣投於南亭空井中臣衣服形狀如  
是光寤而猶見久之乃滅遣使覆之如夢光怒殺興

劉暉之夢泛海南史



劉穆之字道和世居京口初為琅邪府主簿嘗夢與宋武帝泛海遇大風驚俯視船下見一白龍挾船既而至一山山峯聳秀意甚悅及武帝尅京城從何無忌求府主簿無忌進穆之帝曰吾亦識之即馳召焉

彥回夢人與卜著具

南史

褚彥回累加尚書令侍中給班封南康郡公少時嘗篤病夢人以下箸一具與之遂差其一至是年四十八矣歲初便寢疾而太白熒惑相係犯上將彥回慮不起衣遜位宋武帝不許乃改授司空驃騎將軍侍中錄尚書事如故薨年四十八

安都夢天門

南史

薛安都宋孝武踐祚除右軍將軍初征關陝至曰口夢仰視天見天門開謂左右曰汝等見天門開不至是歎曰夢天門開乃

### 中興之象邪

玄謨夢經獲免

南史

宋孝武出鎮及大舉北侵以王玄謨為寧朔將軍前鋒進向滑臺魏太武自來救而玄謨力衆器精而專仗所見多行殺戮將士離怨倍失人心及太武至麾下散亡略盡輔國將軍蕭斌將斬之玄謨始將見殺夢人告曰誦觀世音千遍則免玄謨夢中曰何可竟也仍見授既覺誦之且得千遍明日將刑誦之不輟忽傳唱停刑果獲免

陶母夢天人捧爐

南史

陶弘景字通明母郝氏夢兩天人手執香爐來至其所已而其娠宋孝武帝孝建三年夏至日生

袁粲夢日

南史



袁粲字景倩宋孝武時為海陵太守廢帝子業即位粲在郡夢日墮其背上因驚尋被徵管機密歷吏部尚書侍中驍衛將軍

慶之夢人賜給南史

沈慶之以郡公統諸軍事時宋前廢帝狂悖日甚慶之猶盡言諫爭帝忌之乃遣其從子攸之齎藥賜死時年八十先是歲旦慶之夢有人以兩疋絹與之謂曰此絹足度寤而謂人曰老子今年不免矣兩疋八十尺也足度無盈餘矣

何點夢授丸病差南史

何點字子皙宋明帝時徵辟不就少時嘗患渴利積歲不愈後在吳中石佛寺建講於講所書寢夢一道人形貌非常授丸一掬夢中服之自此而差時人以為淳德所感

齊宣孝后夢麻粥南史

齊宣孝陳皇后諱道止魏司徒矯之後也后家貧少勤織作家人矜其勞或止之后終不改嫁于宣帝宣帝庶生子衡陽元王道度始安貞王道生后生高帝高帝年二歲乳人乏乳后夢人以兩甌麻粥與之覺而乳驚因此豐足

伯玉三夢南史

初齊高帝蕭道成在淮陰荀伯玉假還廣陵夢上廣陵城南樓上有二青衣小兒語伯玉云草中肅九五相追逐伯玉視城下人頭皆有草泰始七年又夢高帝乘船在廣陵北渚兩腋下翅不舒伯玉問何當舒帝曰却後三年伯玉夢中自謂是呪師凡六唾呪之有六龍出兩腋下翅皆舒還復歛宋元徽二年而道成破桂陽威名大震五年而廢為蒼梧王謂伯玉曰卿夢今旦効矣



齊高帝夢龍南史

齊高帝蕭道成年十七時嘗嘉乘青龍上天西行逐日帝舊塋在武進彭山岡阜相屬數百里不絕其上常有五色雲又有龍出焉上時已貴矣宋明帝甚惡之遣善占墓者高靈文往墓所占相靈文先給事太祖還詭荅曰不過出方伯耳密白太祖曰貴不可言明帝意猶不已遣人踐藉以左道厭之上後於所樹華表柱忽龍鳴震響山谷

孫奉伯夢捉龍脚南史

齊高帝在宋明帝泰始中鎮淮陰明帝寢疾為身後之慮多翦功臣每云蕭道成有不臣相道成每懷憂懼忽見神人謂曰無所憂子孫當昌盛明帝遣前淮南太守孫奉伯往淮陰監元會奉伯舊與帝款是行也帝與奉伯同室時奉伯夢上乘龍上天

於下捉龍脚不得及覺叙夢因謂曰交州有天庇生靈而弟不得與也奉伯竟卒於末世又參軍崔靈建蓋天謂已蕭道成是我第十九子我去年已使授其天子位考自三皇五帝以降受命之次至帝為十九也

孝昭二后夢龍據屋南史

齊世祖武皇帝諱贖字宣遠高帝長子也以宋元嘉二十七年六月己未生於建康縣之青溪宮將產之夕孝皇后昭皇后並夢龍據屋故小字上為龍兒年十三夢人以筆畫身左右為兩翅又著孔雀羽衣裳空中飛舉體生毛髮至足

弘景夢鏗南史

齊高帝十六子鏗出閣時始七歲陶弘景為侍讀八九年中甚相接遇後弘景隱山忽夢鏗來慘然言別二某日命過無罪後



三年當生某家弘景訪以幽中事多秘不出覺後即遣信出都  
參訪果與事符同弘景因著夢記云

張敬兒逆謀南史

齊張敬兒微時有妻毛氏生子道門而鄉田尚氏女有色敬兒  
悅之遂棄毛氏而納尚氏為室初征荊州無見諸將帥不遑有  
餘計唯叙夢云未貴時夢居村中社樹欵有數十丈及在雍州  
又夢社樹直上至天以此誘說部曲自云無不可言其妻尚氏  
亦曰吾昔夢一手熱如火而君得南陽郡元徽中夢一髀熱如  
火君得本州齊高帝建元中夢半體熱尋得開府今復舉體熱  
矣以告所親歷言其妻之夢又言今舉體熱矣闔人聞其言說  
之事達齊武帝敬兒又遣使與蠻中交關武帝疑有異志永明  
元年勅朝臣華林入關齋於坐收敬兒

裴氏夢鈴入懷南史

任遙為中散大夫齊武帝時遙妻河東裴氏高明有德行嘗書  
卧夢有五色采旗蓋四角懸鈴自天而墜其一鈴落入懷中心  
悸因而有娠占者曰必生才子及生昉身長七尺五寸幼而聰  
敏早稱神悟四歲誦詩數十篇八歲能屬文自製月儀辭義甚  
美褚彥回嘗謂遙曰聞卿有令子相為喜之所謂百不為多一  
不為少由是聞聲藉甚年十二從叔晷有知人之量見而稱其  
小名曰阿堆吾家千里駒也

齊武帝夢金翅鳥南史

南郡王子夏字雲廣齊武帝第二十三子也上春秋尚子夏最  
幼寵愛過諸子初武帝夢金翅鳥下殿庭搏食小龍無數乃飛  
上天及明帝初其夢方驗永泰元年子夏誅年七歲



孝嗣夢移床南史

徐孝嗣愛好文學器量弘雅不以權勢自居故見容齊明帝之世初在率府書卧齋北壁下夢兩童子遽云移公床孝嗣驚起聞壁有聲行數步而壁崩壓床

何胤遇疾妻夢當代南史

何胤字子季齊東昏侯永元中徵召不就及梁武踐祚詔為特進元祿遣領軍司馬王杲之賫手詔諭意給白衣尚書祿胤固辭時胤遇疾妻江氏夢神告曰汝夫壽盡既有至德應獲延期爾當代之妻覺說焉俄得患而卒胤疾乃瘳至是胤夢見一神女年八十許人並衣恰行列在兩側行牀下覺又見之便命營內具既而疾固不復瘳

梁武夢曹武負過水南史

齊曹武雖武士頗有知人鑒梁武帝及崔慧景之在襄陽時崔方貴盛武性儉嗇無所餉遺後饋梁武謂曰卿必大貴我當不及見今以弱子相託每密送錢物并好馬時帝在戎多乏就武換借未嘗不得遂至十七萬及帝即位忘其惠天監二年帝忽夢如田塍下行兩邊水深無底夢中甚懼忽見武來負武帝得過曰卿今為天下主乃爾忘我顧託之言邪我兒飢寒無衣昔所換十七萬可還其市宅帝即使主書送錢還之使用市宅子世澄世宗並蒙抽擢三二年間迭為大郡

柳慶遠父夢褥席南史

柳慶遠字文和梁武帝時為雍州刺史加都督初慶遠從父兄世隆嘗謂慶遠曰吾昔夢太尉以褥席見賜吾遂亞台司適又夢以吾褥席與汝汝必光我門茲至是慶遠亦繼世隆焉



沈約夢斷舌南史

沈約初為安西外兵參軍兼記室累加特進遷中軍將軍丹陽尹侍中初梁武帝有憾於張稷及卒因與約言之約曰左僕射出作邊州刺史已往之事何足復論帝以為約昏家相為怒約曰卿言如此是忠臣邪乃輦歸內殿約懼不覺帝起猶坐如初及還未至牀憑空頓於戶下因忘夢齊和帝劔斷其舌召巫視之巫言如夢乃呼道士奏赤章於天稱禪代之事不由已出先此約嘗侍宴會豫州獻粟徑寸半帝奇之問粟事多少與約各疏所憶少帝三事約出謂人曰此公護前不讓即羞死帝以其言不遜欲抵其罪徐勉固諫乃止及疾止遣主書黃穆之專知省視穆之夕還增損不即啟聞懼罪竊以赤章事因上省醫徐爽以聞又積前失帝大怒中使譴責者數焉約懼遂卒

梁武帝夢拜陵南史

梁武帝嘗夢具朝服入太廟拜伏悲感旦於延務殿說所夢何敬容對曰臣聞孝弟之至通於神明陛下性與天道故應感斯夢上極然之便有拜陵之議

之遴夢折臂南史

劉之遴累遷中書侍郎後除南郡太守梁武帝謂曰卿母年德並高故令卿衣錦還鄉盡榮養之理轉西中郎湘東王繹長史太守如故初之遴在荆府常寄居南郡忽夢前太守袁彖謂曰卿後當為折臂太守即居此中之遴後牛奔墮車折臂右手偏直不復得屈伸書則以手就筆歎曰豈黥而王乎周捨嘗戲之曰雖復並坐可橫政恐陋巷無枕後連相兩王再為此郡

江淹夢筆南史



江淹字文通梁武帝天監中累至散騎常侍少以文章顯晚節才思微退云為宣城太守時罷歸始泊禪靈寺渚夜夢一人自稱張景陽謂曰前以一匹錦相寄今可見還淹探懷中得數尺與之此人大恚曰那得割截都盡顧見丘遲謂曰餘此數尺既無所用以遺君自爾淹文音躓矣又嘗宿於冶亭夢一丈夫自稱郭璞謂淹曰吾有筆在卿處多年可以見還淹乃探懷中得五色筆一以授之爾後為詩絕無美句時人謂之才盡

到溉夢帝脫帽與已 南史

湘東王繹為會稽太守以到溉為輕車長史行府郡事梁武帝勅繹曰到溉非直為汝行事足為汝師溉嘗夢武帝遍見諸子至湘東而脫帽與之於是密敬事焉

少瑜夢陸倕授筆 南史

紀少瑜字幼瑒本姓吳養于紀氏因而命族早孤幼有志節常慕王安期之為人年十三能屬文初為京華樂王僧孺見而賞之曰此子才藻新拔方有高名少瑜嘗夢陸倕以一束青鏤管筆授之云我以此筆猶可用卿自擇其善者其文因此邁進至梁武帝時為東宮學士

子春夢報一州 南史

陰子春字幼文歷位胸山成主東莞太守時青州石鹿山臨海先有神廟刺史王神念以百姓祈禱糜費毀神影壞屋舍當坐棟上有一大蛇長丈餘役夫打撲不禽得入海水爾夜子春夢見人通名詣子春云有人見苦破壞宅舍既無所託欽君厚德欲憩此境子春心密記之經二日而知之甚驚以為前所夢神因辦牲醑請名安置一處數日復夢一朱衣人相聞辭謝云得



君厚惠當以一州相報子春心喜供事彌勤經月餘魏欲罷胸  
山間諜前知子春設伏摧破之梁武帝詔授南青州刺史鎮胸  
山

梁武帝夢中原納侯景降南史

梁武帝夢中原盡平舉朝稱慶甚悅以語朱异曰吾生平少夢  
夢必有實异曰此宇內方一之徵及侯景降敕召群臣廷議尚  
書僕射謝舉等以為不可許武帝欲納之未決嘗夙興至武德  
閣口獨言我國家猶若金甌無一傷缺承平若此今便受地詎  
是事宜晚至紆紆悔無所及异探帝微旨答曰聖明御寓上應  
蒼玄此土遺黎誰不慕仰為無機會未遑其心今侯景分魏國  
大半遠歸聖朝若不容受恐絕後來之望帝深納异言又感前  
夢遂納之

侯景夢焚書南史

侯景字萬景梁武帝時遣百道攻城縱火燒大司馬東西華諸  
門城中倉卒未有備乃鑿門樓下水沃火久之方滅賊又斫東  
掖門將入羊侃鑿門扇刺殺人賊乃退又登東宮牆射城內至  
夜簡文募人出燒東宮臺殿遂盡所聚圖書數百厨一皆灰燼  
先是簡文夢有人畫作秦始皇云此人後焚書至是而驗

侯景夢犬羊在御坐南史

侯景字萬景今朱耽嘗直禁省無何夢犬羊各一在御坐覺而  
告人曰犬羊非佳物也今據御座將有變乎既而梁天子蒙塵  
景登正殿焉

昭明夢班劍授綱南史

梁太宗簡文皇帝諱綱字世讚小字大通武帝第三子昭明太



子母弟也天監二年十月丁未生于顯陽殿五年封晉安王普通四年累遷都督雍州刺史中大通三年被徵入朝未至而昭明太子謂左右曰我夢與晉安王對夾擾道我以班劍授之王還當有此加乎四月昭明太子薨五月丙申立晉安王為皇太子

鮑泉惡夢南史

鮑泉字潤岳梁元帝時以世子方諸為郢州刺史泉為長史行府州事侯景遣宋子仙任約罷之城陷執送景所景於巴陵敗還殺泉沉屍黃鶴磯先是泉夢著朱衣行水上及死舉身帶血而沉于江如其夢

陳高祖夢日南史

陳高祖嘗游義興館於許氏夢天闕數丈有四人朱衣捧日而

至納之帝口及覺腹內猶熱帝心獨喜

陳世祖夢日南史

陳世祖文皇帝諱蒨字子華始興昭烈王之長子也少沈敏有識量美容儀留意經史武帝甚愛之常稱吾家英秀梁太清初帝夢兩日闕一大一小大者光滅墜地色正黃其大如斗帝三分取一懷之

陳文帝夢得寶刀南史

陳文帝始興昭烈王之長子也武帝受禪立為臨川王夢梁武帝以寶刀授已周文育侯安都之敗於沌口武帝詔文帝入總軍政尋命率兵城南皖永定三年六月丙午武帝崩皇后稱遺詔徵文帝入纂皇統甲寅至自南皖入居中書省皇后令文帝嗣膺寶籙文帝辭讓至于再三公卿固請其日即皇帝位



文帝夢昭達升台鉉事文類聚

陳章昭達字伯通陳文帝時授鎮前將軍開府儀同三司初文帝夢昭達升台鉉及旦告之至是侍宴酒酣顧昭達曰卿憶夢否卿何以償對曰臣當效犬馬之勞以盡臣節自餘無以奉償

徐母夢雲化鳳集肩南史

徐陵字孝穆母臧氏嘗夢五色雲化為鳳集左肩上已而誕陵年數歲家人攜以候沙門釋寶誌寶誌摩其頂曰天上石麒麟也光宅寺慧雲法師每嗟陵早就謂之顏回八歲屬文十三通莊老義及長博涉史籍從橫有口辯陳宣帝大建中陵位至尚書左僕射封建昌縣侯

常英夢日北史

常英字世華後魏孝文帝時以外戚為平州刺史濁貨徒救皇

承明元年徵英復官先是英夢日墜其所居黃山下水中村人以車牛挽致不能出英獨抱載而歸聞者異之至是果驗

魏孝文高后夢日北史

後魏孝文帝文昭皇后高氏司徒公肇之妹也父颺母蓋氏凡四男三女皆生於東廩孝文初乃舉室西歸近龍城鎮鎮表后德色婉豔及至文明太后親幸北部曹見后奇之入掖庭時年十三初后幼曾夢在堂內立而日光自窗中照之灼灼而熱后東西避之光猶斜照不已如是數夕怪之以白其父颺颺以問遼東人閔宗宗曰此奇徵也昔有夢月入懷猶生天子况日照之徵此女將被帝命誕育人君之象也後生宣武及廣平王懷樂安公主馮昭儀寵盛密有母養帝心后自代如洛陽暴薨於汲郡之共縣或云昭儀所賊也



酈範夢兆北史

酈範字世則東魏孝文帝時除青州刺史假范陽公範前解州還京也夜夢陰毛拂踝他日說之時齊人有占夢者史武進云公豪盛於齊下矣使君臨撫東秦道光海岱必當重牧全齊再祿營丘矣範笑答曰吾將為卿必驗此夢果如其言

安祖夢雉謝德北史

裴安祖曾天熱舍於樹下有鷲鳥逐雉雉急投之遂觸樹而死安祖愍之乃取置陰地徐徐護視良久得蘇喜而放之後夜忽夢一丈夫衣冠甚偉著繡衣曲領向安祖再拜安祖怪問之云感君前日見放故來謝德聞者異焉後魏孝文帝至河東存問故老安祖朝帝與語甚悅

夏侯爽夢被杖而亡北史

夏侯爽字元炫後魏宣武帝時歷鎮遠將軍南兗州大中正未亡前忽夢見征虜將軍房世寶至其家聽事與其父坐屏人密言爽心驚懼謂人曰世寶為官少間必擊我也尋有人至云官呼郎隨召即去遣左右杖之二百不勝楚痛大叫良久乃悟流汗徹於寢具至明前京城太守趙卓詣之見其衣濕謂爽曰卿昨夜當大飲溺衣如此爽乃具陳所夢先是旬餘秘書監鄭道昭暴病卒爽聞謂卓曰人生何常唯當縱飲於是昏酣遂甚夢後二日不能言針之乃得語而猶虛劣俄而心悶而死洗浴者視其尸體大有杖處青赤隱起二百下許

宋穎夢妻辭北史

宋穎字文賢東魏孝明帝時為涼州刺史穎前妻劉氏亡後十五年穎夢見之拜曰新婦今被處分為高崇妻故來辭君泣然



涕流頽且見崇言之崇後數日而卒

休之夢銅柱轉三匝北史

陽休之魏孝明帝時在洛將仕夜夢見黃河北驛道上行從東向西道南有一家極高大休之步登冢頭見一銅柱跌為蓮花形休之從西北登一柱礎上以手捉一柱柱遂右轉休之呪曰柱轉三匝吾至三公柱遂三匝而止休之尋寤意如在鄴城東南者其夢竟驗云

爾朱榮破葛應夢北史

爾朱榮字天寶魏孝明帝時累遷至柱國大將一軍初榮將討葛榮軍次襄垣遂大獵有雙兔起於馬前榮彎弓誓之曰中則禽葛榮不中則否既而並應弦而殪三軍咸悅及後命立碑於其所號雙兔碑又將戰夜夢一人從葛榮索千牛刀葛榮初不肯

與此人自稱已是魏道武帝葛榮乃奉刀此人手持授榮寤而喜自知必勝

爾朱兆以夢勸高歡入洛北史

爾朱兆字萬仁爾朱榮從子也魏孝莊帝時功進車騎大將軍莊帝既誅爾朱榮兆將入攻洛遣使招齊神武欲與同舉神武時為晉州刺史謂長史孫騰曰臣而伐君其逆已甚我今不往恐彼致恨卿可往申吾意但云川蜀未平不可委去騰乃詣兆具申意兆不悅曰還白高兄弟有吉夢今行必克吾比夢吾亡父登一高堆堆傍地悉耕熟唯有馬蘭草株往猶在吾父顧我令下拔之吾手所至無不盡出以此而言往必有利騰還具報之

爾朱兆夢攻洛北史



爾朱兆與世隆等定謀攻洛北遂輕兵倍道掩襲京邑先是河邊人夢神謂已曰爾朱家欲渡河用爾作濶波津令為之縮水脉月餘夢者死及兆至有行人自言知水淺處以草往往表挿而導焉忽失其所在兆遂策馬涉渡是日暴風彭怒黃塵張天騎叩官門宿衛乃覺彎弓欲射袍撥弦矢不得發一時散走魏莊帝步出雲龍門外為兆騎所擊幽於永安佛寺

魏孝武夢當貴北史

魏孝武皇帝諱脩字孝則廣平武穆王懷之第三子也母曰李氏帝性沉厚學涉好武事遍體有鱗文年十八封汝陽縣公夢人有從諱謂已曰汝當大貴得二十五年及在田舍嵩山道士潘彌望見洛陽城西有天子氣候之乃帝也既而高歡遣四百騎奉帝入纁帳陳誠泣下露襟讓以寡德歡再拜帝亦拜歡

出備服御進湯沐達夜嚴警昧爽文武執鞭以朝使斛斯椿奉勸進表遂即位于東鄭之外帝於甕上西向拜天訖自東陽雲龍門入

元忠夢執炬入父墓北史

李元忠將仕魏夢手執炬入其父墓中夜驚起甚惡之旦告其受業師占云大吉可謂光照先人也竟如其占魏孝武帝時徵拜侍中封晉陽縣伯

高昂夢為奴所殺北史

高昂字敖曹東魏孝靜帝時封京兆公使奴京兆侯西魏宇文泰軍京兆於傅婢強取昂佩刀以行昂執殺之京兆曰三度救公大急何忍以小事賜殺其夜夢京兆以血塗已寤而怒使折其二脛時劉桃棒在勃海亦夢京兆言訴得理將公付賊桃棒



知昂必死遽奔馬昂心輕敵建旗蓋以陵陣西人盡銳攻之一  
軍皆沒昂輕騎東走河陽城太守高永洛先與昂有隙閉門不  
受昂仰呼求繩又不得拔刀穿闥未徹而追兵至伏於橋下追  
者見其從奴持金帶問昂所在奴示之昂奮頭曰來與爾開國  
公追者斬之以去先是昂夢為此奴所殺以告盧武將殺之武  
諫乃止果及難

泰初母夢風雷北史

齊泰字世寧母夢風雷暴起若有雨狀出庭觀之見電光奪日  
駛雨霑灑寤而驚汗遂有娠基而不產大懼有巫曰度河滿衰  
產子必易便向水所忽見一人曰當生貴子可從而南泰母從  
之俄而生泰至魏孝靜帝時累遷侍中京畿大都督

齊武明太后夢龍而孕北史

齊武明太后凡孕六男二女皆感夢孕文襄則夢一斷龍孕六  
宣則夢大龍首尾屬天地張口動目勢狀驚人孕孝昭則夢龍  
龍於地孕武成則夢龍浴於海孕魏二后並夢月入懷孕襄城  
博陵二王夢鼠入衣下后未崩有童謠曰九龍母死不作孝反  
后崩武成不改服緋袍如故未幾登三臺置酒作樂宮女進白  
袍帝怒投諸臺下和士開請止樂帝大怒搃之帝於昆季次寔  
九蓋其徵驗也

士遜夢父北史

李構齊文襄時為定州長史游道第三子士遜為墨曹博陵王  
管記與典籤共誣奏構構於禁所祭游道而訴焉士遜晝卧如  
夢者見游道怒已曰我與構恩義汝豈不知何共小人謀陷清  
直之士士遜驚跪曰不敢不敢旬日而卒



鄭妃夢人斬汝北史

北齊武成帝河清三年三月群盜白子禮等數十人謀劫神武子彭城王洸為主詐稱使者徑向洸第至內室稱勅呼洸牽上馬臨以白刃欲引向南殿洸大呼不從遂遇害時年三十二朝野痛惜焉初洸未被劫前其妃鄭氏夢人斬洸頭持去惡之數日而洸見殺

貴母夢老人授子北史

宇文貴字永貴父莫皇車後周武帝保定中以貴勲贈柱國丹初孕貴夢老人抱一子授之曰賜爾是子俾壽且貴及生形類所夢故以永貴字之

慶父夢遊盤據座席北史

柳遐字子昇幼而爽邁神氣飛然年歲便有成人之量篤好文

學動合規矩其世父慶遠特甚之謂曰吾昔逮事伯父太尉

公常謂吾云我昨夢汝登一樓甚峻麗吾以坐席與汝汝後名

官必達恨吾不及見耳吾向柳復晝寢又夢將昔時坐席還以

賜汝汝之官位當復及吾特宜勉勵以應嘉祥也及後周武帝

保定中奉詔入朝果授驃騎大將軍開府儀同三司霍州刺史

遼奚武因早祀神夢覺而兩事文類聚

遼奚武周武帝保定中以太保為同州刺史時早武祀華山廟

岳既畢時人竊罕通武年逾六十攀藤而上晚不得還於岳上

藉草而寐夢一白衣執武手曰快辛苦甚相嘉尚武驚覺旦而

謝雨

琳母得石夢仙北史

高琳字季琰母嘗被襖泗濱遇見一石光彩朗潤遂持以歸是



夜夢人衣冠有若仙者謂曰夫人向所將來石是浮屠之精若能實待必生令子母驚寤舉身流汗俄而有娠及生子因名琳字季服北周武帝天和三年為江陵副總管進位柱國薨

薛裕言夢兩楹而卒北史

薛裕字仁友隋文帝時為相參軍事裕曾宿于京北韋叟之廬後庭有井裕夜出戶若有人欲牽其手裕便却行遂落井同坐共出之因勸裕酒曰向慮卿不測憂幸得無他宜盡此爵裕曰墜井蓋小小耳方當逾於此也人問其故裕曰近夢恐有兩楹之憂尋卒

尹氏夢老翁賜壽北史

魏簡公第五子名瑞母尹氏有娠偶致傷後晝寢夢一老翁具衣冠告之曰吾賜汝一子汝勿憂也寤而私喜又問筮者筮

者曰大吉未幾而生瑞禎名協夢故名瑞字天賜位太中大卒

陳竒夢星墜北史

陳竒長於易與游雅不合雅遂抵竒罪下獄嘗自筮卦未及成乃擊破而歎曰吾不度來年冬及竒受害如其所占初竒被召夜夢星墜壓脚明而告人曰星則好風星則好雨星壓脚必無善徵但時命峻切不敢不赴耳

李庶托夢趙起見養北史

李庶妻元羅女也庶亡後庶兄岳使妻伴之寢宿積五年元氏更適趙起嘗夢庶謂已曰我薄福託劉氏為女明旦當出彼家甚貧恐不能見養夫妻舊恩故來相見告君宜乞取我劉家在七帝坊十字街南東入窮巷是也元氏不應庶曰君似懼趙公



意我目說之於是起亦夢焉起寤問妻言之符合遂持錢帛躬往求劉氏如所夢得之養女長而嫁焉

李嶠夢雙筆唐書

李嶠字巨山早孤事母孝為兒時夢人遺雙筆自是有文辭十

五通五經唐高宗時中進士第

知章夢鑿心唐書  
共知章少維學未甚通解忽夢人持巨鑿破其心內若劑焉驚悟忘思開徹遂徧明六經唐中宗時為太常博士

鄭氏夢巨人昇稱唐書

上官昭容名婉兒母鄭方姪夢巨人昇大稱曰持此稱量天下婉兒生踰月母戲曰稱量者豈爾邪輒啞然應後中宗時內秉機政符其夢云

李適夢論大衍唐書

李適唐睿宗時為工部侍郎嘗夢與人論大衍數寤而曰吾盡此乎勅其子曰霸陵原西視京師吾樂之可營墓樹十松焉及未病時衣冠往寢石榻上置所撰九經要句及素琴于前士貴其達

玄宗夢煮藥三覆唐書

玄宗楊皇后帝在東宮睿宗景雲初入為良媛時太平公主忌帝而宮中左右持兩端纖悉必聞媛方娠帝不自安密語張說曰用事者不欲吾多子柰何命說挾劑以入帝於曲室自煮之夢若有介而戈者環鼎三而三煮盡覆以告說說曰天命也乃止遂生男是為肅宗

李白母夢長庚唐書



李白字太白白之生母夢長庚星因以命之十歲通詩書既長  
隱岷山州舉有道不應蘇頲為益州長史見白異之曰是子天  
才英特少益以學可比相如白唐玄宗時為翰林學士

唐玄宗夢梵僧果肖釋氏通鑑

唐玄宗開元四年天竺三藏法師輸波迦羅此云善無畏至京帝初  
夢梵僧風度瓌異因追畫工授以形段圖于殿壁反畏至入對  
帝熟視乃夢中所見僧也悚然異之館于西明寺寧薛諸王皆  
降禮欽重

明皇夢鍾馗啖鬼而疴疾頓瘳事文類聚

唐明皇開元中講武驪山翠華還宮上不悅因疴疾作畫夢一  
小鬼衣絳擗鼻跣一足履一足腰懸一履搢一筠扇盜太真編  
香囊及上玉笛繞殿奔戲上前上叱問之小鬼奏曰臣乃虛耗

也上曰未聞虛耗之名小鬼奏曰虛者望空虛中盜人物如戲  
耗即耗人家喜事成憂上怒欲呼武士俄見一大鬼頭破帽衣  
藍袍繫角帶靴朝靴徑捉小鬼先刺其目然後摩而啖之上問  
大者爾何人也奏云臣終南山進士鍾馗也因武德中應舉不  
捷羞歸故里觸殿階而死是時奉旨賜祿袍以葬之感恩發誓  
與我王除天下虛耗妖孽之事言訖夢覺疴疾頓瘳乃詔畫工  
吳道子曰試與朕如夢圖之道子奉旨恍若有親立筆成圖進  
呈上視久之撫几曰是卿與朕同夢耳賜以百金

竇參夢賜半臂錦事文類聚

唐德宗時竇參為御史中丞嘗一夕夢德宗召對於便殿以錦  
半臂賜之默念曰臂者庇也大邑所以庇吾身也今夢半臂者  
豈上以某功居顯位將給半祿俾我致政乎客有解曰半臂者



被股肱之衣也今公夢天子賜之豈非上將以股肱之位而委公乎明日果拜中書侍郎平章事

德裕夢老父言七九之數事文類聚

李德裕唐武宗時為宰相嘗開鑿新繁縣東湖是夜夢一老父曰某潛形其下幸庇之明府富貴今鼎來七九之年當相見於尚里外後於土中得一墓徑數尺投水中而德裕以六十三卒於朱崖果應七九之讖公卒見夢於令狐綯曰公幸哀我使我歸葬綯曰衛公精爽可畏不言禍將及乃白于帝得以喪還

杜牧夢白駒唐書

杜牧唐武宗時為考功郎中夢人告曰爾應名畢復夢書皎皎白駒字或曰過隙也俄而然既裂牧曰不祥也乃自為墓誌悉取所為文章焚之牧於詩精致豪邁人號為小杜以別杜甫云

鄭光夢御大車載日月唐書

鄭光孝明皇太后弟也唐武宗會昌末夢御大車載日月行中衢光輝洞照六合寤而占之工曰君且暴貴不闕月宣宗即位光與民伍拜諸衛將軍遷紫平盧軍節度使

馬裔孫夢神授筆事文類聚

五代唐末帝時馬裔孫赴關宿避府其地有神祠夜夢神手授二筆及為翰林學士裔孫以為契夢筆之兆洎入中書上事堂吏奉二筆如夢中所授者

仁裕夢剖滌腸胃五代史

王仁裕少不知書以狗馬彈射為樂年二十五始就學嘗夢剖其腸胃以西江水滌之顧見江中沙石皆為篆籀之文由是文思益進後漢高祖時為翰林學士承旨



太祖夢鶴知延徽至遼史

韓延徽南奔太祖夢白鶴自帳中出比還復入帳中詰旦謂侍臣曰延徽至矣已而果然

遼興宗母夢吞金鷄遼史

聖宗欽哀皇后蕭氏小字穉斤淳欽皇后弟阿古只五世孫黜面狠視母嘗夢金柱擎天諸子欲上不能后後至與僕從皆陞異之久之入宮嘗拂承天太后榻獲金鷄吞之膚色光澤勝常太后驚異曰是必有奇子已而生興宗

金康宗夢應太祖龍位金史

康宗歲癸巳十月夢逐狼屢發不能中太祖前射中之旦日以所夢問僚佐眾皆曰吉尤不能得而弟得之之兆也是月康宗即世太祖龍位

萬公應夢命名金史

張萬公字良輔幼聰悟喜讀書父彌學夢至一室榜曰張萬相公讀書堂已而萬公生因以名焉登金海陵正隆二年進士第范質母夢人授五色筆宋史

范質字文素後梁時父守遇鄭州防禦判官質生之夕母夢神人授以五色筆九歲能屬文十三治尚書教授生徒後唐長興四年舉進士後周太祖時官至宰相

高防夢印宋史

高防字修已性沉厚守禮法後漢隱帝時授屯田員外郎改後儀令時楊邠用事與防有隙未幾免職居數月夢一吏以白帕裹印自門入授防防寤而思曰白主刑吾當為主刑官乎俄而周太祖即位起為刑部員外郎吏齋印至一如夢中所覩



揚礪夢來和天尊宋史

揚礪字汝礪廣順中周世宗節制澶州礪暫文見之館接數日世宗入朝礪處僧舍夢舌衣冠者曰汝能從乎礪隨往覩宮衛若非人間殿上王者秉珪南向總三十餘礪升謁之最上者前有案置簿錄人姓名礪見已名居首因請示休咎王者曰我非汝師指一人曰此來和天尊異日汝主也當問之其人笑曰此去四十年汝功成予名亦顯矣礪再拜寤而志之礪初名勵以籍作礪遂改之至是受命謁見藩府歸謂子曰吾今見襄王儀貌即所夢來和天尊也遷水部郎中真宗尹開封礪為推官嘗問礪何年及第礪唯唯不對後知其唱名第一自悔失問謂礪不以科名自伐甚重之及卒帝冒雨臨其喪礪舍委巷中乘輿不能進步至其第嗟憫久之廢朝贈兵部尚書中使護葬

太祖文悅互夢宋史

辛文悅以五經教授宋太祖幼時從其肄業周世宗顯德中太祖歷禁衛為殿前都點檢節制方面文悅久不獲接見一日夢邀車駕請見既拜乃太祖也太祖亦夢其來謁因令左右尋訪文悅果自至太祖異之

世宗遵誨夢蛇化龍宋史

太祖微時客心至漢東依董宗本而遵誨憑藉父勢太祖每避之遵誨嘗謂太祖曰每見城上紫雲如蓋又夢登高臺遇黑蛇約長百尺餘以化龍飛騰東止去雷電隨之是何祥也太祖皆不對他日論及戰事遵誨理多屈拂衣而起太祖乃辭宗本去自是紫雲漸散及即位一日便殿召見遵誨伏地請死帝令左右扶起因諭之曰卿尚記往日紫雲及龍化之夢乎遵誨再拜



呼萬歲

王處訥夢納星鑑宋史

王處訥少時有老叟至舍煮洛河石如麵令處訥食之且曰汝性聰悟後當為人師又嘗夢人持巨鑑星宿燦然滿中剖腹納之覺而汗洽月餘心胃猶覺痛因留意星曆占候之學深究其旨宋太祖建隆二年以欽天曆謬誤詔處訥別造新曆遷少府少監

李至母夢仙授圖宋史

李至字言幾母張氏嘗夢八仙人自天降授字圖使吞之及寤猶若有物在胸中未幾生至及長辭華典瞻宋太宗太平興國八年轉為翰林學士

臧丙夢父指星宋史

臧丙字夢壽丙舊名愚字仲田既孤常慕其父召丙偶立於庭向空指曰老人星見矣丙仰視之黃明潤大因望而拜既寤私喜曰吉祥也丙壽星出丙入丁乃改名焉後太宗時為司農少卿拜諫議大夫出知江陵府

凌策夢六印宋史

凌策字子奇太宗雍熙中舉進士起家尋拜諫議大夫集賢殿學士初登第夢人以六印加劔上遺之其後徃劔外凡六任時以為異策勤吏職處事精審所至有治迹

錢惟治夢神補缺宋史

錢惟治初鎮四明嘗夢神人披甲自稱西嶽神謂惟治曰公面有缺文即捧土濟之後領華州節鉞二十年宋太宗時進位檢校太尉



趙自然因夢辟穀宋史

趙自然家茨巷旁以鬻茗為業本名王九始十三疾甚父抱詣  
青華觀許為道士後夢一人狀貌魁偉綸巾素袍鬢髮斑白自  
云姓陰引之登高山謂曰汝有道氣吾將教汝辟穀之法乃出  
青栢枝令啗夢中食之及覺遂不食神氣清爽每聞火食氣即  
嘔惟生果清泉而已歲餘復夢向見老人教以篆書數百字寤  
悉能記寫以示人皆不能識或云此非篆也乃道家符籙耳嘗  
為元道歌言修煥之要知州王洞表其事太宗召赴闕親問之  
賜道七服改名自然

龐母夢月宋史

宋真宗皇后劉氏初后母龐氏夢月入懷已而有娠遂生后后  
在襁褓而孤鞠於外氏善播鼗蜀人龔羨携入京師后年十五

入襄邸置之王宮真宗後立為皇后

宋真宗夢菜得蔡齊事文類聚

蔡齊字子思宋真宗時人也帝臨軒策士夜夢殿下有菜一苗  
甚盛與殿基相高及拆第一卷乃蔡齊

寇瑊母夢珠宋史

寇瑊字次公初母夢神人授珠吞之有娠生而眉目美秀擢進  
士第真宗天禧中為河北轉運使

黃亢母夢星殞宋史

黃亢字清臣母夢星殞于懷掬而吞之遂有娠亢少奇穎過人  
年十五以文謁翰林學士章得象得象奇之宋真宗時王隨知  
杭州亢作詩以諷隨

章母夢積芴宋史



章得象字希言世居泉州高祖仔鈞事<sub>目</sub>為建州刺史遂家浦城得象母方娠夢登山遇神人授以玉篋及生父真復夢家庭積芻如山長而好學美姿表為人莊重進士及第為大理評事知玉山縣遷本寺丞真宗將東封泰山以殿中丞簽書兗州觀察判官事知台州歷南雄州徙洪州楊億以為有公輔器薦之查道夢神致辭<sub>宋史</sub>

查道字湛然好學嗜弈甚深信內典平居多茹蔬或止一食默坐終日暇玩極於卑儉嘗夢神人謂曰汝位至正郎真宗時果加刑部郎中進右司郎中壽五十七而卒年六十四論者以為積善所延也

<sub>真宗因夢建廟宋史</sub>

王欽若字寧國仕宋以尚書左丞知樞密院事修國史大中祥

符初為封禪經度制置使兼判兗州為工書儀衛副使先是真宗嘗夢神人言賜天書於泰山即密諭欽若欽若因言六月甲午木工董祚於醴泉亭北見黃素曳草上有字不能識皇城吏王居正見其上有御名以告欽若既得之具威儀奉導至社首跪授中使馳捧以進真宗至含芳園奉迎出所上天書再降祥瑞圖示白僚欽若又言至嶽下兩夢神人願增建廟庭及至威雄將軍廟其神像如夢中所見因請構真廟中

<sub>梅詢夢遇夷簡宋史</sub>

梅詢字昌言性卞急好進而侈於奉養五土老不衰然數為朝廷言兵嘗知濠州後坐薦舉未能貶懷州團練副使真宗時在濠州夢人告曰呂丞相至矣既而呂夷簡過判州事故待之甚厚其後援詢於廢井中以貴顯夷簡力也



宋庠母夢道士授書宋史

宋庠字公序父杞嘗為九江掾與其妻鍾禱于廬阜鍾夢道士授以書曰以遺爾子視之小戴禮也已而庠生他日見許真君像即夢中見者庠仁宗天聖初擢進士第一

沈母徵夢宋史

劉沆字冲之祖景洪始揚行密得江西衙將彭玠據州自稱太守屬景洪以兵欲脇衆附湖南景洪偽許之復以州歸行密退居不住以財雄里中喜賓客景洪嘗告人曰我不從彭玠幾活萬人後世當有隆者因名所居北山曰後隆山山有牛僧孺讀書堂即故基築臺曰聰明臺沆母夢衣冠丈夫曰牛相公來已而有娠乃生沆及長倜儻任氣舉進士不中自稱退士不復出父力勉之宋仁宗天聖八年擢進士第二

劉沆夢斫頭為狀元 事文類聚

相國劉沆宋仁宗天聖中赴省試一夕夢被人斫落頭心甚惡之有鄉人釋之曰狀元不到十二郎做只得第二人公詰之曰所却頭留項在裏蓋南音呼沆為項也後果第二人及第

李迪夢剃鬚為狀元 事文類聚

李文定公迪美鬚髯宋仁宗時御試前一日夢被人剃削俱盡心惡之有解者曰必為狀元緣今歲省元是劉滋已替滋矣非狀元而何是歲果狀元及第

楊大年夢玉人添壽事文類聚

楊大年宋仁宗時年三十七為翰林學士晝寢於玉堂忽夢懷玉山人來謁出一牒寫三十七字大年驚曰得非數乎許添乎山人命筆一點為四十七字至其數果卒



楊真致友人作夢宋史

楊真字審賢少有雋才仁宗慶曆二年舉進士京師試國子監禮部皆第一既試崇政殿帝臨軒啓封見名喜動于色謂輔臣曰楊真也遂擢第一公卿相賀為得人授將作監丞通判潁州未至官持母喪病羸卒特詔賻恤其家先是其友夢真作龍首山人真自謂龍首我名冠多士山人無祿位之稱我其終是乎已而果然

李氏夢墮月生純仁宋史

范純仁字堯夫其始生之夕母李氏夢兒墮月中承以衣裾得之遂生純仁性資警悟八歲能講所授書宋仁宗皇祐元年中進士第

韓氏感夢生富弼宋史

富弼字彥國初母韓有娠夢旌旗鶴鴈降其庭云有天赦已而生弼少篤學有大度范仲淹見而奇之曰王佐才也以其文示王曾晏殊殊妻以女宋仁宗時舉茂才異等授將作監丞

馮母夢得蓮花宋史

馮元字宗道進士中第授江陰尉累遷翰林學士史館修撰仁宗時卒贈尚書謚章靖元七歲時方讀易母夜夢異人以紺蓮花與元吞之且曰善讀此後必貴顯元且老率三日一誦易無子以兄之子諲為後

余靖夢死秦亭宋史

余靖舉進士擢集賢校理仁宗嘉祐中官至工部尚書嘗夢神人告以所終官而死秦亭故靖常畏西行及卒則江寧府秦淮亭也



張洞夢兆宋史

張洞字仲通英宗時移淮南轉運使轉工部郎中在棣時夢人稱敕召者既出如拜官然顧視旌旗吏卒羅于庭至是夢之如初自以年不能永教諸子部分家事未幾卒

滕母夢虎生元發宋史

滕元發初名甫字元發以避高魯王諱改字為名而字達道將生之夕母夢虎行月中墮其室性豪雋慷慨不拘小節九歲能賦詩范仲淹見而奇之英宗時舉進士後仕至龍圖學士

郭祥正母夢李白宋史

郭祥正字功父母夢李白而生少有詩聲梅堯臣方擅名一時見而歎曰天才如此真李白後身也神宗熙寧間中進士第

范母夢鄧禹生祖禹宋史

范祖禹字淳甫一字夢得其生也母夢一偉丈夫被金甲入室曰吾漢將軍鄧禹既寤猶見之遂以為名宋神宗時司馬光薦為秘書省正字

趙槩因夢更名宋史

趙槩初名裡嘗夢神人金書名簿有趙槩遂更名云官至吏部尚書宋神宗時以太子少師致仕

執中夢神人宋史

喬執中字希聖調須城主簿神宗時累遷給事中寬厚有仁心屢典刑獄雪活以百數紹聖中夢神人界以騎都尉詰且為客言之少焉談笑而逝

伯虎夢收父書宋史

唐庚兄弟五人長兄瞻字望之後改名伯虎字長孺治易春秋



皆有家法哲宗元祐三年其父游瀘南伯虎兄弟居母喪於丹山伯虎夜半蹴庚曰吾夢收父書發之得亟來二字吾父得無他乎吾心動矣汝奉母奠朝夕吾趨瀘南庚未及應伯虎奮曰吾決矣起裹糧黎明走洪川僦舟遇江漲聲搖數十里客舟皆艤岸不敢動伯虎彷徨堤上有漁者持小艇繫港中啗以厚利不許伯虎趨入艇中叱僕夫解維漁者不得已從之二日半至瀘南父果病甚見伯虎大驚問其故具告之父嘆曰天告汝也是日疾少間伯虎具舟侍父以歸居數日疾復作遂卒

吳仲庶夢石事文類聚

吳仲庶作守金陵有三大石甚古特夜仲庶夢三舉子求哀且曰若不垂祐明日當為煨燼矣公甚異之詰旦徧問僚屬莫能厚其意既而視其牒見兵馬司狀申乞燒三醜石為灰供修造

之用公遂悟敕寺僧愛護案哲宗元祐中毛漸作漕欲移置解舍掘之極深而石根不斷不能動遂罷

洪興祖夢六刀宋史

洪興祖高宗時知饒州先夢持六刀覺曰三刀為益今倍之其饒乎已而果然

蕭燧夢松栢宋史

蕭燧字照鄰高祖固皇祐初為廣西轉運使知儂智高凶狡條上羈縻之策於樞府不果用智高後果叛父增紹興初嘗應制舉燧生而穎異幼能屬文宋高宗紹興十八年擢進士高第授平江府觀察推官燧未第時夢神人示以文書記其一聯云如火烈烈玉石俱焚在冬青青松栢不改已而果符前事宋孝宗時遷國子司業



汝愚夢授湯鼎宋史

趙汝愚以大學士提舉洞霄宮初嘗夢孝宗授以湯鼎背負白龍升天後翼寧宗以素服登大寶蓋其驗也而讒者以倡引偽徒謀為不軌乘龍授鼎假夢為符為言時汪義端行詞用漢誅劉屈氂唐戮李林甫事示欲殺之意迪功郎趙師召亦上書乞斬汝愚汝愚怡然就道謂諸子曰觀旣胃之意必欲殺我我死汝曹尚可免也至衡州病作為守臣錢鞏所窘暴薨天下聞而寃之

鄭惠叔夢立石事文類聚

莆田鄭矯惠叔宋孝宗乾道己丑春省試中選未廷對夢空中一梯雲氣圍繞竊自念曰世所謂雲梯者茲其是歟俄身至雲梯側遂登之及高層仰望則有大石蒼然如鏡面鄭懼壓已忽

再與并騰立于石上驚覺自喜但不曉登石之義既而為天下第一其次曰溫陵石起宗先是考官用分數編排石君當居上臨唱名始易之云

范父夢雙日照庭宋史

范應鈴字旂叟方娠大父夢雙日照庭應鈴生稍長屬志于學丞相周必大見其文嘉賞之寧宗開禧中舉進士調永新尉仕至直寶謨閣湖南轉運判官兼安撫司

江萬里兆夢宋史

江萬里字子遠自其父燁始業儒大父璘鄉稱善人其鄰史知縣者夸其能杖譁健士璘俛首不答歸語燁曰史祖父故寒士今居官以杖士人自意於我心有不釋然審爾史氏且不昌汝其戒之是夕燁妻陳夢一貴人入其家曰以汝家長有善言故



來已而有娠生萬里少神雋有鋒穎連舉于鄉入太學有文聲  
宋理宗時拜端明殿學士兼樞密院事兼太子賓客

承祐夢贈著草宋史

孫承祐少時嘗夢人以著草一本增其一而授之既寤以語所  
親曰大衍之數五十其用四十有九今增其一我壽止於此乎  
果五十而卒

竇禹夢祖父戒言修德有報事文類聚

竇禹鈞家甚豐年三十無子夜夢亡祖亡父聚謂之曰汝早修  
行緣汝無子又壽數不永禹鈞唯諾後十年復夢其祖父告之  
曰汝自數年以來名掛天曹陰府以汝有陰德延筭三紀賜五  
子各榮顯

尹思貞得夢而卒事文類聚

尹思貞字季弱明春秋遷四門助教撰諸經義樞續史記皆未  
就夢天官麟臺交辟宿而會親族叙訣二日卒

杜鵬舉夢鳥旁曳脚事文類聚

杜鴻漸之父名鵬舉父子而似兄弟之名蓋有由也鵬舉嘗夢  
有所之見一大碑云是宰相碑已作者金填其字未者刊名於  
柱上因問有杜家兒否曰有任自看之記得柱下有鳥偏旁曳  
脚而忘其字乃名子為鴻漸而謂之曰汝不為相即汝之名字  
當鳥旁而曳脚也名字且前定况官與壽乎

邊鎬夢靈運託為子事文類聚

宋邊鎬初生父忽夢前永嘉守謝靈運來謁願託君為父子鎬  
生貌類夢中者小字康樂及冠穎秀嗣主累用之平建州克湘  
潭號為邊羅漢



之身夢魚來謝事少類聚

梁南郡太守劉之亨嘗夢一人姓李詣之乞命未之解也其明日仲夏有遺生鯉二頭之亨曰必夢中所感也乃放之其夜又夢來謝云當令君延筭

魯公放蛤來謝事文類聚

曾魯公好放生以蜺蛤之類人所不放而活命之多也一日夢被甲者數百人前訴既寤而問其家乃有惠蛤蚶數籠者即遣人放之夜復夢被甲者來謝

張詠夢坐黃兼濟下事文類聚

張忠定公詠在成都府嘗夜夢謁紫府真君接語未久吏忽報請到西門黃兼濟承事以幅巾道服而趨真君降階接之禮頗隆盡且揖張公坐承事之下詢顧詳疑似有欽嘆之意公翌旦

即遣與客詣西門請黃承事者戒令具常所衣服來比至果如夢中所見公即以所夢告之問平日有何陰德蒙真君厚遇如此且居某之上座耶兼濟云無他長惟每歲遇禾麥熟時以錢三萬緡收糶至明年禾麥未熟小民艱食之際價直不增升斗亦無高下在我者初無所損而小民得濟所急公曰此承事所以坐某之上也令素公裳二吏掖之使端受四拜黃公後裔蕃衍至今在仕路者比比青紫

崔悅放鼈事文類聚

崔悅尚書家方會客夜夢十九人着青綠羅衣拜告求生既寤見器中有水泛鼈正十九頭遂詣水次放之

陶穀鬼眼事文類聚

陶穀少時夢數吏奉符換眼吏附耳曰求錢千萬穀不應又云



錢伍萬安第二眼復不答吏曰止安第三眼即以彈丸納眼中既覺眼色深碧後善相道士陳子陽曰貴人骨氣柰一雙鬼眼必不至顯位

髑髏見夢事文類聚

陳留周氏婢名興進八山取樵夢見一女語之曰近在汝頭前目中有刺煩拔之當有後報牀頭果有一朽棺頭穿壞髑髏墮地草生目中便為拔草內着棺中以甃塞穿即於髑髏處得一雙金指環

張審通夢生三耳事文類聚

兗州張審通嘗為泰山府君所召令為詞判錄申天曹天曹允之府君悅與審通額上安一耳既寤覺額癢果生一耳尤更聰俊時號三耳秀才

柳慎生耳事文類聚

方陰官以事懇上元夫人而不允聞陽世有士人柳慎善為文遂追令為表既而獲命陰官喜曰子何願曰特更欲聰明耳乃命取一耳置其額既寤額癢輒搔出一耳時人語曰天上有九頭鳥地下有三耳秀才

殷延嗣夢朱揆及第事文類聚

孝廉朱揆居永嘉苦學與表弟殷延嗣同宿殷夢一人直抵房謂曰朱揆某年某月某日杜侍郎下成名舉而說之朱曰何戲言之甚邪殷遂將朱禮經疏後紀之至來年西上後果於杜侍郎下及第年月日略不參差

克翁夢鳥元史

李木魯神字子暈金泰和間定女直姓氏屬望廣平祖德從憲



宗南征因家鄧之順陽以功封南陽郡侯父居謙用翀貴封南陽郡公初居謙辟掾江西以家自隨生翀贛江舟中釜鳴者三人以為異翀稍長即勤學父歿家事漸落翀不恤而為學益力乃自順陽復往江西從新喻蕭克翁學克翁宋參政燧之四世孫也隱居不仕學行為州里所敬嘗夜夢大鳥止其所居翼覆軒外舉家驚異出視之冲天而去明日翀至翀始名思溫字伯和克翁為易今名字以夢故

劉因應夢馬而生元史

劉因字夢吉保定容城人世為儒家五世祖琮生數武校尉臨洮府錄事判官昉昉生奉議大夫中山府錄事俱俱生秉善金貞祐中南徙其弟國寶登興定進士第終奉直大夫樞密院經歷秉善生述述因之父也歲壬辰述始止歸刻意問學邃性理

之說好長嘯元世祖中統初左三部尚書劉肅宣撫真定辟武邑令以疾辭歸年四十未有子嘆曰天果使我無子則已有子必令讀書因生之夕述夢神人馬載一兒至其家曰善養之既覺而生乃名曰駟字夢驥後改今名及字

黃潛母夢星而娠元史

黃潛字晉卿母童氏夢大星墜于懷乃有娠歷二十四月始生潛潛生而俊異比成童授以書詩不一月成誦迨長以文名於四方元仁宗延祐二年中進士第

酸齋母夢神授大星元史

小雲石海涯家世見其祖阿重海涯傳其父楚國忠惠公名貫只哥小雲石海涯遂以貫為氏復以酸齋自號母廉氏夜夢神人授以大星使吞之已而有妊及生神彩秀異既長膂力絕人



折節讀書目五行下元仁宗時拜翰林學士

馮母夢文昌元史

呂思誠字仲實母馮氏夢一文夫烏巾白襴衫紅鞵束帶趨而揖曰我文昌星也及寤思誠生目有神光見者異之及長入國子學中元晉王泰定元年進士第

歸賜母夢日出元史

歸賜字彥溫汴梁人將生其母楊氏夢朝日出東山上有輕雲來掩之故名賜學無師傅而精敏過人文宗至順元年登進士第授同知鄴州事鉏奸擊強人不敢以年少輕易之

黃澤夢聖元史

黃澤字楚望由篤學苦思嘗夢見夫子以為適然既而屢夢見之最後乃夢夫子手授所較六經字畫如新由是深有感發始

悟所解經多徇舊說為非是乃作思古吟十章極言聖人德容之盛上達於文王周公秩滿即歸閉門授徒以養親不復言仕元順帝至正六年卒

達遵道告夢而卒元史

達禮麻識理字遵道幼穎敏經史過目輒解元順帝時累遷至中書平章政事達禮麻識理之卒也先一夕怯薛官哈刺章者阿兒刺氏阿魯圖孫也夜夢太祖召見語之曰我以勤勞取天下以傳于妥歡帖睦爾而愛猷識理達臘不克肖似廢壞我家法苟不即改圖天命不可保矣爾吾功臣之後且誠實故召汝語汝明且亟以吾言告而主及愛猷識理達臘汝不以告吾即殛汝告而不改則吾它有處之達禮麻識理其人庶幾識事宜者然知而不言將焉用之吾其先殛之矣明日哈刺章入見順



帝具以夢告帝令以告皇太子比出則達禮麻識理已無疾而卒矣

# 符讖

符合讖語者

晉元牛繼馬後 晉書

晉宣帝司馬懿深忌牛氏遂為二榼共一口以貯酒焉帝先飲佳者而以毒酒鳩其將牛金以其先得玄石圖有牛繼馬後之說而恭王妃夏侯氏竟通小吏牛氏而生晉元帝亦有符云

季龍得玉版 晉書

後趙石季龍使人探策于華山得玉版文曰歲在申酉不絕如綫歲在壬子真人乃見及此燕人咸以為慕容儁之應也

齊高帝備應符讖 齊史

齊高帝昇明二年冬延陵縣季子廟沸井之北忽聞金石聲疑其異鑿深三尺得沸井奔涌若浪其地又響即復鑿之復得一井涌沸亦然井中得一木簡長一尺廣二分上有隱起字曰廬山道人張陵再拜詣闕起居簡大堅白字色乃黃焉應圖云浪井不鑿自成王者清靜則仙人主之會稽剡縣有山名刻石父老相傳云山雖名刻石而不知文字所在昇明末縣人兒齧祖行獵忽見石上有文字凡三處苔生其上字不可識乃去苔視之其大石文曰此齊者黃石公之化氣也立石文曰黃天星姓蕭字道成得賢帥天下太平小石文曰刻石者誰公曾稽南山李斯刻秦望之風也孝經鈎命決曰誰者起視名將此帝小字也河洛讖曰歷年七十水滅緒風雲俱起龍鱗舉又曰肅肅草成道德盡備按宋水德也義熙元年宋武帝王業之以石至齊受命



七十年又識曰蕭為二士天下樂按二士主字也邵文舉金雄  
 記曰當復有作蕭入草易曰聖人作萬物觀當復有作言聖人  
 作也王子年歌曰欲知其姓草蕭蕭穀中最細低頭以熟鱗身甲  
 體永興福穀中精細者稻也稻即道也熟猶成也又八歌曰金刀  
 利刃齊刈之金刀劉字刈猶剪也孔子河洛識曰垣河梁塞龍  
 泉消除水災泄山川水即宋也宋氏為災害故曰水災梁亦水  
 也竭河梁則行路成矣路猶道也消除水災除宋亦氏之災害  
 也河圖識又曰上參南斗第一星下立草屋為紫雲此神龍之岡  
 梧桐生鳳鳥戩翼朔旦鳴南斗吳分野草屋者居一蕭字象也  
 先是益州有山古老相傳曰麻后山昇明二年四月二十三日  
 有沙門玄暢者於此山立精舍其日上登尊位其月二十四日  
 黎陽郡人尹千於嵩山東南隅見天雨石墜地石間有玉璽在  
 其中璽方三寸文曰戊丁之人與道俱蕭然入草屋應天符掃平  
 河洛清魏都又曰皇帝運興千奉璽詣雍州刺史趙闢亦斧亦斧  
 以獻按宋武帝於嵩高山得玉璧三十二枚神人云此是宋卜  
 世之數三十二者二三十也宋自受命至禪齊凡六十年然則  
 帝之符應也若是今備之云

### 謠識

謠言成識者

取籀月期國語

晉獻公問於卜偃曰攻籀何月也對曰童謠有之曰丙之晨龍  
 尾伏辰均服振振取籀之旂鶉之奔奔天策焯焯火中成軍其  
 九月十月之交乎

郭偃知重耳之入國語



晉惠公即位出共世子而改葬之是違於外國人詔之曰貞之  
 無報也孰是人斯而有是臭也貞為不聽信為不試國斯無刑  
 倫居倖生不更厥貞大命其傾威兮懷兮各聚爾有以待所歸  
 兮獨兮違兮心之哀兮歲之二七其靡有徵兮若狄公子吾是  
 之依也鎮撫國家為王妃也郭偃曰甚哉善之難也君改葬共  
 君以為祭也而惡滋章夫人美於中必播於外而慈於民民實  
 戴之惡亦如之故行不可不慎也必或知之十四年君之冢嗣  
 其替乎其數告於民矣公子重耳其入乎其魄兆於民若入必  
 伯諸侯以見天子其光耿於民矣數言之紀也魄意之術也光  
 明之曜也紀言以序之述意以導之明曜以昭之不至何待欲  
 先導者行乎將至矣

長安女子狂呼漢書

王莽時長安狂女子碧呼道中曰高皇帝大怒趣歸我國不若  
 九月必殺汝莽收捕殺之

蜀中童謠後漢

公孫述光武時據蜀僭號廢銅錢鑄鐵錢述廢銅錢置鐵官錢  
 百姓貨幣不行蜀中童謠言曰黃牛白腹五銖當復好事者竊  
 言王莽稱黃述自號白五銖錢漢貨亡言天下當并還劉氏

京師童謠後漢

桓帝末京師童謠曰茅田一項中有井四方纖纖不可整嚼復  
 嚼今年尚可後年磽按易曰拔茅連茹茅喻群賢也井者法也  
 時中常侍管霸等憎疾海內英賢並見廢錮茅田一項言群賢  
 衆多也中有井者言雖厄窮不失法度也四方纖纖言姦慝不  
 可理也嚼飲酒相強之辭也言不恤主政徒耽宴而已今年尚



可者言但禁錮也後年饒者陳蕃寶武等誅天下大壞也

羊祜薦濟應識晉書

羊祜晉武帝時為征南大將軍得專辟召初祜以伐吳必藉上  
流之勢又吳有童謠曰阿童復阿童銜刀浮渡江不畏岸上獸  
但畏水中龍祜曰此必水軍有功但當思應其名者會祜知  
益州刺史王濬可任濬又小字阿童因表留濬監益州諸軍事  
加龍驤將軍密令脩舟楫為順流之計後濬果建大功

賈氏謀危致謠晉書

晉惠帝元康中京洛童謠曰南風起吹白沙遙望魯國何嗟峨  
千歲鶻鸞生齒牙又曰城東馬子莫嚙啣比至來年纏汝鬃南  
風賈后字也白晉行也沙門太子小名也魯賈謚國也言賈后  
將與謚為亂以危太子而道王因譽明嚼豪賢以成篡奪不得

五馬渡江之應晉書

晉元帝八年中童謠曰五馬浮渡江一馬化為龍後中原大亂  
宗廟多絕遷徙五馬尚頌彭城五王同過江而元帝嗣  
統六

一有方當得白犬膽以為藥自

揚八人皆自云已得蟲病始

灼者十七八而白犬暴貴其

後已五日漸靜



海西公生子成歌

晉廢帝海西公初生皇子百姓歌云皇生一雛天下莫不喜  
本言是馬駒今定成龍子其歌辭旨心微海西公不男使左右  
向龍其乃待生子以為已子

符堅殺魚遵

秦主符堅初生時大魚食蒲又長安西曰東海大魚化為龍男  
便為王女為公孫在何所洛門東東海符堅封也時為龍驤將  
軍第在洛門之東符生不知是堅以夢之故誅其侍中太師  
錄尚書事急遣其具七子十孫時又曰曰自皇望空城鬱鬱何  
青青瞎兒不知法仰不見天星於是心壞諸空城以禳之

鮮卑滅堅之應

秦主符堅即偽位時童謠曰阿堅連年三十年後若欲敗時當

在江湖邊及堅在位凡三十年敗於淝水是其應也又證云河  
水清復清符詔死新城及堅為姚萇所殺死於新城復證歌云  
魚羊田斗當滅秦識者以為魚羊鮮也田斗卑也其群臣諫堅  
令盡誅鮮卑堅不從及敗還初為慕容冲所攻又為姚萇所殺  
果驗

符堅授龍驤之徵

秦主符堅將寇晉以姚萇為龍驤將軍督益梁州諸軍事謂萇  
曰朕本以龍驤建業龍驤之號未曾假人今特以相授山南之  
事一以委卿堅左將軍竇衝進曰王者無戲言此將不祥之徵  
也惟陛下察之堅默然

范雲妻聞躡聲

范雲字彥龍當齊高帝永明末梁武尚在布衣與兄懿小居東



郊之外雲亦竝空室相依梁武每夢嘗所其妻常聞蹕聲又嘗與  
梁武同宿顧景高之舍高之妻方產有鬼在外曰此中有王有相  
雲起曰王當仰屬相以見歸因是盡心推事梁武

齊武帝時小兒恠戲南史

齊武帝立禪靈寺於都下當世以為壯觀天意若曰禪者禪也  
靈者神明之目言武帝晏駕而鼎業傾移也永明世市里小兒  
以鐵相擊於地謂之關鑿鑿之為言族也至是宗室族滅矣又  
武帝時以燕支為朱衣朝士皆服之及明帝以宗子入纂此又  
奪朱之效也時又多以生紗為帽半其裙而折之號曰倚勸先  
是人間語好云擾攘建武至是朝士勸進實為忽遽倚勸擾攘  
之言於是驗矣

梁武言及舊識南史

梁武帝嘗與記雲言及舊事云朕司州還在三橋宅門生王道  
率衣云聞外述圖讖云齊祚不久別應有王者官應取富貴朕  
齋中坐讀書內感其言而外迹不得無怪欲呼人縛之道叩頭  
求來乃不復取言今道為羽林監文德主帥知管籥雲曰此乃  
天意令道發耳帝又云布衣時嘗夢拜兩舊妻為六官有天下  
此摠已卒所拜非復其人恒以為恨

武帝錢讖南史

初梁武帝末年都下用錢每百皆除其九謂為九佰竟而有侯  
景之亂及江陵將覆每百復除六文稱為六佰讖者以為九者  
陽九六者百六蓋符歷數非人事也

侯景鹽讖南史

侯景將敗有僧通道人者意性若狂飲酒敢肉不異凡等世間



游行已數十載姓名鄉里人莫能知初言隱伏久乃方驗人並  
 呼為關梨景無信敬之景常於後堂與其徒共射時僧通在坐  
 奮身弓射景陽山大呼云得奴已景後宴集其黨又召僧通僧  
 通取肉搗鹽以進景問曰好不景答所恨大鹹僧通曰不鹹則  
 爛及景死王僧辯截其二手送齊文宣傳首江陵果以鹽五斗  
 置腹中送于建康暴之于市百姓爭取屠膾羹食比晷盡并涼陽  
 主亦預食例景焚骨揚灰曾懼其禍者乃以灰和酒飲之首至  
 江陵梁元帝命梟於市三日然後煮而凍之以付武庫

後主伐木興謠南史

陳後主時令人於湘州採木擬造正寢棧至牛渚磯盡沒水中  
 既而漁人見棧浮於海上起齊雲觀國人歌曰齊雲觀冠來無  
 際畔始比齊末諸省官人多稱省主未幾而滅至是舉朝亦有

此種識者以為省主主將見省之兆

并州謠言北史

庶人楊諒隋文帝第五子封漢王陰有異圖并州謠言一張絳  
 兩張絳客量少兒作天子時偽署官告身皆一絳別授則二絳  
 諒聞謠喜曰我幼字阿客量與諒同音吾於皇家最小以為應  
 之

金陵解字識事文類聚

唐僖宗時黃巢將攻金陵人說之曰王母以攻也王名巢入金  
 陵則鎖矣遂解去

字識

有字見成識言者

松昌谷有石青質白字釋氏通鑑



唐太宗貞觀十七年八月四日源州松昌鴻池谷忽有五石皆青質白文成字曰高皇海出多子李元王八十年太平天子李世民千年太子李治書燕山人士樂大國主仁邁千古五六七王七佛八菩薩及上果佛田天子等乃至為善源州奏丁朝群公擬字粲然明著十一月辛卯有事于南郊詔遣使以玉帛詣其谷祭之

### 靈見 死後精靈顯見者

夏侯夬精爽如生北史

夏侯夬魏宣武帝時歷鎮遠將軍南兗州大中正初夬與南人辛謏庾遵江文遙等終日遊聚酣飲之際恒相謂曰人生局促何殊朝露坐上相看先後間耳脫有先亡者於良辰美景靈前

飲宴儻或有知庶共歆饗及夬亡後三月上巳諸人相率至大靈前仍共酌飲時日晚天陰室中微闇咸見夬在坐衣服形容不異平昔時執盃酒似若獻酬但無語耳夬家客雍僧明心有畏恐披簾欲出便即僵仆狀若被毆夬從兄欣宗云今是節日諸人憶弟疇昔之言故來共飲僧明何罪而被噴責僧明頓悟而欣宗鬼語如夬平生并怒家人皆得其罪又發陰私竊盜咸有次緒

### 長安宣政殿鬼遊事文類聚

長安大明宮宣政殿每夜見數騎衣鮮麗遊其間唐高宗使巫祝劉明奴王湛然問其所由鬼云我是漢楚王戊太子死葬於此明奴等曰按漢書戊與七國反誅死無後焉得有子葬於此鬼曰我當時入朝以路遠不從坐後病死天子於此葬我漢書



自有遺誤耳明奴因許與之改葬鬼喜曰我昔日亦是近屬今在天子宮內出入不安改卜經滿幸甚今在殿東北入地丈餘我死時天子斂我玉魚一雙今猶未朽必以此相送勿見奪也明奴以事奏聞有勅改葬死外及發掘玉魚宛然見在以此其事遂絕

宗元見羅池唐書

柳宗元唐憲宗時為柳州刺史宗元既沒柳人懷之託言降于州之堂人有慢者輒死廟於羅池韓愈因碑以實之

### 陰助

偶有陰靈之助者

糜竺寄載緩火蜀書

糜竺祖世貨殖僮客萬人皆產鉅億竺嘗從涼歸未達家數十

里路傍見一婦人從竺求寄載便也往燒東海糜竺家感君見不可得不燒如此君可馳去我

行可數里婦謝去謂竺曰我天田緩行日中火當發竺乃還家

宜黃侯龍見致勝 兩史

宜黃侯慧紀字元方武帝之後孫也涉獵書史陳後主禎明三年隋師濟江慧紀率將士三萬八船艦千餘乘沿江而下欲趣臺城遣南康太守呂肅將兵據一峽以五條鐵鎖橫江肅竭其私財以充軍用隋將楊素奮兵擊之四十餘戰爭馬鞍山及磨刀澗守險隋軍死者五千餘人肅以人盡取其鼻以求功賞既而隋軍屢獲陳之士三縱之肅以道保延洲別帥糜世寵領大舫詐降欲燒隋艦更決死一戰世是有五黃龍備衆色各長十



餘丈驛之連發順流而東風浪益起雲霧晦冥陳人震駭不覺  
火自焚時軍乘高船張大弩以射之陳軍大敗風浪應時頓息  
肅收餘衆東走

穆崇隨狼走免難之史

魏道武澤。出難遣穆崇還察。八心崇留馬與從者微服入其  
營會。有火。為春麥所識。賊皆散。馬起。崇求從者不得。因匿院中。  
徐乃。捕。未宿於大澤。有白狼向崇號。崇覺。悟。馳隨。狼奔。遂  
免。道武異之。命崇立祀。子孫世奉焉。

秦彥自破得脫唐書

秦彥本名立。隸伍籍。僖宗乾符中。以盜繫獄。且死。夢諱曰。秦彥  
而從我去。寤而視。械破。因得亡命。即更名彥。聚徒百。入殺下邳。  
令取其貫入黃巢黨中。既敗。與許勳降高。累表。和州刺史中。

初宣歙觀察使竇滂病彥襲而代之

温琪數獲不死五代史

温琪身長七尺少從黃巢為盜巢敗温琪走滑州顧其狀貌  
魁偉懼不自容乃投白馬河流數十里不死河上人援而出之  
入自經于桑林桑輒枝折乃之昨縣有田父見之曰子狀貌堂  
堂非常人也乃匿于其家後事梁累有戰功附晉累官至左驍  
衛上將軍

李克用禱馬五代史

李克用唐昭宗大順二年拜河東節度使隴西郡王加檢校太  
師兼中書令攻王鎔于鎮州柵常山西以十餘騎渡滹沱覘敵  
遇大雨平地水深數尺鎮人驚之克用匿林中禱其馬曰吾世  
有太原者馬不嘶馬偶不嘶以免



全斌漂舟泊岸宋史

耿全斌父顯懷順軍校全斌少壯偉顯携謁陳搏搏謂有藩侯相類戍西蜀全斌往省乘舟浙江夜大風失纜漂七十里至曙風未止舟忽泊岸人頗異之太皇太后即位補東班承旨

陶弼見溪龍闕宋史

陶弼字商翁少微儻放宕吳中行山間有雙鯉戲溪水上竚觀之傍一老父顧曰此龍也行且門君宜亟去去百步許雷大震而兩岸泥土拔又出大雲令卒遇風暴怒二十七艘同時溺獨弼舟行濟人以此異之宋仁宗時官至東上閣門使

李顯忠立薦宋史

李顯忠名世輔南歸宋賜名顯忠由唐以來世韻蘇尾九族巡檢初其母當產數日不產免有僧過門曰所孕乃奇男子當

以劍矢冥母旁即生已而米生顯忠立於薦咸異之

楚鼎漂海遇船元史

楚鼎元世祖時始受符印十八年東征日本鼎率千餘人從左丞范文虎渡海大風忽至舟壞鼎挾破舟板漂流三晝夜至一山會文虎船因得達高懸之金州合浦海屯駐散兵亦漂泛來集遂領之以歸

感物

以人偶感於物有異者

孫堅因馬還營得救事文類聚

孫堅討董卓失利被創墮馬卧草中軍衆分散馬還營嗚呼軍人隨馬向草中乃得堅扶還營

陸士衡黃耳致書晉書



陸機字士衡吳王晏出鎮淮南以機為郎中令晉惠帝時趙王倫輔政以機為相國參軍倫將篡位以機為中書郎倫誅齊王問疑機與謀遂收機吳王安救理之遇赦而止初機有駿犬名曰黃耳甚愛之既而羈宦京師久無家問笑語犬曰我家絕無書信汝能齎書取消息不犬搖尾作聲機乃為書以竹筒盛之而繫其頸犬尋路南走遂至其家得報還洛其後因以為常

楊生犬數救死事文類聚

晉廢帝太和中楊生養狗甚愛之後生飲酒行大澤草中眠時冬月野火起風又猛狗號喚生不覺前有一坑水狗便走往水中還以身洒生左右草沾水得着地火尋過去生醒方見他日又循行墮下空井中狗呻吟徹曉有人過怪之往視見生空曰君可出我當厚報君人曰以此狗相與便當相出生曰此狗嘗

活我於已死不得相與餘即無惜人曰若爾便不相出狗因不頭向井生知其意乃語路人以狗相與人乃出之繫狗而去後五日狗夜走歸

慕容廆因馬上難晉書

燕王慕容廆有駿馬曰赭白有奇相逸力石季龍之伐棘城也玃將出避難欲乘之馬悲鳴躡齧人莫能近玃曰此馬兒異先朝孤常仗之濟難今不欲者蓋先君之意乎乃止季龍尋退玃益奇之至是四十九歲矣而駿逸不虧子雋比之於鮑氏駟命鑄銅以圖其象親為銘贊雋勒其傍置之薊城東掖門是歲象成而馬死

昌寓養鵠南史

謝昌寓齊高帝時為劉悛廣州參軍孝性甚至嘗養一鵠昌寓



病二旬而鵠二旬不食昌寓亡而鵠遂飛去

何胤鹿鶴來馴南史

何胤字子季梁武帝詔為特進光祿大夫不就胤常禁殺有虞人逐鹿鹿往來趨胤伏而不動又有異鳥如鶴紅色集講堂馴狎如家禽

張彪犬黃蒼觀主南史

張彪為東揚州刺史并給鼓吹晝夜樂聲不息刻令王懷之不從彪自征之留長史謝岐居守時陳文帝已據震澤將及會稽彪乃遣沈泰吳寶真還州助岐保城彪後至泰等反與岐迎陳文帝入城彪因其未定踰城而入陳文帝遂走出彪復城守沈泰說陳文帝曰彪部曲家口並在香巖寺可往收取遂往盡獲之張彪將申進密與泰相知曰又叛彪復敗走不敢還會稽

據城之西山樓子及暗得與弟崑崙妻楊氏去猶左右數人追隨彪疑之皆發遣唯常所養一犬名黃蒼在彪前後未曾捨離乃還入若邪山中沈泰說文帝遣章昭達領千兵重購之并圖其妻彪眠未覺黃蒼警吠劫來便啣一人中喉即死彪拔刀遂之映火識之曰何忍舉惡卿須我者但可魚頭誓不生見呼妻與訣曰生死從此而別若見沈泰申進等為語曰功名未立猶望鬼道相逢却不能生得遂殺彪并弟致二首於昭達黃蒼號呼彪屍側死轉血中有若哀狀陳文帝遣章昭達進軍迎彪妻便拜稱文帝教迎為家主彪妻楊便改啼為笑欣然意悅請昭達殯彪喪墳冢既畢黃蒼又俯伏冢間號叫不肯離而妻楊氏即割髮毀面慟絕誓不行接於井文帝遣軍人出之垂死以火燎濕復投火死



洪進齋前集鶴宋史

陳洪進泉州人後晉出帝開運元年漳州殺程贊迎延政從子繼成為刺史延政遂遣洪進歸泉州三年延政入江南洪進在泉州日方晝有蒼鶴翔集內齋前引吭向洪進洪進視之有魚鯁其喉即以手探取之魚猶活鶴馴擾齋中數日而後去人皆異之

狗報主昨奴頭事文類聚

會稽勾章民張然滯役在都經年不得歸家有少婦遂與奴私通然在都養一狗甚快名烏龍後假歸奴與婦謀欲得殺然然及妻作飯食共坐下食未得噉奴當戶倚張弓括箭拔刀然以盤中肉飯與狗狗不取唯注睛舐脣視奴然亦覺之奴催食轉急然決計拍髀大喚曰烏龍狗應聲傷奴奴失刀伏倒地狗咋

奴頭然因取刀斬奴以婦付官殺之

鵝聽講經事文類聚

淨影寺沙門慧遠講經初在鄉養一鵝常隨遠聽經及遠入京留在寺晝夜鳴噪不止僧徒送入京至此寺大門放之自然知遠房便入馴狎每聞講鐘即入堂伏聽若聞泛說他事則鳴翔而出如是六年忽哀叫庭宇不肯入堂二旬而遠卒寺內有遠碑亦述其事

怪誕怪異妄誕者

子楊聚衆晉書

晉成帝咸康中石季龍據襄國為趙天王時趙境內有安定人侯子光弱冠美姿儀自稱佛太子從大秦國來當王小秦國易



姓名為李子楊游于鄆縣爰赤眉家頗見其妖狀事微有驗赤眉信敬之妻以二女轉相扇惑京兆樊經竺龍嚴謀謝樂子等聚眾數千人於杜南山子楊稱大黃帝建元曰龍興赤眉與經為左右丞相龍謀為左右大司馬樂子為大將軍鎮西石廣擊斬之子楊頌無血十餘日而面色無異於生

梁武時張張之謠南史

梁武帝天監十三年六月都下訛言有張樵取人肝肺及血以飴天狗百姓大懼二旬而止

### 精爽

有精靈英爽駭人者

荀偃視不可含左傳

魯襄公十九年晉侯伐齊先歸魯襄公其立日六卿于蒲圃而荀

偃瘳疽生瘍於頭濟河及著雍病目出大夫先歸者皆反士旬請見弟內請後曰鄭甥可二月甲寅卒而視不可含宣子盥而撫之曰事吳敢不如事主猶視藥懷子曰其為未卒事於齊故也乎乃復撫之曰主苟終所不嗣事于齊者有如河乃瞑受含宣子出曰吾淺之為丈夫也

李瞻剗腹言笑自若南史

梁簡文帝時李瞻起兵為賊所執送詣建鄴侯景先出之市中斷其手足剗析心腹破出肝腸瞻正色整容言笑自若見其膽如升焉

慕容恃德停柩易馬北史

盧潛雅性貞固齊文宣時除揚州刺史領行臺尚書祖璉常要潛陷仁州刺史劉逖許以高位潛曰如此事吾不為也行臺慕



容恃德常所推重有疾謂其子曰盧尚書教我為人有如昆弟  
我死特上駢馬與之其子以他馬往恃德柩出門自停不可動  
巫祝以為恃德聲怒曰何不與盧尚書我所騎駢馬其子遽奉  
命柩乃行潛以馬價為營福事其為時重如此

建寧王喪輜不動唐書

代宗大曆三年建寧王倓喪於彭原既至城門喪輜不動帝謂  
李泌曰豈有恨邪卿往祭之以白朕意且卿及知倓艱難定策  
者必為挽詞二解追述倓志命挽士唱泌因進酌輜乃行觀者  
皆為垂泣

# 凶年

異常荒歉之歲

關中斛米萬錢晉書

晉惠帝永平七年關中饑米斛萬錢詔骨肉相賣者不禁

飢民鳥面鵠形南史

梁武帝大寶元年時江南大飢江揚彌甚旱蝗相係年穀不登  
百姓流亡死者塗地父子攜手共入江湖或弟兄相要俱緣山  
岳芟實荇花所在皆罄草根木葉為之凋殘雖假命須臾亦終  
死山澤其絕粒久者鳥面鵠形俯伏林帷不出戶牖者莫不衣  
羅綺懷金玉交相枕藉待命聽終於是千里絕烟人跡罕見白  
骨成聚如丘隴焉



群書集事淵海卷之四十七

夷狄門

裔族

夷狄之苗裔世族

西羌出三苗之裔後漢

西羌之本出自三苗姜姓之別也其國近南嶽及舜流四凶徙之三危河關之西南羌地是也濱於賜支至平河首縣地千里賜支者禹貢所謂析支者也南接蜀漢徼外蠻夷西北鄰善車師諸國所居無常依隨水草地少五穀以產牧為業其俗氏族無定或以父名母姓為種號十二世後相與婚姻父沒則妻後



異兄亡則納嫠嫂故國無鰥寡種類繁熾不立君臣無相長一強則分種為首豪弱則為人附落更相抄暴以力為雄殺人償死無它禁令其兵長在山谷短於平地不能持久而果於觸突以戰死為吉利病終為不祥堪耐寒苦同之禽獸雖婦人產子亦不避風雪性堅剛勇猛得西方金行之氣焉

羌人爰劔為豪後漢

羌無弋爰劔者為秦厲公所執以為奴隸後得亡歸而秦人追之急藏於巖穴秦人焚之有景象如虎為其蔽火得以不死既出又與劔女遇於野遂成夫婦女恥其狀被髮覆面羌人因以為俗遂俱亡入三河間諸羌見其神怪共畏事之推以為豪河湟間少五穀多禽獸以射獵為事爰劔教之田畜廬落種人依之者日益衆羌人謂奴為無弋以爰劔嘗為奴隸故因名之其

後世世為豪

巴郡五姓之族後漢

巴郡南郡蠻本有五姓巴氏樊氏暉氏相氏鄭氏皆出於武落鍾離山其山有赤黑二穴巴氏之子生於赤穴四姓之子皆生黑穴未有君長俱事鬼神乃共擲劔於石穴約能中者奉以為君巴氏子務相乃獨中之衆皆歎又令各乘土船約能浮者當以為君餘姓悉沈唯務相獨浮因共立之是為廩君乃乘土船從夷水至鹽陽鹽水有神女謂廩君曰此地廣大魚鹽所出願留共君廩君不許鹽神暮輒來取宿旦即化為蟲與諸蟲群飛掩蔽日光天地晦冥積十餘日廩君思其便因射殺之天乃開明廩君於是君乎夷城四姓皆臣之廩君死魂魄世為白虎巴氏以虎飲人血遂以人祠焉及秦惠王弟巴中以巴氏為蠻夷



君長世尚秦女其民爵比不更

板楯蠻夷之裔 後漢

板楯蠻夷者秦昭襄王時有一白虎常從群虎數遊秦蜀巴漢之境傷害千餘人昭王乃重募國中有能殺虎者賞邑萬家金百鎰時有邑郡閬中夷人能作白竹之弩乃登樓射殺白虎昭王嘉之而以其夷人不欲加封乃刻石盟要復夷人頃田不租十妻不算傷人者論殺人得以賸錢贖死盟曰秦犯夷輸黃龍一雙夷犯秦輸清酒一鍾夷人安之至高祖為漢王發夷人還伐三秦秦地既定乃遣還巴中復其渠帥羅朴督鄂度夕龔七姓不輸租賦餘戶乃歲入實錢口四十世號為板楯蠻夷閬中有渝水其人多居水左右天性勁勇初為漢前鋒數陷陳俗喜歌舞漢高祖觀之曰此武王伐紂之歌也乃命樂人習之所謂

巴渝舞也

西南夷諸國之號 後漢

西南夷者在蜀郡徼外有夜郎國東接交趾西有滇國北有邛都國各立君長其人皆椎結左衽邑聚而居能耕田其外又有嵩昆明諸洛西極同師東北至葉榆地方數千里無君長辨髮隨畜遷徙無常自嵩東北有作都國東北有冉駹國或土著或隨畜遷徙自冉駹東北有白馬國氏種是也此三國亦有君長

夷洲廼徐福採藥之所 後漢

會稽海外有東鯷人分為二十餘國又有夷洲及澶洲傳言秦始皇遣方士徐福將童男女數千人入海求蓬萊神仙不得徐福畏誅不敢還遂止此洲世世相承有數萬家人民時至會稽市會稽東冶縣人有入海行遭風流移至澶洲者所在絕遠不



可往來夷洲在臨海東南去郡二千里土地無霜雪草木不死  
四面是山谿人皆髡髮穿耳女人不穿耳土地饒沃既生五穀  
又多魚肉有犬尾短如麝尾狀此夷舅姑子婦卧息共一大牀  
略不相避地有銅鐵唯用鹿格為矛以戰鬪摩礪青石以作弓  
矢取生魚肉雜貯大瓦器中以鹽鹵之歷月餘日仍噴食之以  
為上肴也

夜郎姓竹後漢

夜郎者初有女子浣於遼水有三節大竹流入足間聞其中有  
號聲剖竹視之得一男兒歸而養之及長之有才武自立為夜  
郎侯以竹為姓觀華陽志武帝平南夷為牂柯郡夜郎侯漢迎降天  
子賜其印綬後遂綏之夷僚咸以竹王非血氣所生求為之後  
牂柯太守吳霸以聞天子乃封其三子為侯死配食其父今夜

郎縣有竹王三郎神是也

西南夷滇王之國後漢

滇王者莊驁之後也漢武帝元封二年武帝平之以其地為益  
州郡割牂柯越嵩各數縣配之後數年復并昆明地皆以屬之  
此郡東池周回二百餘里水源深廣而末更淺狹有似倒流故  
謂之滇池河土平敞多出鸚鵡孔雀有鹽池田漁之饒金銀膏  
產之富人俗豪怙居官者皆富及累世

滇中胡大月氏之別後漢

滇中月氏胡其先大月氏之別也舊在張掖酒泉地月氏王為  
匈奴冒頓所殺餘種分散西踰葱嶺其羸弱者南入山阻依諸  
羌居止遂與共婚姻及漢驃騎將軍霍去病破匈奴取西河地  
開滇中於是月氏來降與漢人錯居雖依附縣官而首施兩端



其從漢兵戰鬪隨執強弱被服飲食言語略與羌同亦以父名毋姓為種其大種其七勝兵合九千餘人分在湟中反令居又數百戶在張掖號曰義從胡漢靈帝中平元年與北宮伯玉等反殺護羌校尉冷徵金城太守陳懿遂寇亂隴右焉

槃瓠犬種後漢

南蠻者昔高辛氏有犬戎之寇帝患其侵暴乃募天下有能得犬戎吳將軍頭者購黃金千鎰邑萬家妻以女時帝有五色毛狗曰槃瓠魏略曰高辛氏有老婦居王室得耳疾挑之乃得物人感發中覆之以槃瓠項化為犬其文五色因名下令之後槃瓠遂銜人頭造闕衆怪而診之乃吳將軍首帝喜而計槃瓠不可妻以女又無封爵之道欲報而未知所宜女謂帝下令不可遵信因請行不得已乃以女配之槃瓠負女走入南山石室中險絕人跡不至辰州盧於是女解去衣

裳為僕鑿之結著獨力之衣帝悲思之遣使以尋求輒遇風雨晦不得進後生六男六女其後因自相夫妻織績木皮好染五色衣服製裁皆有尾形其母後歸以狀白帝於是使致諸子衣裳班蘭語言侏離好入山壑帝賜以名山唐澤號口蠻夷今長沙武陵蠻是也

吐谷渾分立西夷晉書

西戎吐谷渾慕容廆之庶長兄也其父涉即分部落一千七百家以隸之及涉歸卒廆嗣位而二部馬鬪廆怒曰先公分建有別柰何不相遠離而令馬鬪吐谷渾曰馬為畜耳鬪其常性何怒於人乖別甚異當去汝於萬里之外矣於是遂行廆悔之遣其長史史那樓馮及父時耆舊追還之吐谷渾曰先公稱卜筮之言當有二子克昌祚流後裔我卑庶也理無並大今因馬而



別殆天所啓乎諸君試驅馬令東馬若還車不我當相隨去矣樓  
馮遣從者二千騎擁馬東出數百步輒悲嗷而西走如是者十餘  
輩樓馮跪而言曰此非人事也遂止

吐谷渾葉延尊祖晉書

吐谷渾氏葉延性沉毅好問天地造化帝王年曆司馬薄洛鄰  
曰臣等不學實未審三皇何父之子五帝誰母所生延曰自羲  
皇以來符命玄象昭言著見而卿等面牆何其鄙哉語曰夏蟲  
不知冬冰良不虛也又曰禮云公孫之子得以王父字為氏吾  
祖始自昌黎光宅於此今以吐谷渾為氏尊祖之義也

侏儒國人長四尺

侏儒國人長四尺又南有黑齒國裸國去倭四千餘里船行可  
一年至又西南萬里有海人身黑眼白裸而醜其肉美行者或

射而食之

久閭氏後為蠕蠕

蠕蠕姓郁久閭氏始神元之末掠騎有得一奴髮始齊眉忘本  
姓名其主字之曰木骨閭木骨閭者首秃也木骨閭與郁久閭  
聲相近故後子孫因以為氏木骨閭既壯免奴為騎卒穆帝時  
坐後期當斬亡匿廣漠谷間收合逋逃得百餘人依純突隣  
部木骨閭死子車鹿會雄健始有部衆自號柔然後魏太武以  
其無知狀類於虫改其號為蠕蠕

高句麗立國

高句麗其先出夫餘王嘗得河伯女因閉於室內為日所照引  
身避之日影又逐既而有孕生一卵大如五升夫餘王棄之與  
犬犬不食與豕豕不食棄於路牛馬避之棄於野衆鳥以毛茹



之王剖之不能破遂還其母母以物裹置暖處有一男破而出  
及長字之曰朱蒙其俗言朱蒙者善射也夫餘人以朱蒙非人  
所生請除之王不聽命之養馬朱蒙私試知有善惡駿者減食  
令瘦鶩者善養令肥夫餘王以肥者自乘以瘦者給朱蒙後狩  
于田以朱蒙善射給之一矢朱蒙雖一矢墮獸甚多夫餘之臣  
又謀殺之其母以告朱蒙朱蒙乃與馬達等二人東南走中道  
遇一大水欲濟無梁夫餘人追之甚急朱蒙告水曰我是日子  
河伯外孫今追兵垂及如何得濟於是魚鼈為之成橋朱蒙得  
度魚鼈乃解追騎不度朱蒙遂至普述水遇見三人一著麻衣  
一著衲衣一著水藻衣與朱蒙至紇升骨城遂居焉號曰高句  
麗因以高為氏

百濟立國 北史

百濟之國蓋馬韓之屬也出自高麗國其王出行其侍兒於  
姪娘王還欲殺之侍兒曰前見天上有氣如大鷄子來降氣  
有娠王捨之後生男王置之豕牢豕以口氣噓之不死後復  
馬闌亦如之王以為神命養之名曰東明及長善射王忌其猛  
復欲殺之東明乃走入走南至淹滯水以弓擊水魚鼈皆為橋東  
明乘之得度至夫餘而王焉初以百家濟因號百濟

日陸眷招誘疆盛 北史

徒何段就陸眷出於遼西其伯祖曰陸眷因亂被賣為漁陽烏  
丸子大庫辱官家奴諸大人集會幽州皆持唾壺唯庫辱官無  
乃唾曰陸眷口中曰陸眷因咽之西向拜天曰願使主君之智  
慧祿相盡移入我腹中其後漁陽大饑庫辱官以日陸眷為健  
使將人詣遼西逐令招誘亡叛遂至疆盛



單于女就狼 北史

高車蓋古赤狄之餘種也初號為狄歷北方以為高車丁零其語略與匈奴同而時有小異或云其先匈奴甥也其種有狄氏素紇氏斛律氏解批氏護骨氏異奇斤氏俗云匈奴單于生二女姿容甚美國人皆以為神單于曰吾此女安可配人將以與天乃於國北無人之地築高臺置二女其上曰請天自迎之經三年其母欲迎之單于曰不可未徹之間耳復一年乃有一老狼晝夜守臺嗥呼因穿臺下為空穴經時不去其小女曰吾父處我於此欲以與天而今狼來或是神物天使之然將下就之其姊驚曰此是畜生無乃辱父母妹不從下為狼妻而產子後遂滋繁成國故其人好引聲長歌又似狼嗥無都統大帥營種各有君長為性應猛黨類同心至於寇難翕然相依闔無行

陣頭別衝突乍出乍入不能堅戰

突厥狼種 北史

突厥本平涼雜胡姓阿史那氏魏太武帝滅沮渠氏阿史那以五百家奔蠕蠕世居金山之陽為蠕蠕鐵工金山形似堯象借號堯登突厥突厥因以為號又曰突厥之先出於索國在匈奴之北其部落大人曰阿誘步兄弟七十人其一曰伊質泥師都狼所生也阿誘步等性並愚癡國遂被滅泥師都既別感異氣能徵占風雨娶二妻云是夏神冬神之女一孕而生四男其一變為白鴻其一國於阿輔水劔水之間號為契骨其一國於處折水其一居跋斯處折施山即其大兒也山上仍有阿誘步種類並多寒露大兒為出火溫養之咸得全濟遂共奉大兒為主號為突厥即納都六設也都六有十妻所生子皆以母族姓



阿史那是其小妻之子也都六死十母子內欲擇立一人乃相率於大樹下共為約曰向樹跳躍能最高者即推立之阿史那子年幼而跳最高諸子遂奉以為主號阿賢設此說雖殊終狼種也

突厥狼毒 北史

突厥者其先居西海之右獨為部落蓋匈奴之別種也姓阿史那氏後為隣國所破盡滅其族有一兒年且十歲兵人見其小不忍殺之乃刖足斷其臂棄草澤中有牝狼以肉餌之及長與狼交合遂有孕焉彼王聞此兒尚在重遣殺之使山見在狼側并欲殺狼於時若有神物投狼於西海之東落高昌國西北山山有洞穴穴內有干壤茂草周迴數百里四面俱山狼匿其中遂生十男十男長外託妻孕其後各為一姓阿史那即其一也

北賢遂為君長故牙門建狼頭纛示不忘本也

北狗國男狗女人 五代史

北狗國人身狗首長毛不衣手搏猛獸語為犬嗥其妻皆人能漢語生男為狗女為人自相婚嫁穴居食生而妻女人食云嘗有中國人至其國其妻憐之使逃歸與其筋十餘隻教其每走十餘里遺一筋狗夫追之見其家物必銜而歸則不能追矣其說如此

匈奴諸部 五代史

奚本匈奴之別種當唐之末居陰涼川在管州之西幽州之西南皆數百里有人馬二萬騎分為五部一曰阿耨耆部二曰啜米部三曰粵質部四曰奴皆部五曰墨訖支部後徙居琵琶川在幽州東北數百里地多黑羊馬趨前蹄堅善走其登山逐獸下上



如飛

的斤祖系至傳交州元史

玉倫的斤祖名不可罕無父母乃樹癭中生土一人養既長尊為君傳至的斤三十餘君矣嘗數與唐人相攻戰久之議和親以息民罷兵於是唐以金蓮公主妻的斤之子苴可勵的斤居和林其地有山曰天哥里于答哈言天靈山也南有石山曰胡力答哈言福山也唐使與相地者至其國曰和林之盛疆以有此山也盡壞其山以弱其國乃告諸的斤曰既為婚姻將有求於爾其與之乎福山之石於上國無所用而唐人願以見之斤遂與之石大不能動唐人以烈火焚之沃以醲醋其石碎乃輦而去國中鳥獸為之悲號後七日玉倫的斤卒災異屢見民弗安居傳位者又數亡乃遷於交州

高昌國主樹癭而生元史

巴而朮阿而忒的斤亦都護亦都護者高昌國主號也先世居畏兀兒之地有和林山二水出焉曰禿忽刺曰薛靈哥一夕有神光降于樹在兩河之間人即其所而候之樹乃生癭若懷妊狀自是光常見越九月又十日而樹癭裂得嬰兒者五土人收養之其最稚者曰不可罕既壯遂能有其民人土田而為之君長

### 異相

夷狄人有奇異生相者

龍伯國長人有壽事文類聚

龍伯國人長三十丈生萬八千歲而死



高壽

夷狄有高年者

鮮卑老奴魏書

并州刺史畢軌送漢故度遼將軍范明友鮮卑奴年三百五十  
歲言語飲食如常人時京邑有一人失其姓名食啖無十許人  
彼縣令故舊傳供食之一二年中一鄉中輒為之  
事不知也視其家上樹木可三十歲不知此婦人三十歲常  
於地中邪將一朝欬生偶與發冢者會也

遜讓

夷狄有能讓立者

突厥叔姪讓立北史

隋文帝時突厥匈奴沙鉢略卒初攝國以其子雍虞閭性驍遠  
今立其弟蘇護處羅侯雍虞閭遣使迎處羅侯將立之處羅侯

曰我突厥自木杆可汗來多以弟代兄以庶奪嫡失先祖之法  
不相敬畏汝當嗣位我不憚拜汝也雍虞閭又遣使謂處羅侯  
曰叔與我父共根連體我是枝葉寧有我作主今根本反同枝  
葉願叔勿疑相讓者五六處羅侯竟立是為葉護

忠義

盡忠合義於本國者

渾邪蘇尼失俱死唐書

唐太宗貞觀八年頡利死贈歸義王諡曰荒詔國人葬之從其  
禮火尸起冢灞東其臣胡祿達官吐谷渾邪者頡利母婆施之  
媵臣也頡利始生以授渾邪至是哀慟乃自殺帝異之贈中郎  
將命葬頡利冢旁詔中書侍郎岑文本刻其事于頡利渾邪之  
墓碑俄蘇尼失亦以死殉



# 孝行

夷狄能孝父母者

吐谷渾視連絕遊田 晉書

西戎吐谷渾辟奚死世子視連既立通聘於乞伏乾歸乾歸拜為白蘭王幼庶慎有志性以父憂卒不知政事不飲酒遊田七年矣鍾慈地進曰明公奕葉重光恩結西夏雖仁孝發於天然猶宜憲章周孔不可獨追徐偃之仁使刑德委而不建視連泣曰先王追友于之痛悲憤升遐孤雖纂業尸存而已聲色遊娛豈所安也綱維刑禮行之將來臨終謂其子視羆曰我高祖吐谷渾公常言子孫必有興者永為中國之西藩慶流百世吾已不及汝亦不見當在汝之子孫輩耳

葉延縛草報父讎 北史

吐谷渾吐延被羌首姜聰所殺有子十二人葉延少而勇果年十歲縛草為人號曰姜聰每旦輒射之射中則嗥叫泣涕其母曰讎賊諸將已屠膾之汝年小何煩朝朝自苦葉延嗚咽若不自勝吞母曰誠知無益然罔極之心不勝其痛性至孝母病母三日不食葉延亦不食頗視書傳自謂曾祖奕洛韓始封昌黎公吾為公孫之子按禮公孫之子得以王父字為氏遂以吐谷渾為氏焉

視連絕宴 北史

吐谷渾葉延死子碎奚立性淳謹三弟專權碎奚不能制諸大將共誅之奚憂哀不復攝事遂立子視連為世子委之事號曰莫賀郎華言父也奚遂以憂死視連立以父憂思不遊娛酣宴十五年



羅支天稟仁孝唐書

頡利可汗子疊羅支有至性既舍京師諸婦得品供羅支預焉其母最後至不得給羅支不敢嘗品肉太宗聞而嘆曰天稟仁孝詎限華夷哉厚賜之遂給母肉

### 友愛

夷狄友愛於弟者

辟奚思弟晉書

辟奚西夷之君也素友愛三弟既誅因恍惚成疾謂世子視連曰吾禍滅同生何以見之於地下國事大小汝宜攝之吾餘年殘命寄食而已遂以愛卒

### 事中國

能服事中國者

阿豺歸命北史

吐谷渾阿豺立自號驃騎將軍沙州刺史部內有黃沙周迴數百里不生草木因號沙州阿豺兼并氐羌地方數千里號為強國昇西強山觀墊江源問於群寮曰此水東流更有何名由何郡國入何水也其長史曹和曰此水經仇地過晉壽出宕渠始號墊江至巴郡入江度廣陵入於海阿豺曰水尚知歸吾雖塞表小國而獨無所歸乎遣使通宋獻其方物宋少帝封為澆河公

高昌來貢宋史

高昌國漢車師前王之地有高昌城取其地勢高敵人民昌盛以為名焉後魏初沮渠無諱自署高昌太守無諱死茹茹以闕伯周為高昌王高昌有王始於此後魏至隋皆來貢獻

回鶻入貢宋史



回鶻本匈奴之別裔在天德西北娑陵水上後魏號鐵勒唐初號特勒後稱回紇其君長曰可汗自貞觀以後朝貢不絕

大食朝貢 宋史

大食國本波斯之別種隋大業中波斯有桀黠者探穴得文石以為瑞乃糾合其衆剽略資貨聚徒浸盛遂自立為王據有波斯國之西境唐永徽以後屢來朝

龜茲朝貢 宋史

龜茲本回鶻別種其國主自稱師子王衣黃衣寶冠與宰相九人同治國事國城有市井而無錢貨以花綵布博易有米麥瓜果西至大食國行六十日東至夏州九十日或稱西州回鶻或稱西州龜茲又稱龜茲回鶻自天聖至景祐四年入貢者五

# 內附

能附於中國者

賢粟舉衆來附 後漢

哀牢夷者建武二十三年其王賢粟遣兵乘單舩南下江漢擊

附塞夷鹿多

音多其種今見在

鹿多人弱為所禽獲於是震雷疾雨南

風飄起水為逆流鬪涌二百餘里單船沈沒哀牢之衆溺死數

千人賢粟復遣其六王將萬人以攻鹿多鹿多王與戰殺其六

王哀牢耆老共埋六王夜虎復出其尸而食之餘衆驚怖引去

賢粟惶恐謂其耆老曰我曹入邊塞自古有之今攻鹿多輒被

天誅中國其有聖帝乎天祐助之何其明也二十七年賢粟等

遂率種人戶二千七百七十口萬七千六百五十九詣越巂太

守鄭鴻降求內屬光武封賢粟等為君長自是歲來朝貢



沙州本漢燉煌故地唐天寶末陷于西戎唐宣宗大中五年張義潮以州歸順

渤海來降宋史

渤海本高麗之別種唐高宗平高麗徙其人居中國則天萬歲通天中契丹攻陷營府有高麗別種大祚榮走保遼東睿宗以為急汗州都督封渤海郡王因自稱渤海國併有扶餘肅慎等十餘國歷唐梁後唐朝貢不絕後唐天成初為契丹阿保機攻扶餘城下之改扶餘為東丹府命其子突欲留兵鎮之阿保機死渤海王復攻扶餘不能克歷長興清泰遣使朝貢周顯德初其酋豪崔烏斯等三十人來歸其後隔絕不能通中國太平興國四年太宗平晉陽移兵幽州其酋帥大鸞河率小校李勳等

十六人部族三百騎來降

詣闕陳樂宋史

西南諸夷國王太宗至道元年其王龍漢瑋遣其使龍光進率西南牂牁諸蠻來貢方物太宗召見其使詢以地里風俗譯對曰地去宜州陸行四十五日土宜五穀多種秧稻以木弩射鵞鹿充食每三二百戶為一州州有長殺人者不償死出家財以贖國王居有城郭無壁壘官府惟短垣光進之說與前書所記小異故并叙之上因令作本國歌舞一人吹瓢笙如蚊蚋聲良久數十輩連袂死轉而舞以足頓地為節詢其曲則名曰水曲其使十數輩從者千餘人皆蓬髮面目黧黑狀如猿猴使者衣虎皮氈裘以虎尾插首為飾詔授漢瑋寧遠大將軍封歸化王

蒙漢誠詣闕貢獻宋史



蠻夷撫水州其首皆蒙姓雖有畬田收穀粟甚少但以藥箭射生取鳥獸盡即徙他處太宗雍熙中數寇邊境掠取民口畜產詔書招安補其首蒙令地殿直蒙令札奉職咸平中又數為寇盜止令邊臣驅逐出境其黨狡獪者凡三十餘人宜州守將因擒送闕下上召見詰責之對曰臣等蠻陬小民為飢寒所迫耳上顧謂左右曰昨不欲盡令殺戮顧無噍類矣因釋罪賜錦袍冠帶銀綵戒勗遣之逾年酋長蒙頂等六十五人詣闕納器甲百七十事又蒙漢誠蒙虔瑋蒙填來朝上器甲數百及毒藥箭誓不搔邊比歲皆遣使來貢及輸兵器乃授漢誠官賜物有差

廣州夷族來歸宋史

占誠太宗雍熙四年秋廣州上言雷恩州關送占城夷人斯當李娘并其族一百五十人來歸分隸南海清遠縣

占城夷人來附宋史

占城太宗端拱元年廣州又言占城夷人忽宣等族三百一人來附

大理慕義人貢宋史

大理國即唐南詔也神宗熙寧九年遣使貢金裝碧玕山氈罽刀劍犀皮甲鞍轡自後不常來亦不領於鴻臚徽宗政和五年廣州觀察使黃璘奏南詔大理國慕義懷徠願為臣妾欲聽其入貢詔璘置局於賓州

上書 夷狄致書於中國者

南越王上書求援史記

閩越王興兵擊南越邊邑胡使人上書曰兩越俱為藩臣毋得



擅興兵相攻擊今聞越興兵侵臣臣不敢興兵唯天子詔之於是天子多南越義守職約為興師遣兩將軍往討閩越兵未踰嶺閩越王弟餘善殺郢以降於是罷兵天子使莊助往諭意南越王胡頓首曰天子乃為臣興兵討閩越死無以報德遣太子嬰齊入宿衛

交州黎桓獻俘宋史

交州黎桓太宗太平興國六年上言欲以占城俘九十三人獻于京師太宗令廣州止其俘存撫之給衣服資糧遣還占城詔諭其王

### 獻方物

以本國產物獻于中國者

越裳獻白雉事文類聚

周成王時越裳獻白雉去京師三萬里及漢平帝元始元年越裳重譯獻白雉一黑雉二詔使三公為宗廟

西戎獻劔刀事文類聚

周穆王征西戎獻昆吾之劔亦刀切玉如切泥

時渠國貢火齊鏡事文類聚

周穆王時渠國貢火齊鏡廣三尺六寸暗中視如畫人向鏡中語則鏡中響應之

粵王佗奉貢職前漢

文帝元年南粵王趙佗因使者獻白璧一雙翠鳥千犀角十玃具五百桂蠹一器生翠四十雙孔翠二雙

大宛國歲獻天馬前漢

大宛國王蟬封與漢武帝約歲獻天馬二匹



大宛國  
鄯支國貢馬肝石 事文類聚

漢武帝元鼎間鄯支國貢馬肝石百升以之拭髮白者皆黑帝坐群臣於甘泉殿有髮白以此拭之應手皆黑是時公卿語曰不願方伯惟願拭肝石

烏孫大宛獻神馬 史記

武帝時烏孫使使獻馬願得尚漢女翁主為昆弟天子問群臣議計皆曰必先納聘然後乃遣女初天子發書易云神馬當從西北來得烏孫馬好名曰天馬及得大宛汗血馬益壯更名烏孫馬曰西極名大宛馬曰天馬

烏孫獻方物 史記

烏孫王以馬千匹聘漢女漢遣宗室女江都翁主往妻烏孫烏孫王昆莫以為右夫人匈奴亦遣女妻昆莫昆莫以為左夫人

昆莫曰我老乃令其孫岑娶翁主烏孫多馬其富人至有四五千匹馬初漢使至安息安息王令將二萬騎迎於東界東界去王都數千里行比至過數十城人民相屬甚多漢使還而後發使隨漢使來觀漢廣大以大烏郊及黎軒善眩人獻于漢

蠻夷獻白雉白兔 後漢

漢光武時十三年九月日南徼外蠻夷獻白雉白兔

肅慎國重譯獻弓矢 魏書

魏陳留王景元三年肅慎國遣使重譯入貢獻其國弓三十張三尺五寸楛矢長一尺八寸石砮三百枝皮骨鐵雜鎧二十領貂皮四百枚

倭國獻白珠生口 雜錦 魏書

魏邵陵厲公時倭國王壹與遣倭大夫率善中郎將掖邪狗等



二十人送政等還因詣臺獻上男女生口三十人貢白珠五千  
孔青大句珠二枚異文雜錦二十四

扶南貢馴象 晉書

扶南國去林邑三千餘里武帝泰始初遣使貢獻太康中又頻  
來穆帝升平初復有竺旃檀稱王遣使貢馴象帝以殊方異獸  
恐為人患詔還之

大宛獻汗血馬 晉書

晉武帝泰始六年九月大宛獻汗血馬馬著來貢方物

伏飛智王獻鳩鳥 晉書

穆帝升平二年三月伏飛智王獻鳩鳥帝怒鞭之二百使殿  
中御史焚其鳥於四達之路

大宛獻馬 晉書

秦主苻堅時大宛獻天馬千里駒皆汗血朱鬣五色鳳膺麟身  
及諸珍異五百餘種堅曰吾思漢文之近千里馬咨嗟美詠今  
所獻馬其悉逐之庶克念前王髣髴古人矣乃命群臣作止馬  
詩而遣之示無欲也

師子國獻玉像 南史

師子國天竺旁國也晉安帝義熙初始遣使獻玉像經十載乃  
至像高四尺二寸玉潔潤刑制殊特殆非人工此像歷晉宋  
在瓦官寺先有徵士安道手製佛像五軀及顧長康維摩畫  
圖世人號之三絕至齊東昏遂毀玉像前截臂次取身為嬖妾  
潘貴妃作釵釧

高麗王獻赭白馬 南史

晉安帝義熙九年高麗王璉遣長史高翼奉表獻赭白馬



天竺國獻金環南史

天竺迦毗黎國宋文帝元嘉五年國王月愛遣使奉表獻金剛指環摩勒金環諸寶物赤白鸚鵡各一頭

呵羅國獻金剛指環南史

宋文帝元嘉七年呵羅單國都闍婆洲元嘉七年遣使獻金剛指環赤鸚鵡鳥天竺國白疊古貝葉波國古貝等物

高麗王獻馬南史

高麗王高璉宋文帝元嘉十六年獻馬八百疋孝武大明二年又獻肅慎氏楛矢石弩

婆皇國獻方物四十一種南史

婆皇國宋文帝元嘉二十六年國王舍利婆羅跋摩遣使獻方物四十一種文帝策命之為婆皇國王二十八年復遣使貢獻

孝武孝建三年又遣長

振威將軍大明三年獻赤白鸚鵡

槃槃國獻佛牙畫塔圖南史

槃槃國宋元嘉孝建大明中並遣使貢獻梁中大通元年四

其王使使奉表累送佛牙畫塔并獻沉檀等香數十種六年八

月復遣使送菩提國舍利及畫塔圖并菩提樹葉詹糖等香

鄧至國獻馬南史

鄧至國居西涼州界羌別種也宋文帝時王象居耽遣使獻馬

梁武帝天監元年詔以王象舒彭為督西涼州諸軍事進

號安北將軍五年舒彭遣使獻黃耆四百斤馬四疋

于陀利國獻金芙蓉南史

于陀利國存海南洲上孝武世王釋婆羅那隣隨遣長史竺



留施獻金銀寶器後跋  
七年遣長史毗負跋摩  
本表獻金芙蓉雜香藥等

中天竺國  
獻琉璃唾壺南史

中天竺國梁武帝天監  
初其王屈多遣長史竺羅達奉表獻瑠  
璃唾壺雜香古貝等物

扶南獻珊瑚佛像南史

扶南國跋摩梁武帝天  
監二年遣使送珊瑚佛像并獻方物

天竺獻珊瑚佛像釋氏通鑑

梁武帝天監二年天竺  
國獻梁帝珊瑚佛像

林邑國獻白猴南史

林邑國范文贇子天凱  
梁武帝天監九年奉獻白猴

于闐國獻方物南史

于闐者西域之舊國也梁武帝天監九年始通江左遣使獻方  
物十三年又獻波羅婆步鄣十八年又獻瑠璃鬘

鮮卑獻龍駒南史

鮮卑慕容氏休運籌邊武帝天監十三年遣使獻金裝瑠璃鍾

二口又表於益州立九層佛寺詔許焉十五年又遣使獻赤舞

龍駒及方物其使或歲再三至或再歲一至其地與益州隣常

通尚賈普通元年又奉表獻方物籌死子呵羅真立大通三年

詔以為寧西將軍護羌校尉西秦河二州刺史真死子佛輔襲

爵位其世子又遣使獻白龍駒於皇太子

盤盤國獻佛牙釋氏通鑑

梁武帝天監十四年盤盤國獻帝佛牙

波斯獻佛牙南史



波斯國梁武帝天監十四年遣使獻馬貂裘中大通二年始通江左遣使獻佛牙大同七年又獻馬一疋金一斤

婆利國獻金席南史

婆利國在州東南海中洲上梁武帝天監十六年遣使奉表獻金席等普通三年其王頻伽復遣使珠智獻白鸚鵡青蟲玳瑁瑠璃器古貝螺杯雜香樂等數十種

扶南獻瑞像等物南史

扶南國留陀跋摩梁武帝天監十八年復遣使送天竺旃檀瑞像婆羅樹葉并獻火齊珠鬱金蘇合等香普通元年中大通二年大同九年累遣使獻刀物五年復遣使獻生犀

滑國獻黃獅子南史

滑國者車師之別種也梁武帝普通元年遣使獻黃獅子白貂

裘波斯錦等物

扶南獻旃檀像釋氏通鑑

梁武帝普通元年扶南國獻旃檀瑞像

扶南國進異物南史

扶南國梁武帝普通元年至大同九年時累遣使獻方物又獻生犀其國有佛髮長一丈二尺詔遣沙門釋雲寶隨使往迎之先是三年八月武帝改造阿育王佛塔出舊塔下舍利及佛爪髮髮青紺色衆僧以手伸之隨手長短放之則旋屈為蟲形

丹丹國獻牙像火齊珠南史

丹丹國梁武帝中大通二年其王遣使奉表送牙像及畫塔二軀并獻火齊珠古貝雜香藥大同元年復遣使獻金銀瑠璃雜寶香藥等物



高昌國獻鳴鹽枕南史

高昌國麴氏子堅梁武帝大同中子堅遣使獻鳴鹽枕蒲桃良馬毳毼等物

浮鵠山女人進紅席南史

梁武帝時海中浮鵠山去餘姚岸可千餘里上有女人年三百歲有女官道士四五百人年並出百但在山學道遣使獻紅席帝捨身時其使適至云此草常有紅鳥居下故以為名觀其鳥狀則鸞鳥也

于闐獻玉佛像釋氏通鑑

梁武帝大同七年于闐國獻玉佛像一身

盤盤國獻馴象南史

梁簡文帝大寶二年九月盤盤國獻馴象

慕利延等遣使進獻北史

慕利延吐谷渾之後也魏太武討之於白蘭慕利延遣使通突承後獻烏九帽女國金酒器胡王金釧等物宋文帝賜以車馬

七年遂還舊土慕利延死樹洛干干拾寅立拾寅自恃嶮遠頗不恭命通使于宋獻善馬四角羊宋明帝加之官號

頰盾國獻獅子北史

魏太武帝太平真君十一年十一月頰盾國獻獅子一

洛那國獻馬劍北史

魏文成帝和平六年夏四月破洛那國獻汗血馬普嵐國獻寶劍

疏勒送袈裟北史

疏勒國在姑默西白山南百餘里魏文成末其王遣使送釋迦牟



尼佛袈裟一長二丈餘帝以審是佛衣應有靈異遂燒之以驗  
虛實置於猛火之上經日不然觀者莫不悚駭人手足皆六指  
產子非六指者即不育

波斯獻馴象 北史

魏獻文帝遣使者韓羊皮使波斯波斯王遣使獻馴象及珍物  
經于闐于闐中于王秋仁稱留之假言慮有寇不達羊皮言狀  
帝怒又遣羊皮奉詔責讓之自後每使朝貢周武帝建德二年  
其王遣使獻名馬

洛邠獻馬 北史

洛邠國故大宛國也魏孝文帝太和三年遣使獻汗血馬

高車獻金銀鞍馬 北史

高車蓋古赤狄之餘種也彌俄突既立復遣使貢又奉表獻金

方一銀方一金杖二馬七匹馳十頭詔使者慕容坦賜彌俄突  
雜彩六十匹魏宣武詔之曰卿遠據沙外頻申誠款覽揖忠志  
特所欽嘉後又遣使獻龍馬五匹金銀貂皮及諸方物

伏連籌獻犛牛蜀馬 北史

伏連籌吐谷渾之後也魏宣武世至于正光犛牛蜀馬及西南  
之珍無歲不至

南天竺獻馬 北史

南天竺國去代三萬一千五百里魏宣武時其國王婆羅化遣  
使獻駿馬金銀

嚧達貢獅子 北史

嚧達國大月氏之種類也魏孝明帝正光末遣貢獅子一  
獻達國獻獅子 北史



魏孝莊帝永安三年六月戊午噉達國獻獅子一

夸呂獻能舞馬 北史

夸呂自號為可汗西魏文帝大統初周文遣儀同潘濬喻以逆順之理於是夸呂再遣使獻能舞馬及羊牛等

白蘭獻甲鎧 北史

白蘭者羌之別種也周武帝保定元年遣使獻犀甲鐵鎧

宕昌國獻猛獸 北史

周武帝保定三年三月丙子宕昌國獻生猛獸二詔放之南山

焉耆獻馬 北史

焉耆國在車師南都負渠城白山南七十里周武帝保定四年其王遣使獻名馬

赤土國遣獻金芙蓉冠 北史

赤土國扶南之別種也在南海中水行百餘日而達所都土色多赤因以為號隋煬帝大業一年遣邠邪迦隨貢方物并獻金芙蓉冠龍腦香以鑄金為多羅葉隱起成文以為表金函封之令婆羅門以香花奏蠡鼓而送之

大夏獻方物 唐書

大夏即吐火羅也高祖武德二年遣使者獻寶帶玻璃水精栝

西突厥獻寶馬 唐書

西突厥統葉護可汗高祖時許婚可汗喜遣真珠統俟斤與道立還獻萬釘寶鈿金帶馬五千匹以藉約會

察失利獻白鸚鵡 唐書

察失利太宗時並遣使者入朝獻婆律膏白鸚鵡首有十紅毛齊于翅因丐馬銅鍾帝與之



西屠夷獻方物唐書

西屠夷頭黎太宗貞觀時獻馴象銀鎖五色帶朝霞布火珠

新羅獻女樂唐書

唐太宗貞觀五年新羅王獻女樂二太宗曰比林邑獻鸚鵡言思鄉巧還况於人乎傳使者歸之

康獻方物唐書

康者一曰薩末韃亦曰颯秣建太宗貞觀五年遂請臣帝曰朕與取虛名害百姓且康臣我緩急當同其憂師行萬里寧朕志邪卻不受俄又遣使獻獅子獸帝珍其遠命秘書監虞世南作賦自是歲入貢致金桃銀桃詔令植苑中玄宗開元初貢鎖子鎧水精杯碼碯瓶駝鳥卵及越諾侏儒胡旋女子開元二十二年獻波斯驥二拂菻繡毬一鬱金香石蜜等其妻可敦獻花

碎大繡毬二繡毬一

波斯獻方物唐書

波斯居過水西太宗貞觀十二年遣使者獻活褥蛇狀同鼠色正青長九寸能捕穴鼠貞觀二十一年獻佛土菜莖五葉赤華紫須玄宗開元七年獻獅子五色鸚鵡

拂菻獻赤玻璃唐書

拂菻古大秦也太宗貞觀十七年王波多力遣使獻赤玻璃綠金精下詔答賚

高麗獻姝唐書

唐太宗貞觀二十年春高麗王藏遣使者上方物且謝罪獻二姝口太宗敕還之謂使者曰色者人所重然愍其去親戚以傷乃心我不取也



却頡利獻羊馬唐書

頡利太宗時獻馬三千匹羊萬頭帝不納

日本獻方物碼碯唐書

日本古倭奴也高宗永徽初其王孝德即位改元曰白雉獻虎魄大如斗碼碯若五升器

吐火羅獻方物唐書

吐火羅高宗永徽元年獻大鳥高七尺色黑足類橐駝翅而行日三百里能噉鐵俗謂駝鳥顯慶中又獻碼碯鎧樹高三尺開元天寶間數獻馬驪異藥乾陀婆羅二百品紅碧玻璃

默啜獻馬謝婚唐書

默啜高宗時遣大酋移力貪汗獻馬千匹謝許婚

骨利幹獻良馬唐書

骨利幹處瀚海北產良馬首似橐它筋骼壯大日中馳數百里高宗時入朝詔遣雲麾將軍康蘇密勞答以其地為玄闕州其大酋倭斤因使者獻馬帝取其異者號十驥皆為美名曰騰霜白曰皎雪驄曰凝露驄曰縣光驄曰決波驄曰飛霞驄曰發電赤曰流金駝曰翔麟紫曰奔虹赤厚禮其使

吐蕃獻金寶器唐書

吐蕃弄贊高宗時獻金琲十五種以薦昭陵顯應以三年獻金盃金頗羅等復請婚

龜茲進遊仙枕事文類聚

唐玄宗開元間龜茲進一枕色如瑪瑙枕之則十洲三島四海五湖盡在夢中帝名為遊仙枕

交趾進辟寒犀事文類聚



唐玄宗開元中冬至交阯國進犀角使者請以金盤置於殿中  
温然暖氣襲人曰此辟寒犀也

南詔獻寶器唐書

南詔異牟尋唐德宗時獻鐸鞘浪劍鬱刀生金 瑟瑟牛黃琥珀  
氎紡絲象犀越睽統倫馬鐸鞘者狀如殘刃有刃傍達出雲水  
飾以金所擊無不洞夷人尤寶月以血祭之置可鑄時以毒藥  
并治取迎躍如星者凡十年乃成淬以馬血以金犀飾鐘首傷  
人即死浪人所鑄故亦名浪劍王所佩者傳七世矣

訶陵獻鸚鵡唐書

訶陵憲宗元和八年獻僧祇奴四五色鸚鵡類如鳥等

日本國獻冷暖碁子 事文類聚

日本國王子入貢善奕宣宗令待詔顧師言與之對王子不勝

問曰此第幾手答曰第三手王子嘆曰小國之一不及大國之

三因獻碁局冷暖玉碁子玉性冬則暖夏則冷

高麗貢銅獻書 五代史

高麗國唐明宗長興三年時權知國事王建遣使者來明示乃  
拜建玄菟州都督充大義軍使封高麗國王建高麗大旗也開  
運二年建卒子武立乾祐四年武卒子昭立王氏三世終五代  
常來朝貢其立也必請命中國中國常優答之其地產銅銀周  
世宗時遣尚書水部員外郎韓彥卿以帛數十匹市銅于高麗  
以鑄錢六年昭遣使者貢黃銅五萬斤高麗俗知文字喜讀書  
昭進別叙孝經一卷越王新義八卷皇靈孝經一卷孝經雌圖  
一卷別叙叙孔子所生及弟子事迹越王新義以越王為問目  
若今正義皇靈述延年辟穀雌圖載日食星變皆不經之說



于闐來貢 五代史

于闐國尤遠去京師萬里外其國西南近葱嶺與婆羅門為鄰國而相去猶三千餘里南接吐蕃西北至疎勒二千餘里後晉主石敬瑭天福三年于闐國王李聖天遣使者馬繼榮來貢紅鹽鬱金羖牛尾玉氍等晉遣供奉官張匡鄴假鴻臚卿彰武軍節度判官高居誨為判官冊聖天為大寶于闐國王

于闐獻玉 五代史

于闐其國東南口銀州盧州涇州其南千三百里曰玉州云漢張騫所窮河源出于闐而山多王者此山也其河源所出至于闐分為三東曰白玉河西曰綠玉河又西曰烏玉河三河皆有玉而色異每歲秋水涸國王滂玉于河然後國人得滂玉自靈州渡黃河至于闐往往見吐蕃族帳而于闐常與吐蕃相攻劫

匡鄴等至于闐聖天頗責詰之以邀誓約匡鄴等還聖天又遣都督劉再昇獻玉千斤及玉印降魔杆等漢乾祐元年又遣使者王知鐸來

占城來貢 五代史

占城在西南海上其地方千里東至海西界雲南南鄰真臘北抵驪州其人俗與大食同其乘象馬其食稻米水兕山羊鳥獸之奇犀孔雀自前世未嘗通中國周世宗顯德五年其國王因德漫遣使者蒲訶散來貢猛火油八十四瓶薔薇水十五瓶其表以貝多葉書之以香木為函猛火油以灑物得水則出火薔薇水云得自西域以灑衣雖敝而香不滅

昆明國獻薔薇水 事文類聚

昆明國周世宗顯德五年獻薔薇水十五瓶云得自西域以洒



水衣敵而香不滅

高麗進劍遼史

高麗自有國以來傳次近人民土田歷代各有其志然高麗與遼相為終始二百餘年自太祖皇帝神冊間高麗遣使進寶劍天贊三年來貢

烏隈于厥部貢獻土產遼史

遼聖宗統和六年甲寅烏隈于厥部以歲貢貂鼠青鼠皮非土產皆於他處貿易以獻乞改貢詔自今止進牛馬

日本國入貢宋史

日本國者古倭奴國也自以其國近日所出故以日本為名或云惡其舊名改之也其地東西南北各數千里西南至海東北隅隔以大山山外即毛人國自後漢始朝貢歷魏晉宋隋皆來

貢唐永徽顯慶長安開元天寶上元貞元元和開成中並遣使

入朝雍熙元年日本國僧奝然與其徒五六人浮海而至獻銅

器十餘事并本國職貢今年代紀各一卷太祖時拜表來貢

稱其本國永延二年歲次戊子二月八日實端拱元年也又別

修貢佛經納青木函琥珀青紅白水晶紅黑木櫛子念珠各一

連並納螺鈿花形平函毛籠一納螺杯二葛籠一納法螺二

口漆皮二十枚金銀時繪筥一合納髮鬘二頭又一合納參議

正四位上藤佐理手書二卷及進奉物數一卷表狀一卷又金

銀時繪硯一筥一合納金硯一鹿毛筆松煙墨金銅水瓶鐵刀

又金銀時繪扇筥一合納檜扇二十枚蝙蝠扇二枚螺鈿梳函

一對其一納赤木梳二百七十其一納龍骨十撥螺鈿書案一

螺鈿書几一金銀時繪平筥一合納白細布五疋鹿皮籠一納



貂裘一領螺鈿鞍轡一副銅鐵鎗紅絲鞞泥障倭畫屏風一雙  
石流黃七百斤

吐蕃貢馳馬宋史

吐蕃本漢西羌之地其種落莫知所出或云南涼禿髮利鹿孤  
之後其子孫以禿髮為國號語訛故謂之吐蕃唐貞觀後常來  
朝貢至德後因安史之亂遂陷河西隴右之地太祖建隆二年  
靈武五部以橐駝良馬致貢真宗太中祥符二年其國宰相論  
恐熱以秦原安樂及石門等七關來歸

占城上表入貢宋史

占城太祖建隆二年其王釋利因陀盤遣使蒲訶散來朝表章  
書于貝多葉以香木函盛之貢犀角象牙龍腦香藥孔雀四大  
食瓶二十使迴錫賚有差以器幣優賜其王

于闐貢胡錦琉璃瓶宋史

于闐國自漢至唐皆入貢中國安史之亂絕不復至晉天福中  
其王李聖天自稱唐之宗屬遣使來貢高祖命供奉官張鄴持  
節冊聖天為大寶于闐國王建隆二年十二月聖天遣使貢圭  
一以玉為押玉枕一本國摩尼師貢琉璃瓶二胡錦一段其使  
言本國去京師九千九百里

占城入貢宋史

占城太祖乾德四年其王悉利因陀盤遣使因陀玠李帝婆羅  
貢馴象牯犀象牙白氍毹哥緹越諾王妻波良僕瑁男占謀律秀  
瓊等各貢香藥

定安國入貢宋史

定安國本馬韓之種為契丹所攻破其酋師糾合餘衆保于西



鄒建國改元自稱定之以國太祖開寶三年其國王烈萬華因女  
真遣使入朝乃附表二具獻方物太平興國中太宗方經營遠略  
討擊契丹因降詔其國令張倚角之勢其國亦怨寇讎侵侮不  
已聞中國用兵北討欲依王師以據宿憤得詔大喜六年冬會  
女真遣使來貢

占城貢雌象 宋史

占城太祖開寶三年遣使貢方物雌象

三佛齊入貢 宋史

二佛齊太祖開寶四年遣使李何末以水晶火油來貢五年又  
來貢七年入貢象牙乳香薔薇水萬歲棗扁桃白沙糖水晶指  
環瑠璃瓶珊瑚樹

勃泥奉表入貢 宋史

勃泥國太宗太平興國中其王向打遣使施智使  
判官哥心等貢表貢一龍腦一家底第二等八家底  
十一家底米龍腦一十家底蒼龍腦二十家底凡一家底並二  
十兩龍腦版五玳瑁殼一百檀香三瓣象牙六株吉  
千萬歲壽望不責小國微薄之禮其表以數  
中國紙類木皮而薄瑩滑色微綠長數尺闊寸餘  
盈握其字細小橫讀之以華言譯之

三佛齊來貢 宋史

三佛齊太宗太平興國五年王夏池遣使來貢  
言三佛齊國蕃商李甫誨乘船載香藥犀角  
風勢不便飄舡六十日至潮州其香藥悉送廣州  
至遣使蒲押陀羅來貢水晶佛錦布犀牙香藥



占城貢象

宋史

占城太宗太平興國七年遣使乘象入貢詔留象廣州八年獻馴象能拜伏詔置於京畿寧陵縣

丹州蠻來貢

宋史

太宗淳化元年南丹州蠻酋師莫洪嘗卒其子不洪皓襲稱刺遣其子准通來貢銀盤二十銅鼓三面銅印一鈕旗一帖繡珠紅羅襦一上降優詔賜絲百匹還其襦

楊陁排貢馴象

宋史

占城太宗淳化元年其新王楊陁排自稱新堂佛逝國楊陁排遣使李臻貢馴犀方物表請為交州所攻國中人民財寶皆為所略上賜黎桓詔令各守境

占城入貢賜馬

宋史

占城太宗淳化三年遣使李良甫貢方物賜其王白馬二兵器等本國僧淨戒獻龍腦金鈴銅香鑪如音等各優賜之

占城奉表入貢

宋史

占城太宗至道元年正月其王遣使來貢奉表言前進奉使李良甫迴伏蒙聖慈賜臣細馬二匹旗五面銀裝劍五口銀纏槍五條弓弩各五張及箭等戴恩感懼稽首稽首臣生長外國負遠天都竊承皇帝聖明威德廣大臣不憚介居海裔遣使入朝皇帝不棄蠻夷小國曲加優賜然臣自為土長聲勢尚卑常時外國頗相侵撓况以前民庶如芥隨風星散流離各不自保近蒙皇帝賜臣內閑駟駿及旗幟兵器等鄰國聞之知臣荷大國之寵而各懼天威不敢謀害今臣一國安寧流民來復若非皇帝天德加護何以至此臣之一國仰望仁聖覆之如天載之如地臣自思惟鴻恩不淺且自天子之都至臣所居之國涉海綿邈不啻數萬



聖而所賜之馬及器械等並安全而至皆聖德之所及也自前本國進奉未嘗有旌旗弓矢之賜臣今何幸獨受異恩此蓋天威廣被壯臣土疆臣雖殞身無以上報無臣舌使往復資給備至恩重山嶽不可具陳今特遣專使李波珠副使訶散判官李磨勿等進奉犀角十株象牙三十株玳瑁十斤龍腦二斤沉香百斤夾箋黃熟香九十斤檀香百六十斤山得雞二萬四千三百雙胡椒二百斤蓆席五前件物固非珍奇惟表誠懇臣生居異域幸遇明時不與殊珍惟重良馬儻皇帝念及外國不罪懇求若使介南歸願垂頒賜臣之幸矣無臣本國元有流民三百散居南海曾蒙聖旨許令放還今有猶留在廣州者本國舊有進奉夷人羅常占見駐廣州乞詔本州盡數點集具籍以付常占令造船舡乘便風部領歸國冀得安其生聚以實疆至於萬里感恩一心事上臣之志也上覽表遣使詣廣州詢問願還者悉付波珠使還復賜白馬二逐為常制

交趾貢七寶交椅宋史

交趾真宗即位進封黎桓南平王兼侍中桓前遣都知兵馬使阮紹恭副使趙懷德以金銀七寶裝交椅一銀盆十犀角象牙五十枚絹細布萬疋來貢詔陳于萬歲殿太宗神御許紹恭等拜奠及迴賜桓帶甲馬詔書慰獎

吐蕃獻馬宋史

吐蕃真宗咸平元年十一月河西軍左廂副使歸得將軍折逋游龍鉢來朝游龍鉢四世受朝命為酋雖貢方物未嘗自行今始至獻馬二千餘疋

占城貢犀象宋史

占城真宗咸平二年其王楊普俱毗茶逸施离遣使朱陳堯副使蒲薩陀婆判官黎姑倫以犀象玳瑁香藥來貢賜堯等冠帶



衣褥有差景德元年又遣使來旨詔以良馬介冑戎器等賜之  
交趾貢犀象宋史  
交趾真宗咸平四年又遣行軍司馬黎紹留副使何慶常以馴  
犀一象二象柵二七寶紫金瓶一來貢

丹眉流國入貢宋史

丹眉流國真宗咸平四年國主多須機遣使打吉馬副使打臘  
判官皮泥等九人來貢木香千斤鑰鑰各百斤胡黃連三十五  
斤紫甘百斤紅麵一合花布四段蘇木萬斤象牙六十一株召  
見崇德殿賜以冠帶服物及還又賜多須機詔書以敦獎之

吐蕃貢馬宋史

吐蕃真宗咸平五年十月羅支又言賊遷送鐵箭誘臣部族已  
戮一人繫一人聽朝旨詔褒諭之聽自處置十一月使來貢馬

五千

子給馬領別賜綵百段茶百斤

蒲端貢獻乞恩宋史

景德中蒲端國主其陵數遣使來貢方物及  
狀江鶴其後國王悉離琶大遐至亦以金版鐫表來上其使  
已繫漢上言伏具詔旨給賜占城使鞍勒馬大神旗各二乞如  
恩例有司以蒲端在占城下請賜雜綵小旗五從之

占城奉表來貢宋史

占城真宗景德四年遣使布祿爹地加等奉表來朝表函藉以  
文錦詞曰占城國王楊普俱毗茶室离頓首言臣聞二帝封疆  
南止扁于湘楚三土壤界北不及於幽燕仰矚昌時實邁往跡  
伏惟皇帝陛下乾坤授氣日月儲英出震居尊承基御極慈惠  
敷於天下聲教被於域中業茂前王功芳徂后蒼生是念黃屋



非心無方不是生靈有土並為臣妾真風遍布霈澤周行凡沐  
照臨共增聳抃臣生于邊鄙幸襲華風蟻垤蜂房聊為遂性龍  
樓鳳閣尚阻觀光再念自假天威獲全封部隣無侵奪俗有舒  
蘇每歲拜遣下臣問寧上國蒙陛下恩霑行葦福及豚魚特因  
迴人頌賜戎器臣本土惟望闕焚香歡呼拜受心知多幸曷答  
洪恩聖君既念於賓王微懇肯忘於述職今遣專信臣布祿爹  
地加副信臣除通麻瑕加耶判官臣皮霸抵一行人力等部署  
土毛遠充歲貢雖永楚茅之禮實懷魯酒之憂虔望霽明南寬  
譴戮專信臣等迴日軍容器仗耀武之物伏願重加賜賚益念  
忝為臣子合告君親服飾車輿威儀斧鉞不敢私制惟望恩順  
干冒寃旒不任死罪布祿爹地加言本國舊隸交州後奔于佛  
遊止去舊所七百里使還賜物甚厚

注華奉表來貢

注華國真宗大中祥符八年九月其國主羅茶羅个遣進奉使  
侍郎婆里三文副使蒲恕判官翁勿防榜官亞勒加等奉表來  
貢三文等以盤奉真珠碧頗黎升殿布於御坐前降殿再拜譯  
者導其言曰願以表遠人慕化之意其國主表曰臣羅茶羅个  
言昨遇舸船舶商人到本國告稱銀宋之有天下也二帝開基  
聖人繼統登封太嶽禮祀分陰至德并聞上穹眷命臣昌期斯  
遇吉語幸聞輒傾就日之誠仰露朝天之款臣伏聞人君之御  
統也無遠不臻臣子之推誠也有道則服伏惟皇帝陛下功超  
邃右道建大中衣裳垂而德合乾坤劔戟鑄而範圍區宇神武  
不殺人文化成廊明明之德以臨御下民懷翼翼之心以昭事  
上帝至仁不傷於行葦大信爰及於淵魚故得天鑒孔彰帝臨



有赫顯今古未聞之事保家邦大定之基竊念臣微類醯雞賤如芻狗世君夷落地遠華風虛荷燭幽曾無執贄今者竊聽誦頌普及遐陬恨年屬於桑榆阻躬陳於玉帛矧滄溟之曠絕在跋涉以稍艱是敢傾倒赤心遙瞻丹闕任土作貢同蝼蟻之慕殫委質事君比葵藿之向日謹遣專使等五十二人奉土物果貢凡真珠衫帽各一真珠二萬一千一百兩象牙六十株乳香六十斤三文等又獻珠六千六百兩香藥三千三百斤初羅茶羅乍既開商舶言且曰十年來海無風濤古老傳云如此則中國有聖人故遣三文等入貢三文離本國舟行七十七晝夜歷那勿丹山婆里西蘭山至占賓國又行六十一晝夜歷伊麻羅里山至古羅國國有古羅山因名焉又行七十一晝夜歷加八山占不牢山舟寶龍山至三佛齊國又行十八晝夜度巒山水

口歷天竺山至賓頭狼山望東西王母塚距舟所將百里又行二十晝夜度羊山九星山至廣州之琵琶洲離本國凡一百五十日至廣州焉詔閩門祇候史祐之節伴

喃廝囉獻馬宋史

喃廝囉者緒出贊普之後真宗太中祥符九年廝囉立遵等獻馬五百八十二匹詔賜器幣總萬二千計以答之

占城王遣使入貢宋史

占城真宗天禧二年其王凡嘿排摩牒遣使羅皮帝加以象牙七十二株犀角八十六株玳瑁千片乳香五十斤丁香花八十斤薑蔻六十五斤沉香百斤箋香二百斤別箋一劑六十八斤百香百斤檳榔千五百斤來貢

占城遣貢方物宋史



占城仁宗天聖八年十月其王陽補孤施離皮蘭德加拔麻疊遣使李蒲薩麻瑕陀琶來貢木香玳瑁乳香犀角象牙

占城表貢宋史

占城仁宗皇祐二年正月使俱舍剎波微收羅婆麻提揚卜貢象牙二百一犀角七十九表二通一以本國書一以中國書

日本僧誠尋入貢宋史

日本國神宗熙寧五年有僧誠尋至台州上天台國清寺願留州以聞詔使赴闕誠尋獻銀香爐木椀子白琉璃五香水精紫檀虎鬼所飾念珠及青色織物綾神宗以其遠人而有戒業處之開寶寺盡賜同來僧紫方袍是後達貢方物而來者皆僧也

注輦來貢宋史

注輦國神宗熙寧十年其王地華加羅遣使奇囉囉副使南早

琶打判官麻圖華羅等二十七人來獻豌豆珠麻瑠璃大洗盤白梅花腦錦花犀牙乳香瓶香薷薇水金蓮花木香阿魏鵬砂丁香使副以真珠龍腦登陸跪而散之謂之撒殿既降詔遣御藥室勞之以為懷化將軍保順郎將各賜衣服器幣有差答賜其王錢八萬一千八百緡銀五萬二千兩

日本僧仲回入貢宋史

日本國神宗元豐元年使通事僧仲回來賜號慕化懷德大師明州又言得其國太宰府牒因使人孫忠還遣仲回等貢緇二百匹水銀五千兩以孫忠乃海商而貢禮與諸國異請自移牒報而答其物直付仲回東歸從之乾道九年始附明州綱首以方物入貢

占城貢瑠璃物色宋史



占城神宗熙寧元年且 樓卜尸利律陀般摩提婆遣使貢方  
物乞市驛馬詔賜曰為一令於所州貢物 歸五年貢瑠璃珊  
瑚酒器龍腦乳香丁香葦澄茄紫礦七年交州李乾德言其王  
領兵三千人并妻子來降以正月至

南丹蠻修貢豆職 宋史

神宗元豐六年大軍討安化南丹蠻莫世忍獻弓矢自言願世  
世為外臣修貢不懈遷檢校戶部尚書給銅牌旗號官其子姪  
九人

回鶻獻水精盆珍珠傘 元史

元憲宗時回鶻獻水精盆珍珠傘等物可直銀三萬餘錠帝曰  
方今百姓疲弊所急者錢爾朕獨有此何為却之賽典赤以為  
言帝稍償其直且禁其勿復有所獻

馬八兒等十國遣使入貢 元史

馬八兒國海外諸蕃國惟馬八兒與俱藍足以綱領諸國而俱  
藍又為馬八兒後障自泉州至其國約十萬里其國至阿不合  
大王城水路得便風約十五日可到比餘國最大世祖至元間  
行中書省左丞吹都等奉璽書十通招諭諸蕃未幾占城馬八  
兒國俱奉表稱藩餘俱藍諸國亦下行省議遣使十五人往諭  
之帝曰非吹都等所可專也若無朕命不得擅遣使十六年十  
二月遣廣東招討司達魯花赤楊庭璧招俱藍十七年三月至  
其國國主必納的令其弟肯那却不刺木省書回回字降表附  
庭璧以進言來出使遣使入貢十月授哈撒兒海牙俱藍國宣慰  
使偕庭璧再往初諭十八年正月自泉州入海行三月抵僧伽  
耶山舟人鄭震等可以阻風乏糧勸往馬八兒國或可假陸路以



達俱藍國從之四月至馬八兒國新村馬頭登岸其國宰相馬  
因的謂官人此來甚善本國船到泉州時官司亦嘗慰勞無以  
為報今以何事至此庭璧等告其故因及假道之事馬因的乃  
託以不通為辭以其宰相不阿里相見又言假道不阿里亦以  
它事辭五月二人至館屏人令其官者為通情實乞為達朝  
廷我一心願為白皇帝奴我使札馬里丁入朝我大必閣赤赴算  
彈華言國主也告變算彈籍我金銀田產妻孥又欲殺我我詭辭得  
免今算彈兄弟五人皆聚加一之地議與俱藍交兵及文天使  
來對衆稱本國貧陋此是妄言凡回回國金銀寶具盡出本國  
其餘回回盡來商賈比間諸國皆有降心若馬八兒既下我使  
人持書招之可使盡降時哈撒兒海牙與庭璧以阻風不至俱  
藍遂還哈撒兒海牙入朝計事期以十一月俟北風再發至期

朝廷遣使令庭璧獨往十九年二月抵俱藍國國主及其相馬  
合麻等迎拜璽書三月遣其臣祝阿里沙忙里八的入貢時也  
里可溫兀咱兒撒里馬及木速蠻主馬合麻等亦在其國聞詔  
使至皆相率來告願納歲幣遣使入覲會蘇木達國亦遣人因  
俱藍主乞降庭璧皆從其請四月還至那旺國庭璧復說下其  
主忙昂比至蘇木都刺國國主土漢八的迎使者庭璧因喻以  
大意土漢八的即日納款稱藩遣其臣哈散速里蠻二人入朝  
二十年馬八兒國遣僧撮及班入朝五月將至上京帝即遣使  
逐諸途二十三年海外諸蕃國以楊庭璧奉詔招諭至是皆來  
降諸國凡十曰馬八兒曰須門那曰僧急里曰南無力曰馬蘭  
丹曰那旺曰丁呵兒曰來來曰急蘭亦斛曰蘇木都刺皆遣使  
貢方物



占城遣使奉表貢物 元史

占城近瓊州順風舟行一日可抵其國世祖至元間廣南西道宣慰使馬成旺嘗請兵三千人馬三百匹征之十五年右丞唆都以宋平遣人至占城還言其王失里咱牙信合八刺哈迭瓦有內附意詔降虎符授榮祿大夫封占城郡王十六年十二月遣兵部侍郎教化的總管孟慶元萬戶孫勝夫與唆都等使占城諭其王入朝十七年二月占城國王保寶旦孛囉耶叩南詔占把地囉耶遣使貢方物奉表降

安南國貢獻方物 元史

安南國王世子陳日烜世祖至元二十一年閏五月甲辰遣其中大夫陳謙甫貢玉杯金瓶珠條金領及白猿綠鳩幣帛等物

真臘占城國貢獻 元史

真臘占城國世祖至元二十二年九月丙子貢藥工十八人及

材鱗魚皮諸物

馬八兒國進奇獸 元史

馬八兒國世祖至元二十四年三月丙辰遣使進奇獸一類驃而巨毛黑白間錯名阿塔必即

西番國進黑豹 元史

西番國世祖至元二十六年六月己未進黑豹

羅斛國上表貢物 元史

羅斛國王世祖至元二十八年十月癸未遣使上表以金書字仍貢黃金象齒丹頂鶴五色鸚鵡翠毛犀角篤縹龍腦等物

回紇貢獻藥物 元史

回紇不刺罕成宗元貞二年春正月獻獅豹藥物賜鈔千三百



餘錠

緬國進貢白象元史

緬國成宗大德四年夏四月遣使進白象

征東元者戶進鼠獾元史

征東末吉地元者戶英宗至治三年春正月乙卯以貂鼠水獺海狗皮來獻詔存卹三歲

瓜哇遣使進貢元史

瓜哇國恭定帝四年十二月遣使獻金文豹白猴白鸚鵡各一

占臘國來貢元史

占臘國文宗天曆二年夏四月丙午來貢羅香木及象豹白猿

瓜哇國遣臣進貢元史

瓜哇國文宗至順三年三月遣其臣僧伽刺等八十三人奉金

書表及方物來朝貢

安南遣使貢獻元史

安南國古文趾也文宗至順三年夏四月世子陳日煥遣其臣

鄧世延等二十四人來貢方物

拂郎國貢異馬元史

拂郎國順帝至正二年秋七月貢異馬長一丈一尺三寸高六

尺三寸身純黑後二蹄皆白

扎爾別貢弓刀西馬元史

扎爾別之地順帝至正二十三年九月辛卯獻大撒哈刺察赤

兒末西兒刀弓鎖子甲及青白西馬各二匹

好佛

本國有好佛法者



倭國學佛法致書無禮北史

倭國隋大業三年其王多利思比孤遣朝貢使者曰閻海西菩  
薩天子重興佛法故遣朝拜無沙門數十人來學佛法國書曰  
日出處天子致書日沒處天子無恙云云帝覽不悅謂鴻臚卿  
曰蠻夷書有無禮者勿復以聞

### 征伐 夷狄與隣國相征戰者

冒頓滅東胡 前漢

漢高相時東胡強聞單于冒頓殺父頭曼自立廼使使謂冒頓  
齒欲得頭曼時十里馬冒頓問群臣群臣皆曰此匈奴寶馬也  
勿予冒頓曰柰何與人鄰國愛一馬乎遂與之頃之東胡以為  
冒頓畏之使使謂冒頓曰欲得單于一關氏冒頓復問左右左

右皆怒曰東胡無道廼求關氏請擊之冒頓曰柰何與人鄰國  
愛一女子乎遂取所愛關氏子東胡東胡王愈驕西侵與匈奴  
中間有棄地莫居千餘里各居其邊東胡使謂冒頓曰匈奴所  
與我界棄地吾欲有之冒頓問群臣或曰此棄地予之於是冒  
頓大怒曰地者國之本也柰何予人諸言與者皆斬之冒頓上  
馬令國中有後者斬遂東襲擊東胡東胡初輕冒頓不為備冒  
頓大破滅之

### 定難 能定本國患難者

張鄭相知 唐書

新羅有張保臯鄭年者皆善鬪戰工用槍年復能沒海履其地  
五十里不噎角其勇健保臯不及也年以兄呼保臯保臯以齒



年以藝常不相下自其國皆來為武寧軍小將後保臯歸新羅  
謁其王曰遍中國以新羅人為奴婢願得鎮清海使賊不得掠  
人西去清海海路之要也王與保臯萬人守之自太和後海上  
無鬻新羅人者保臯既貴於其國年飢寒客漣水一日謂戍主  
馮元規曰我欲東歸乞食於張保臯元規曰若與保臯所負何  
如柰何取死其手年曰飢寒死不如兵死快況死故鄉邪年遂  
去至謁保臯飲之極歡飲未卒聞大臣殺其王國亂無主保臯  
分兵五千人與年持年泣曰非子不能平禍難年至其國誅反  
者立王以報王遂召保臯為相以年代守清海

吐蕃納馬贖罪宋史

吐蕃真宗大中祥符七年知秦州張佖置大洛門新砦先是佖  
欲近渭置採木場蕃族聞之即徙帳去佖不能遂撫之戎人輒

悔因鄉導鈔劫佖深入掩擊悉敗走至是求和佖不許三月秦  
州曹瑋言熟戶郭廝敦賞樣丹皆大族樣丹輒作文法謀叛廝  
敦密以告約半月殺之至是果携樣丹首來上以廝敦陰害樣  
丹不欲明加恩獎以疑懼諸族時方議築南使城遂以廝敦獻  
地為名詔授順州刺史先是張佖深入蕃境邊事數擾及瑋破  
魚角蟬戮賞樣丹二酋由是前拒王師者伏匿避罪瑋誘召之  
許納罰首過既而至者數千人凡納馬六千匹給以匹練或以  
少為訴者瑋叱之曰是贖罪物汝輩敢希利邪戎族聞之皆畏  
服

富侈

本國富盛奢侈者

副貨真金駝北史



副貨國去代一萬七千里國王有黃金殿殿下有金駝七頭各高三尺

### 技巧

夷狄有伎能巧思者

大月氏鑄石為琉璃北史

大月氏國魏太武時其國人商販京師自云能鑄石為五色瑠璃於是採山中於京師鑄之既成光澤乃美於西方來者乃詔為行殿容百餘人光色映徹觀者見之莫不驚駭以為神明

### 神異

遇難有神助物護之異者

昆莫狼乳前漢

烏孫王號昆莫其父難兜靡與大月氏俱在祁連敦煌闐小國

也大月氏攻殺難兜靡奪其地人民亡走匈奴時昆莫新生傳父布就翎侯抱亡置草中為求食還見狼乳之又烏銜肉翔其旁以為神遂持歸匈奴單于愛養之及壯以其父民衆與之使將兵數有功

東明投溷廐不死後漢

北夷索離國王出行其侍兒於後隻身王還欲殺之侍兒曰前見天上有氣大如雞子來降我因以有身王囚之後遂生男王令置於豕牢豕以口氣噓之不死復徙於馬蘭馬亦如之王以為神乃聽母收養名曰東明東明長而善射王忌其猛復欲殺之東明奔走南至掩淪水以弓擊水魚鱉皆聚浮水上東明乘之得度因至夫餘而王之焉



知來

能知未來之事者

吐谷渾先知北史

吐谷渾本遼東鮮卑徒河涉歸子也涉歸一名奕洛韓有二子庶長曰吐谷渾少曰若洛魔涉歸死若洛魔代統部落是為慕容氏涉歸之在也分戶七百以給吐谷渾與若洛魔渾謂其部落曰我兄弟子孫竝應昌盛魔當傳子及曾玄孫其間可百餘年我乃玄孫間始當顯耳

夢應

有夢而應驗者

陽邁金色光麗南史

陽邁初在孕其母夢生兒有人以金席藉之其色光麗夷人謂

金之精者為陽邁若中國云紫磨者因以為名

紀異

紀本國之異事者

乞伏遇神物晉書

乞伏國仁在昔有如弗斯出連叱盧三部自漠北南出大陰山遇一巨蟲於路狀若神龜大如陵阜乃殺馬而祭之祝曰若善神也便開路惡神也遂塞不通俄而不見乃有一小兒在馬時乞伏部有老父無子者請養為子衆咸許之老父欣然自以有所依憑字之曰紇干紇干者夏言依倚也年十歲驍勇善射擊彎弓五百斤四部服其雄武推為統主號之曰乞伏可汗託鐸莫何託鐸者言非神非人之稱也

鱧魚化鐵鑄刀南史



漢末大亂林邑功曹區連殺縣令自立為王數世其後王無嗣外甥范熊代立死子逸嗣晉成帝咸康三年逸死奴文募立文本曰南西卷縣夷帥范幼家奴嘗牧牛於山澗得鱧魚二化而為鐵因以鑄刀刀成文向石呪曰若斫石破者文當王此國因斫石如斷芻藁文心異之

## 感異生子

所感異常而生子者

沙壹感龍後漢

哀牢夷者其先有婦人名沙壹居于牢山嘗捕魚水中觸沉木若有感因懷姙十月產子男十人後沉木化為龍出水上沙壹忽聞龍語曰若為我生子今悉何在九子見龍驚走獨小子不能去背龍而坐龍因舐之其母鳥語謂背為九謂坐為隆因名

子曰九隆及後長大諸兄以九隆能為父所舐而黠遂共推以為王後牢山下有一夫一婦復生十女子九隆兄弟皆娶以為妻後漸相滋長種人皆刻畫其身象龍文衣皆著尾九隆死世世相繼乃分置小王徃徃邑居散在谿谷絕域荒外山川阻深生人以來未嘗交通中國

## 嗜慾

嗜好物慾者

述律廢政嗜飲五代史

述律本夷狄種號自立改元應曆號天順皇帝後更名璟述律有疾不能近婦人左右給事多以宦者然政獵好飲酒不恤國事每酣飲自夜至旦晝則常睡國人謂之睡王



# 遺命

臨終囑付後人者

吐谷阿豺囑子 北史

吐谷渾阿豺臨死召諸子弟告之曰先公車騎捨其子度以大業屬善豈敢忘先公之舉而私於緯代其以慕瓚繼事阿豺有子二十人緯代長子也阿豺又謂曰汝等各奉吾一隻箭將玩之地下俄而命毋弟慕利延曰汝取一隻箭折之慕利延折之曰汝取十九隻箭折之慕延不能折阿豺曰汝曹知不單者易折衆則難摧戮力一心然後社稷可固言終而死

吐延帶劍託子 北史

吐谷渾死本遼東鮮卑氏也有子六十人長子吐延身長七尺八寸勇力過人性刻暴為昂城羗酋姜聰所刺劍猶在體呼子葉延語其大將絕拔渥曰吾氣絕棺斂訖便速去保蘭地遠又土俗懦弱易控禦葉延小兒欲授餘人恐倉卒終不能制今以葉延付汝竭股肱之力以輔之孺子得立吾無恨也抽劍而死

# 報怨

報復怨恨者

馬耆會滅白山 晉書

馬耆國王龍安遣子入侍安夫人猶胡之女姓身十二月剖脇生子曰會立之為世子會少而勇傑安病篤謂會曰我嘗為龜茲王白山所辱不忘於心汝能雪之乃吾子也及會立襲滅白山遂據其國



# 女主

國俗以女為主者

倭國立女主為王後漢

後漢安帝永初元年倭國王帥升等獻生口百六十人願請見  
桓靈間倭國大亂更相攻伐歷年無主有一女子名曰卑彌呼  
年長不嫁事鬼神道能以妖惑眾於是共立為王侍婢千人少  
有見者唯有男子一人給飲食傳辭語居處宮室樓觀城柵皆  
持兵守衛法俗嚴峻自女王國東度海千餘里至拘奴國雖皆  
倭種而不屬女王自女王國南四千餘里至朱儒國人長三四  
尺自朱儒東南行船一年至裸國黑齒國使驛所傳極於此矣

南蠻悉莫威令 唐書

南蠻訶陵亦曰社婆曰閻婆在南海中肅宗上元間國人推女

子為王號悉莫威令整

不舉遺大食君聞之齎金一

其郊行者輒避如是三年太子過以足躡金悉莫怒將斬之  
臣固請悉莫曰而非實本於足可斷趾羣臣復為請乃斬指以  
徇大食聞而畏之不敢加兵

黃氏撫眾 宋史

仁宗至和九年八月樂昌縣黎賊劫省民焚縣治為亂黎人王  
日存王承福陳顏招降之瓊管安撫司上其功得借補承節郎  
淳熙元年詔承節郎王日存子孫許襲職四年冬萬安軍王利  
學寇省地蓋旻進率眾拒之兵弱戰沒八年六月詔三十六峒  
都統領王氏女襲封宜人初王氏居化外累世立功邊陲皆受  
封爵紹興間瓊山民許益為亂王母黃氏撫諭諸峒無敢從亂  
者以功封宜人至是黃氏年老無子請以其女襲封朝廷從之



# 風俗

夷狄之土風習俗者

匈奴隨畜田獵為生業前漢

匈奴其先夏后氏之苗裔曰淳維唐虞以上有山戎獫狁薰粥居于北邊隨草畜牧而轉移其畜之所多則馬牛羊其奇畜則橐佗驢羸馱駃騠騊駼奚逐水草遷徙無城郭常居耕田之業然亦各有分地無文書以言語為約束兒能騎羊引弓射鳥鼠少長則射狐兔肉食士力能彎弓盡為甲騎其俗寬則隨畜田獵禽獸為生業急則人習戰攻以侵伐其天性也其長兵則弓矢短兵則刀鋌利則進不利則退不羞遁走苟利所在不知禮義自君王以下咸食畜肉衣毳以革被旃裘壯者食肥美老者飲食其餘貴壯健賤老弱父死妻其後母兄弟死皆取其妻妻之其俗有名不諱而無字

大倭國躡踞為恭後漢

大倭王居邪馬臺國樂浪郡徼去其國萬二千里去其西北界拘邪韓國七千餘里其地大較在會稽東冶之東與朱崖儋耳相近故其法俗多同土宜禾稻麻紵蠶桑知織績為纈布出白珠青玉其山有丹土氣溫腴冬夏生菜茹無牛馬虎豹羊鵲其兵有矛楯木弓竹矢或以骨為鏃男子皆黥面文身以其文左右大小別尊卑之差其男衣背橫幅結束相連女人被髮屈紒衣如單被貫頭而著之並丹朱粉身如中國之用粉也有城柵屋室父母兄弟異處唯會同男女無別飲食以手而用藟豆俗皆徒跣以躡踞為恭敬人性嗜酒多壽考至百餘歲者甚衆國多女子大人皆有四五妻其餘或兩或三女人不淫不妒又俗



不盜竊少爭訟犯法者沒其妻子重者滅其門族其死停喪十  
餘日家人哭泣不進酒食而等類就歌舞為樂灼骨以卜用决  
吉凶行來度海今一人不櫛沐不食肉不近婦人名曰持衰若  
在塗吉利則顧以財物如病疾遭害以為持衰不謹便共殺之  
漢光武建武中元二年倭奴國奉貢朝賀使人自稱大夫倭國  
之極南界也光武賜以印綬

高句驪所部風俗後漢

高句驪在遼東之東千里南與朝鮮滅貊東與沃沮北與夫餘  
接地方二千里多大山深谷人隨而為居少田業力作不足以  
自資故其俗節於飲食而好修宮室東夷相傳以為夫餘別種  
故言語法則多同而跪拜曳一脚行步皆走凡有五族有消奴  
部絕奴部順奴部灌奴部桂婁部本消奴部為王稍微弱後桂

婁部代之其置官有相加對盧沛者古鄒大加主簿優台使者  
帛衣先人武帝滅朝鮮以高句驪為縣使屬玄菟賜鼓吹伎人  
其俗淫皆絜淨自熹慕夜輒男女群聚為倡樂好祠鬼神社稷  
零星以十月祭天大會名曰東盟其國東有大穴號祿神亦以  
十月迎而祭之其公會衣服皆錦繡金銀以自飾大加主簿皆  
著幘如冠幘而無後其小加著折風形如弁無牢獄有罪諸加  
評議便殺之沒入妻子為奴婢其婚姻皆就婦家生子長大然  
後將還便稍營送終之具金銀財幣盡於厚葬積石為封亦種  
松柏其人性凶急有氣力習戰鬥好寇鈔沃沮東濊皆屬焉句  
驪一名貊耳有別種依小水為居因名曰小水貊出好弓所謂  
貊弓是也

冉駝夷附漢為郡後漢



冉駝夷者漢武帝所開元鼎六年以為汶山郡至地節三年夷人以立郡賦重宣帝乃省并蜀郡為北部都尉其山有六夷七羌九氏各有部落其王侯頗知文書而法嚴重貴婦人黨母族死則燒其尸土氣多寒在盛夏冰猶不釋故夷人冬則避寒入蜀為傭夏則違暑反其衆邑皆依山居止累石為室高者至十餘丈為邛籠又土地剛鹵不生穀粟麻菽唯以麥為資而宜畜牧有旄牛無角一名童牛肉重千斤毛可為毼出名馬有靈羊可療毒又有食藥鹿鹿有胎者其腸中糞亦療毒疾又有五角羊麝香輕毛毼雞牲牲其人能作旄氈班罽青頓氈毼羊羴之屬特多雜藥地有鹹土煮以為鹽麇羊牛馬食之皆肥其西又有三河繫于虜北有黃石北地盧水胡其表乃為徽外靈帝時復分蜀郡北部為汶山郡云

夫餘國地方風俗後漢

夫餘國在玄菟北千里南與高句驪東與挹婁西與鮮卑接北有弱水地方二千里本濊地也初北夷素離國王出行其侍兒於後倭身王還欲殺之侍兒曰前見天上有氣大如雞子來降我因以有身王囚之後遂生男王令置於豕牢豕以口氣噓之不死復徙於馬蘭馬亦如之王以為神乃聽母收養名曰東明東明長而善射王忌其猛復欲殺之東明奔走南至掩淪水以弓擊水魚鱉皆聚浮水上東明乘之得渡因至夫餘而王之馬於東夷之域最為平敞土宜五穀出名馬赤玉貂豹大珠如酸棗以真柵為城有宮室倉庫牢獄其人麤大疆勇而謹厚不為寇鈔以弓矢刀矛為兵以六畜名官有馬加牛加狗加其邑落皆主屬諸加食飲用俎豆會同拜爵洗爵揖讓升降以臘月祭



天大會連日飲食歌舞名曰迎鼓是時斷刑獄解囚徒有軍事亦祭天殺牛以號占其吉凶行人無晝夜好歌吟音聲不絕其俗用刑嚴急被誅者皆沒其家人為奴婢盜一責十二男女淫皆殺之尤治惡妒婦既殺復尸於山上兄死妻嫂死則有槨無棺殺人殉葬多者以百數其王葬用玉匣漢朝常豫以玉匣付玄菟郡王死則迎取以葬焉建武中東夷諸國皆來獻見二十五年夫餘王遣使奉貢光武厚答報之於是使命歲通至永初五年夫餘王始將步騎七八千人寇鈔樂浪殺傷吏民後復歸附永寧元年乃遣嗣子尉仇台詣闕貢獻天子賜尉仇台印綬金綵順帝永和元年其王來朝京師帝作黃門鼓吹角抵戲以遣之桓帝延熹四年遣使朝賀貢獻永康元年王夫台將二萬餘人寇玄菟太守公孫域擊破之斬首千餘級至靈

帝熹平三年復奉章貢獻夫餘不屬玄菟獻帝時其王求屬東云

倭國風俗魏書

倭人在帶方東南大海之中依山島為國邑舊百餘國漢時有朝見者今使譯所通三十國從郡至倭循海岸水行歷韓國乍南乍東到其北岸狗邪韓國七千餘里始渡一海千餘里至對馬國其大官曰卑狗副曰卑奴母離所居絕島方可四百餘里土地山險多深林道路如禽鹿徑有千餘戶無良田食海物自活乘船南北市糴又南渡一海千餘里名曰瀚海至一大國官亦曰卑狗副曰卑奴母離方可三百里多竹木叢林有三千許家差有田地畊田猶不足食亦南北市糴又渡一海千餘里至末盧國有四千餘戶濱山海居草木茂盛行不見前人好捕魚



鯪水無深淺皆沉沒取之東南陸行五百里到伊都國官曰爾  
支副曰泄謨觚柄渠觚有千餘戶世有五皆統屬女王國郡使  
往來常所駐東南至奴國百里官曰兕馬觚副曰卑奴毋離有  
二萬餘戶東行至不彌國百里官曰多模副曰卑奴毋離有千  
餘家南至投馬國水行二十日官曰彌彌副曰彌彌那利可五  
萬餘戶南至邪馬壹國女王之所都水行十日陸行一月官有  
伊支馬次曰彌馬升次曰彌馬獲支次曰奴佳鞮可七萬餘戶  
自女王國以北其戶數道里可得略載其餘旁國遠絕不可得  
詳次有斯馬國次有已百支國次有伊邪國次有郡支國次有  
彌奴國次有好古都國次有不呼國次有姐奴國次有對蘇國  
次有蘇奴國次有呼邑國次有華奴蘇奴國次有鬼國次有為  
吾國次有鬼奴國次有邪馬國次有躬臣國次有巴利國次有

支惟國次有烏奴國次有奴國此女王境界所盡其南有狗奴  
國男子為王其官有狗古智卑狗不屬女王自郡至女王國萬  
二千餘里男子無大小皆黥面文身自古以來其使詣中國皆  
自稱大夫夏后少康之子封於會稽斷髮文身以避蛟龍之害  
今倭水人好沉沒捕魚蛤文身亦以厭大魚水禽後稍以為飾  
諸國文身各異或左或右或大或小尊卑有差計其道里當在會  
稽東治之東其風俗不淫男子皆露紒以木綿招頭其衣橫  
幅但結束相連畧無縫婦人被髮屈紒作衣如單被穿其中央  
貫頭衣之種禾稻紵麻蠶桑績績出細紵縑綿其地無牛馬虎  
豹羊鵲兵用矛楯木弓木弓短下長上竹箭或鐵鏃或骨鏃所  
有無與儋耳朱崖同倭地溫暖冬夏食生菜皆徒跣有屋室父  
母兄弟卧息異處以朱丹塗其身體如中國用粉也食飲用邊



豆手食其死有棺無槨封土作冢始死停喪十餘日當時不食  
肉喪主哭泣他人就歌舞飲酒已葬舉家詣水中澡浴以如練  
沐其行來渡海詣中國恒使一人不梳頭不去蟻蟲衣服垢污  
不食肉不近婦人如喪人名之為持衰若行者言善共顧其生  
口財物若有疾病遭暴害便欲殺之謂其持衰不謹出真珠青  
玉其山有丹其木有柵杼豫樟椶櫪投檀烏號楓香其竹篠簞  
桃支有薑橘椒藁荷不知以為滋味有獼猴黑雉其俗舉事行  
來有所云為輒灼骨而卜以占吉凶先告所卜其辭如今龜法  
視火圻占兆其會同坐起父子男女無别人性嗜酒見大人所  
敬但搏手以當跪拜其人壽考或百年或八九十年其俗國大  
人皆四五婦下戶或二三婦婦人不淫不妬忌不盜竊少諍訟  
其犯法輕者沒其妻子重者滅其門戶及宗族尊卑各有差序

足相臣服收租賦有邸閣國國有市交易有無使大倭監之自  
女王國以北特置一大率檢察諸國畏憚之常治伊都國於國  
中有如刺史王遣使詣京都帶方郡諸韓國及郡使倭國皆臨  
津搜露傳送文書賜遺之物詣女王不得差錯下戶與大人相  
逢道路逡巡入草傳辭說事或躄或跪兩手據地為之恭敬對  
應聲曰噫比如然諾其國本亦以男子為王住七八十年倭國  
亂相攻伐歷年乃共立一女子為王名曰卑彌呼事鬼道能惑  
衆年已長大無夫婿有男弟佐治國自為王以來少有見者以  
婢千人自侍唯有男子一人給飲食傳辭出入居處宮室樓觀  
城柵嚴設常有人持兵守衛女王國東渡海千餘里復有國皆  
倭種又有洙儒國在其南人長三四尺去女王四千餘里又有  
裸國黑齒國復在其東南船行一年可至



馬韓國異俗 魏書

韓在帶方之南東西以海為限南與倭接方可四十里有三種  
一曰馬韓二曰辰韓三曰弁韓辰韓者古之辰國也馬韓在西  
其俗少綱紀國邑雖有主帥邑落雜居不能善相制御無跪拜  
之禮居處作草屋土室形如冢其戶在上舉家共在中無長幼  
男女之別其葬有棺無槨不知乘牛馬牛馬盡於送死以瓔珠  
為財寶或以綴衣為飾或以縣頸垂耳不以金銀錦繡為珍其  
人性疆勇魁頭露紒如吳兵衣布袍足履革躡其國中有所  
為及官家使築城郭諸年少勇健者皆鑿春皮以大繩貫之又  
以文許木錘之通日嗷呼作力不以為痛既以勸作且以為健  
常以五月下種訖祭鬼神心聚歌舞飲酒晝夜無休其舞數十  
人俱起相隨踏地低昂手口相應節奏有似鐸舞十月農功畢

亦復如之信鬼神國邑各立一人主祭天神名之天君又諸國  
各有別邑名之為蘇塗立大木縣鈴鼓事鬼神諸亡逃至其中  
皆不還之好作賊其立蘇塗之義有似浮屠而所行善惡有異  
其北方近郡諸國差曉禮俗其遠處直入囚徒奴婢相聚無他  
珍寶禽獸草木畧與中國同出大栗大如梨又出細尾雞其尾  
皆長五尺餘其男子時時有文身又有州胡在馬韓之西海中  
大島上其人差短小言語不與韓同皆髡頭如鮮卑但衣韋好  
養牛及豬其衣有上無下略如裸勢乘船往來市買中韓

夫餘制度 魏書

夫餘在長城之北去玄菟千里南與高句麗東與挹婁西與鮮  
卑接北有弱水方可二千里戶八萬其民土著有宮室倉庫牢  
獄多山陵廣澤於東夷之域最平敞土地宜五穀不生五果其



人鹿鹿大性疆勇謹厚不寇鈔國有君王皆以六畜名宮有馬加牛加猪加狗加犬使大使者使者邑落有豪民名下戶皆為奴僕諸加別主四出道大者主數千家小者數百家食飲皆用俎豆會同拜爵洗爵揖讓升降以殷正月祭天國中大會連日飲食歌舞名曰迎鼓於是時斷刑獄解囚徒在國衣尚白白布大袂袍袴履革鞜出國則尚繒繡錦罽大人加狐狸狄白黑貂之裘以金銀飾帽譯人傳辭皆跪手據地竊語用刑嚴急殺人者死沒其家人為奴婢竊盜一責十二男女淫婦人妬皆殺之尤憎妬婦已殺尸之國南山上至腐爛女家欲得輸牛馬乃與之兄死妻嫂與匈奴同俗其國善養牲出名馬赤玉貂狄美珠珠大者如酸棗以弓矢刀矛為兵家家自有鎧仗國之耆老自說古之亡人作城柵皆負有似牢獄行道晝夜無老幼皆歌通曰

聲不絕有軍事亦祭天殺牛觀蹄以占吉凶蹄解者為凶合者為言有敵諸加自戰下戶俱檐糧飲食之其死夏月皆用冰殺人徇葬多者百數厚葬有柳無棺夫餘本屬玄菟漢末公孫度雄張海東威服外夷夫餘王尉仇台更屬遼東時句麗鮮卑疆度以夫餘在二虜之間妻以宗女尉仇台死簡位居立無適子有孽子麻余位居死諸加共立麻余牛加兄子名位居為大使輕財善施國人附之歲歲遣使詣京都貢獻正始中幽州刺史毋丘儉討句麗遣玄菟太守王頎詣夫餘位居遣大加郊迎供軍糧季父牛加有二心位居殺季父父子籍沒財物遣使簿歛送官舊夫餘俗水旱不調五穀不熟輒歸咎於王或言當易或言當殺麻余死其子依慮年六歲立以為王漢時夫餘王葬用玉匣常豫以付玄菟郡王死則迎取以葬公孫淵伏誅玄菟庫



猶有玉匣一具今夫餘庫有玉璧珪瓚數代之物傳世以為寶  
者老言先代之所賜也其印文言濊王之印國有故城名濊城  
蓋本濊貊之地而夫餘王其中自謂亡人抑有以也

挹婁猪膏塗身魏書

挹婁在夫餘東北千餘里濱大海南與北沃沮接未知其北所  
極其土地多山檢其人形似夫餘言語不與夫餘句麗同有五  
穀牛馬麻布人多勇力無大君長邑落各有大人處山林之間  
常穴居大家深至九梯以多為好土氣寒劇於夫餘其俗好養  
猪食其肉衣其皮冬以猪膏塗身厚數分以御風寒夏則裸袒  
以尺布隱其前後以蔽形體其人不潔作溷在中央人圍其表  
居其弓長四尺力如弩矢用楛長尺八寸青石為鏃古之肅慎  
氏之國也善射射人皆入因矢施毒人中皆死出赤玉好貂今

所謂挹婁貂是也自漢以來臣屬夫餘夫餘責其租賦重以黃  
初中叛之夫餘數伐之其人衆雖少所在山險鄰國人畏其弓  
矢卒不能服也其國便乘船寇盜鄰國患之東夷飲食類皆用  
俎豆唯挹婁不法俗最無綱紀也

祭虎為神魏書

濊南與辰韓北與高句麗沃沮接東窮大海今朝鮮之東皆其  
地也戶二萬昔箕子既適朝鮮作八條之教以教之無門戶之  
閉而民不為盜其後四十餘世朝鮮侯準僭號稱王陳勝等起  
天下叛秦燕齊趙民避地朝鮮數萬口燕人衛滿魁結夷服復  
來王之漢武帝伐滅朝鮮分其地為四郡自是之後胡漢稍別  
無大君長自漢以來其官有侯邑君三老統主下戶其耆老舊  
自謂與句麗同種其人性愿慤少嗜慾有廉恥不誤句麗言語



法俗大抵與句麗同衣服有異男女不皆著曲領男子繫銀花  
廣數寸以為飾自單單大山嶺以西屬樂浪自嶺以東七縣都  
尉主之皆以濊為民後者都尉封其渠師為侯今不耐濊皆其  
種也漢末更屬句麗其俗重山川山川各有部分不得妄相涉  
入同姓不婚多忌諱疾病死亡輒捐棄舊宅更作新居有麻布  
蠶桑作絲曉候星宿豫知年歲豐約不以珠玉為寶常用十月  
祭天晝夜飲酒歌舞名之為舞天又祭虎以為神其邑落相侵  
犯輒相罰責生口牛馬名之為責禍殺人者償死少寇盜作矛  
長三丈或數人共持之能步戰樂浪檀弓出其地其海出斑魚  
皮土地饒文豹又出果下馬漢桓時獻之

弁韓生男石壓其頭魏書

弁辰亦十二國又有諸小別邑各有渠帥大者名臣智其次有

險側次有樊濊次有殺奚次有邑借有已抵國不斯國弁辰彌  
離彌凍國弁辰接塗國勤耆國難彌離彌凍國弁辰古資彌凍  
國弁辰古淳是國毋奚國弁辰半路國弁樂奴國軍彌國弁軍  
彌國弁辰彌烏邪馬國如湛國弁辰甘路國戶路國州鮮國馬  
延國弁辰狗邪國弁辰走漕馬國弁辰安邪國馬延國弁辰瀆  
盧國斯盧國優中國弁辰韓合二十四國大國四五千家小國  
六七百家總四五萬戶其十二國屬辰王辰王常用馬韓人作  
之世世相繼辰王不得自立為王土地肥美宜種五穀及稻曉  
蠶桑作練布乘駕牛馬嫁娶之俗男女有別以大鳥羽送死其  
意欲使死者飛揚國出鐵韓濊皆從取之諸市買皆用鐵如  
中國用錢又以供給二郡俗喜歌舞飲酒有瑟其形似筑彈之  
亦有音曲兒生便以石壓其頭欲其禰今辰韓人皆禰頭男女



近倭亦文身便步戰兵仗與馬韓同其俗行者相逢皆住讓路  
肅慎巢居穴處晉書

肅慎氏一名挹婁在不咸山北去夫餘可六十日行東濱大海  
西接寇漫汗國北極弱水其土界廣袤數千里居深山窮谷其  
路險阻車馬不通夏則巢居冬則穴處父子世為君長無文墨  
以言語為約有馬不乘但以為財產而已無牛羊多畜猪食其  
肉衣其皮續毛以為布有樹名雒常若中國有聖帝代立則其  
木生皮可衣無井竈作瓦鬲受四五升以食坐則箕踞以足挾  
肉而啖之得凍肉坐其上令暖土無鹽鐵燒木作灰灌取汁而  
食之俗皆編髮以布作襜徑尺餘以蔽前後將嫁娶男以毛羽  
挿女頭女和則持歸然後致禮娉之婦貞而女淫貴壯而賤老  
死者其日即葬之於野交木作小椁綴猪積其上以為死者之

種性凶悍以無憂哀相尚父母死男子不哭泣哭者謂之不壯  
相盜竊無多少皆殺之故雖野處而不相犯有石砮皮骨之甲  
檀弓三尺五寸楛矢長尺有咫其國東北有山出石其利入鐵  
將取之必先祈神周武王時獻其楛矢石砮逮于周公輔成王  
復遣使入賀爾後千餘年雖秦漢之盛莫之致也及文帝作相  
魏景元末來貢楛矢石砮弓甲貂皮之屬魏帝詔歸于相府賜  
其王傳雞錦罽絺帛至武帝元康初復來貢

龜茲男女翦髮垂項晉書

龜茲國西去洛陽八千二百八十里俗有城郭其城三重中有  
佛塔廟千所人以田種畜牧為業男女皆翦髮垂項王宮壯麗  
煥若神居武帝大康中其王遣子入侍

文身國制度南史



文身國在倭東北七千餘里土俗歡樂物豐而踐行客不齎糧有屋宇無城郭國王所居飾以金銀珍麗繞屋為塹廣一丈實以水銀雨則流于水銀之上市用珍寶犯輕罪者則鞭杖犯死罪則置猛獸食之有枉則獸避而不食經宿則赦之

師子國鬼神市場南史

師子國天竺旁國也其地和適無冬夏之異五穀隨人種不須時節其國舊無人止有鬼神及龍居之諸國商估來貢市易鬼神不見其形但出珍寶顯其所堪價商人依價取之諸國人聞其土樂因此競至或有住者遂成大國

扶南四葬南史

扶南國其俗居喪則剃除鬚髮死者有四葬水葬則投之江流火葬則焚為灰燼土葬則壅埋之鳥葬則棄之中野人性貪吝

無禮義男女恣其奔隨

海島人物南史

梁武帝天監六年晉安人渡海為風所飄至一島登岸有人居止則如中國而言語不可曉男則人身有狗頭其聲如吠其食有小豆其衣如布築土為牆其形圓其戶如竇云

女國婦人水娠南史

扶桑國東千餘里有女國容貌端正色甚潔白身體有毛髮長委地至二三月競入水則妊娠六七月產子女人曾前無乳頂後生毛根白毛中有汁以乳子百日能行三四年則成人矣見人驚避偏畏丈夫食鹹草如禽獸鹵草葉似邪蒿而氣香味鹹

毗騫王不死南史

毗騫國去扶南八千里傳其王身長丈二頭長三尺自古不死



莫知其年王神聖國中人善惡及將來事王皆知之是以無敢欺者南方號曰長頸王國俗有室屋衣服噉粳米其人言語小異扶南有山出金金露生石上無央限也國法刑人並於王前噉其肉國內不受估客有往者亦殺而噉之是以商旅不敢至王常樓居不血食不事鬼神其子孫生死如常人唯王不死

混填納扶南女為妻

南史

扶南國俗本裸文身被髮以女人為王號曰柳葉年少壯健有似男子其南有激國有事鬼神者字混填夢神賜之弓乘賈人舶入海混填晨起即詣廟於神樹下得弓便依夢乘舶入海遂至扶南外邑柳葉人衆見舶至欲劫取之混填即張弓射其舶穿度一面矢及侍者柳葉大懼舉衆降混填填乃教柳葉穿布負頭形不復露遂君其國納柳葉為妻生子分王七邑

扶南沸湯魚獸決獄

南史

扶南國大王蔓乃作大船窮漲海開國十餘闢地五六千里次當伐金鄰國蔓遇疾遣太子金生代行蔓事子旃因蔓蔓自立遣人詐金生而殺之蔓死時有乳下兒名長在人間至年二十乃結中壯士襲殺旃旃大將范尋又攻殺長而代立更繕國內起觀閣遊戲之朝旦中晡三四見客百姓以蕉蔗龜鳥為禮國法無牢獄有訟者先齋三日乃燒斧極赤令訟者捧行七步又以金鏢雞卵投沸湯中令採取之若無實者手即爛有理者則不又於城溝中養鱶魚門外圍猛獸有罪者輒以餒猛獸及鱶魚魚獸不食為無罪三日乃放之鱶大者長三丈餘狀似鼉有四足喙長六七尺兩邊有齒利如刀劍常食魚遇得麋鹿及人亦噉之



突厥絞頸以驗脩短 北史

突厥其俗被髮左衽穹廬氈帳隨逐水草遷徙以畜牧射獵為事食肉飲酪身衣裘褐賤老貴壯寡廉耻無禮義猶古之匈奴其主初立近侍重臣等輿之以氈隨日轉九回每回臣下皆拜拜訖乃扶令乘馬以帛絞其頸使纒不至絕然後釋而急問之曰你能作幾年可汗其主既神情昏亂不能詳定多少臣下等隨其所言以驗脩短之數

匈奴異俗 北史

匈奴宇文莫槐出遼東塞外其先南單于之遠屬也世為東部大人其語與鮮卑頗異人皆翦髮而留其頂上以為首飾長過數寸則截短之婦女被長襦及足而無裳馬收烏頭為毒藥以射禽獸

高車婚媾 北史

高車其俗躡踞繫黠無所忌避婚姻用牛馬納媾以為榮結言既定男黨營車闌馬令女黨恣取上馬祖乘出闌馬主立闌外振手驚馬不墜者即取之墜則更取數滿乃止俗無殺不作酒迎婦之日男女相將持馬酪熟肉節解主人延賓亦無行位穹廬前叢坐飲宴終日復留其宿明日將婦歸既而夫黨還入其家馬群極取良馬父母弟兄雖惜終無言者頗諱取寡婦而優憐之

高車異俗 北史

高車之俗其畜產自有記識雖闌縱在野終無妄取俗不清潔喜致震霆每震則叫呼射天而集之移去來歲秋馬肥復相率候於震所埋殺羊然火拔刀女巫祝說似如中國被除而群隊



馳馬旋繞百匝乃止人持一束柳裊回盤之以乳酪灌馬婦人以皮裹羊骸戴之首上縈屈髮鬢而綴之有似軒冕其死亡葬送掘地作坎坐尸於中張臂引弓佩刀挾梢無異於生而露坎不掩時有震死及疫厲則為之祈福若安全無他則為報賽多殺雜畜燒骨以燎走馬遶旋多者數百匝男女無小大皆集會平吉之人則歌舞作樂死喪之家則悲吟哭泣其遷徙隨水草衣皮食肉牛羊畜產盡與蠕蠕同唯車輪高大輻數至多

烏菴爭訴服藥

北史

烏菴國在賒彌南北人有爭訴服之以藥曲者發狂直言無恙為法不殺犯死罪唯徙於靈山西南有檀特山山上立寺以驢數頭運食山下無人控御自知往來也

女國剥皮埋骨

北史

女國在葱嶺南其國世以為王其俗婦人輕丈夫而性不妬忌男女皆以彩色塗面而一日中或數度變改之人皆被髮貴人死剥皮以金屑和骨肉置瓶中埋之經一年又以其皮肉鐵器埋之俗事阿脩羅神又有樹神歲初以人祭或用獼猴祭畢入山祝之有一鳥如雌雉來集掌上破其腹視之有衆粟則年豐沙石則有災謂之鳥卜

吐火羅兄弟同妻

北史

吐火羅國都葱嶺西五百里其俗奉佛兄弟同妻送寢焉每二人入房戶外挂其衣以為志生子屬其長兄其山穴中有神馬每歲牧馬於穴所必產名駒

曹國故事得悉神

北史

曹國都那密水南數里國中有得悉神自西海以東諸國竝敬



事之其神有金人破羅闕人丈有五尺高下相稱每日以駝五頭馬十疋羊一百口祭之常有數千人食之不盡

穆國祠順天神 北史

穆國都烏澹河之西其俗重淫祠葱嶺山有順天神者儀制極華金銀鏤為屋以銀為地祠者日有千餘人祠前有一魚脊骨有孔中通馬騎出入國王戴金牛頭冠坐金馬座

蠻獠好淫祀 北史

僚者蓋南蠻之別種無氏族之別依樹積木以居其上名曰干闌好相殺害若殺其父走避外求得一狗以謝不復嫌恨若報怨必殺而食之其俗畏鬼神尤尚淫祀所殺之人美鬢髻者乃剥其面皮籠之於竹及燥號之曰鬼鼓舞祀之以求福利至有賣其昆季妻孥盡者乃自賣以供祭焉

赤土國構棚焚屍 北史

赤土國扶南之別種也其俗皆穿耳前髮無跪拜之禮以香油塗身其俗敬佛尤重婆羅門婦人作髻於項後男女通以朝霞朝雲雜色布為衣豪富之室恣意華靡唯金鏤非王賜不得服用每婚嫁擇吉日女家先期五日作樂飲酒父執女手以授婿七日乃配既安即分財別唯少子與父居父母兄弟死則剔髮素服就水上構竹木為棚棚內積薪以屍置上燒香建幡吹蠶擊鼓以送火焚薪遂落於水貴賤皆同唯國王燒訖收灰貯以金瓶藏於廟屋冬夏常溫雨多霽少種植無時特宜稻稔白豆黑麻自餘物產多同於交趾以甘蔗作酒雜以紫瓜根酒色黃赤味亦香美亦以椰漿為酒

噉噉兄弟同妻 北史



噉啞國大月氏之種類也其俗兄弟共一妻夫無兄弟者妻戴一角帽若有兄弟者依其多少之數更加帽焉衣服類加以纓絡頭皆剪髮

于闐不見王髮北史

于闐國其王髮不令人見俗言若見王髮其年必儉云

且末熱風為患北史

且末國西北有流沙數百里夏月有熱風為行旅之患風之所至唯老駝預知之即噴而聚立埋其口鼻於沙中人每以為候亦即將氈擁蔽鼻口其風迅駛斯須過盡若不防者必至危斃

波知池龍北史

波知國在鉢和西南有三池傳云大池有龍王次者有龍婦小者有龍子行人經之設祭乃得過不祭多遇風雪之困

西屠夷以二月為歲首唐書

西屠夷其地冬温多霧雨產虎魄猩猩獸結遼鳥以二月為歲首稻歲再熟取檳榔瀋為酒椰葉為席俗凶悍果戰鬪以麝塗身日再塗再洗拜謁則合爪頓顙有文字喜浮屠道冶金銀像大或十圍呼王為陽蒲逋王妻為陀陽阿熊太子為阿長逋宰相為婆漫地王所居曰占城別居曰齊國曰蓬皮勢王衣白氈古貝斜絡臂飾金珮為纓髮戴金華冠如章甫妻服朝霞古貝短裙冠纓如王王衛兵五千戰乘象藤為鎧竹為弓矢率象千馬四百分前後不設刑有罪者使象踐之或送不勞山界自死

婆賄伽盧製度唐書

婆賄伽盧國土熱衢路植椰子檳榔仰不見日王居以金為甃



厨覆銀瓦爨香木堂飾明珠有一池以金為隄舟楫皆飾金寶  
鏢王姓困沒長名摩羅惹其相曰摩訶那王出與以金繩狀  
遠則乘象嬪史數百人青甕為圓城周百六十里有十二門四  
隅作浮圖民皆居中鉛錫為瓦荔支為材俗惡殺拜以手抱臂  
稽顙為恭明天文喜佛法有百寺琉璃為甍錯以金銀丹彩紫  
鑲塗地覆以錦蜀王居亦如之民七歲祝髮止寺至二十有不  
達其法復為民衣用白氎朝霞以蠶帛傷生不敢衣戴金花冠  
翠冒絡雜珠王宮設金銀二鍾寇至焚香擊之以占吉凶有巨  
白象高百尺訟者焚香跪象前自思是非而退有災疫王亦焚  
香對象器自咎無桎梏有罪者束五竹捶皆重者五輕者三殺  
人則死土宜菽粟稻梁蔗大若脛無麻麥以金銀為錢形如半  
月號登伽佗亦曰足彈陀無膏油以蠟雜香代炷與諸蠻市以

江豬白氎琉璃罌缶相易婦人當頂作高髻飾銀珠琲衣青  
裙披羅段行持扇貴家者傍至五六

吐蕃戴珠五代史

吐蕃男子冠中國帽婦人辨髮戴瑟瑟珠云珠之好者一珠易  
一良馬

于闐好佛五代史

于闐聖天衣冠如中國其殿皆東向日金冊殿有樓曰七鳳樓  
以蒲桃為酒又有紫酒青酒不知其所釀而味尤美其食粳沃  
以蜜粟沃以酪其衣布帛有園圃花木俗喜鬼神而好佛聖天  
居處嘗以紫衣僧五十人列侍

党項人壽五代史

党項西羗之遺種其國在禹貢折支之地東至松州西接葉護



南界春桑北隣吐渾有地三千餘里無城邑而有室屋以毛罽覆之其人喜盜竊而多壽往往至百五六十歲其大姓有細封氏費聽氏折氏野利氏拓拔氏為最強

鞞劫子生而食肉 五代史

鞞劫子其人髦首披布為衣不鞍而騎大弓長箭尤善射遇人輒殺而生食其肉契丹等國皆畏之契丹五騎遇一鞞劫子則皆散走

契丹頑傲 五代史

契丹比佗夷狄尤頑傲父母死以不哭為勇載其尸深山置大木上後三歲往取其骨焚之酌而呪曰夏時向陽食冬時向陰食使我射獵猪鹿多得其風俗與奚靺鞨頗同

鐵甸異俗 五代史

鐵甸其族野居皮帳而人剛勇其地少草木水鹹濁色如血澄之久而後可飲又東女真善射多牛鹿野狗其人無定居行以牛負物遇雨則張葦為屋常作鹿鳴呼鹿而射之食其生肉能釀糜為酒醉則縛之而睡醒而後解不然則殺人

殊方產物 五代史

唐明宗遣使者冊仁裕為順化可汗晉高祖時又冊為奉化可汗阿咄欲不知其為狄銀親疏亦不知其立卒而仁裕訖五代常來朝貢史亦失其紀其地出玉犛牛綠野馬獨峯駝白貂鼠羚羊角兩砂脛肭臍金剛鑽紅鹽罽毼駙駝之革其地宜白麥青麩麥黃麻葱韭胡荽以橐駝耕而種其可汗常樓居妻號天公主其國相號媚祿都督見可汗則去帽被髮而入以為禮婦人總髮為髻高五六寸以紅絹囊之既嫁則加氈帽又有別族



號龍家其俗與回紇小異

姬厥律國出魚鼠五代史

姬厥律其人長大髦頭首長全其髮盛以紫囊地苦寒水出大魚契丹仰食又多黑白黃貂鼠皮北方諸國皆仰足其人最勇隣國不敢侵

胡嶠陳契丹大畧五代史

蕭翰鎮汴州聞遼太宗德光死北歸有同州郃陽縣令胡嶠為翰掌書記隨入契丹而翰妻爭妬告翰謀反翰見殺嶠無所依居虜中七年當周太祖廣順三年亡歸中國略能道其所見云自幽州西北入居庸關明日又西北入石門關關路崖狹一夫可以當百此中國控扼契丹之險也又三日可汗州南望五臺山其峯見高者東臺也又三日新武州西北行五十里有

雞鳥山云唐太宗北伐聞雞鳴于此因以名山明日入永定關此唐故關也又四日至歸化州又二日登天嶺嶺東西連亘有路北下四顧真然黃雲白草不可窮極契丹謂嶠曰此辭鄉嶺也可一南望而為永訣同行者皆慟哭往往絕而復蘇又行三四日至黑榆林時七月寒如深冬又明日入斜谷谷長五十里高崖峻谷仰不見日而寒尤甚已出谷得平地氣稍溫又行二日渡湟水又明日渡黑水又二日至湯城淀地氣最溫契丹苦大寒則就溫于此其冰泉清冷草軟如茸可藉以寢而多異花記其二種一曰旱金大如掌金色燦人一曰青囊如中國金燈而色類藍可愛又行三日遂至上京所謂西樓也西樓有邑屋市肆交易無錢而用布有綾錦諸工作官者翰材伎術教坊角觝秀才僧尼道士等皆中國人而弁汾幽薊之人尤多自上京



東去四十里至真珠寨始食萊明日東行地勢漸高西望平地  
松林鬱然數十里遂入平川多草木始食西瓜云契丹破回紇  
得此種以牛糞覆棚而種大如中國冬瓜而味甘又東行至襄  
潭始有柳而水草豐美有息雞草尤美而本大馬食不過十本  
而飽自襄潭入大山行十餘日而出過一大林長二三里皆蕪  
蕪枝葉有芒刺如箭羽其地皆無草兀欲時卓帳于此

于闐無水常寒 五代史

于闐國鳴沙山云冬夏殷殷有聲如雷云禹貢流沙也又東南  
十里三危山云三苗之所竄也其西渡都鄉河曰陽關沙州西  
曰仲雲族其牙帳居胡盧磧云仲雲者小月支之遺種也其人  
勇而好戰瓜沙之人皆憚之胡盧磧漢明帝時征匈奴屯田於  
吾盧蓋其也地無水而常寒多雪每大暖雪銷乃得水臣鄴

至大屯城仲雲遣宰相四人都督三十七人  
以詔書慰諭之皆東向拜自仲雲界西始  
濕沙人置之曾以止渴又西渡陷河伐樹置  
陷又西至紺州紺州于闐所置也在沙州西  
去京師九千五百里矣又行二日至安軍州

于闐諸沙五代史

晉高祖天福三年冬十二月張匡鄴等自靈州行二歲  
至七年冬乃還而居誨頗記其往復所見山川諸國而  
道聖天世次也居誨記曰自靈州過黃河行三十里始涉  
入党項界曰細腰沙神點沙至三公沙宿月支都督帳自此  
行四百餘里至黑堡沙沙尤廣遂登沙嶺沙嶺党項牙也其  
曰於崖天子渡白亭河至涼州自涼州西行五百里至甘州



甘州回鶻牙也其南山百餘里漢小月支之故地也有別族號  
虛角山沙陀云朱耶氏之遺族也

西夏風土遺史

西夏本魏拓跋氏後其地則赫連國也遠祖思恭唐季受賜姓  
曰李涉五代至宋世有其地至李繼遷始大據夏銀綬宥靜五州  
身境七鎮其東西二十五驛南北十餘驛子德明曉佛書通法  
律嘗觀太一金鑑訣野戰歌製番書十二卷又製字若符篆其  
俗衣白窄衫纏冠冠後垂紅結綬自號嵬名設官分文武其冠  
履金縷貼間起雲銀紙帖緋衣金塗銀帶佩蹀躞解錐短刀弓  
矢穿鞞秃髮耳垂環紫旋襪六襲出入乘馬張青蓋以二旗前  
從者百餘騎民庶衣青綠葦樂之五音為一音裁禮之九拜  
三拜

天竺國俗

天竺國舊名身毒亦曰摩伽陀復曰安羅門俗宗浮圖道不飲  
酒食肉漢武帝遣使十餘輩問出西徠指求身毒為昆明所閉  
莫能通至漢明帝夢金人於是遣使天竺問佛道法由是其教  
傳於中國

南毗國灑地以防颶風

宋史

南毗國在大海之西南由三佛齊風颶月餘可至其國王每巡  
行先期遣兵百餘人持水灑地上以防颶風揚沙塵列鼎百以  
進食日一易之置翰林官供王飲食俗喜戰鬪習刀稍善射  
雜白銀為錢產真珠番布其國寂法番舶罕到時羅巴智力干  
父子其種類也居泉之城南自是船舟多至其國矣

勃泥國昏聘飲椰子酒

宋史



甘州回鶻牙也其南山百餘里漢小月支之故地也有別族號  
虛角山沙陀云朱耶氏之遺族也

西夏風土遼史

西夏本魏拓跋氏後其地則赫連國也遠祖思恭唐季受賜姓  
曰李涉五代至宋世有其地至李繼遷始大據夏銀綬宥靜五州  
身境七鎮其東西二十五驛南北十餘驛子德明曉佛書通法  
律學觀太一金鑑訣野戰歌製番書十二卷又製字若符篆其  
冠白窄衫纏冠冠後垂紅結綬自號嵬名設官分文武其冠  
縷貼間起雲銀紙帖緋衣金塗銀帶佩蹠蹠解錐短刀弓  
矢穿帶秃髮耳垂環紫旋襪六襲出入乘馬張青蓋以二旗前  
從者百餘騎民庶衣青綠華樂之五音為一音裁禮之九拜  
三拜

天竺國俗宋史

天竺國舊名身毒亦曰摩伽陀復曰安羅門俗宗淨圖道不飲  
酒食肉漢武帝遣使十餘輩間出西南指求身毒為昆明所閉  
莫能通至漢明帝夢金人於是遣使天竺問佛道法由是其教  
傳於中國

南毗國灑地以防颶風宋史

南毗國在大海之西南由三佛齊風颶月餘可至其國王毋怒  
行先期遣兵百餘人持水灑地上以防颶風揚沙塵列鼎百以  
進食日一易之置翰林官供王飲食俗喜戰鬪習刀稍善射  
雜白銀為錢產真珠番布其國最遠番船罕到時羅巴智力干  
父子其種類也居泉之城南自是船舟多至其國矣

勃泥國昏聘飲椰子酒宋史



勃泥國在西南大海中去闍婆四十五日程去三佛齊四十日  
程去占城與摩逸各三十日程皆計順風為則其國以版為城  
城中居者萬餘人所統十四州其王所居屋覆以貝多葉民舍  
覆以草在王左右者為大人王坐繩牀若出即大布單坐其上  
衆舁之名曰阮囊戰鬪者則持刀被甲甲以銅鑄狀若大筒穿  
之於身護其腹背其地無麥有稻又有羊及雞魚無蠶絲用  
吉貝花織成布飲椰子酒昏聘之資先以椰子酒檳榔次之指  
環又次之然後以吉貝布或暹山金銀成其禮喪葬亦有棺斂  
以竹為輿載棄山中

三佛齊國俗 宋史

三佛齊國蓋南蠻之別種與占城為隣居真臘闍婆之間所管  
十五州土產紅藤紫礦菱沈木檳榔椰子無繒錢土俗以金銀

貿易諸物四時之氣多熱少寒

無霜雪人用香油塗身

無麥有米及青白豆鷄魚鵝鴨 類中土

真臘國戰象 宋史

真臘國亦名占臘其國在占城之南東際海西接蒲甘南抵加  
羅希其縣鎮風俗同占城地方二千餘里有銅臺列銅塔二十  
有四銅象八以鎮其上象各重四千斤其國有戰象幾二十萬  
馬多而小

丹眉流國以版為屋 宋史

丹眉流國東至占臘五十程南至羅越水路十五程西至西天  
三十五程北至程良六十程東北至羅斛二十五程東南至闍  
婆四十五程西南至程若十五程西北至洛華二十五程東北  
至廣州一百三十五程其俗以版為屋跣足衣布無紳帶以白



紵纏其首貿易以金銀其主所居廣袤五里無城郭出則乘象  
車亦有小駟地出犀象鍤石紫州蘇木諸藥四時炎熱無雪霜  
未嘗至中國

注輦國異產 宋史

注輦國東距海五里西至天竺千五百里南至羅蘭二千五百  
里北至頓田三千里自古不通中國水行至廣州約四十一萬  
一千四百里其國有城七重高七尺南北十二里東西七里每  
城相去百步凡四城用磚二城用土最中城以木為之皆植花  
果雜木其第一至第三皆民居環以小河第四城四侍郎居之  
第五城主之四子居之第六城為佛寺百僧居之第七城即王  
之所居室四百餘區所統有三十一部落地產真珠象牙珊瑚  
頗黎檳榔巨寇吉貝布獸有山羊黃牛禽有山鷄鸚鵡犀角餘

甘藤羅千年棗椰子甘羅崑崙梅娑羅蜜等花有白木利散蘇  
蛇臍佛桑麗秋青黃碧娑羅瑤蓮蟬紫水蕉之類

層檀國俗 宋史

層檀國在南海傍城距海二十里熙寧四年始入貢海道便風  
行百六十日經勿巡古林三佛齊國乃至廣州其王名亞美羅  
亞眉蘭傳國五百年十世矣人語音如犬食地春冬暖貴人以  
越布纏頭服花錦白氎布出入乘象馬有奉祿其法輕罪杖重  
罪死穀有稻粟來食有魚畜有綿羊山羊沙牛水牛橐駝馬犀  
象藥有木香血竭沒藥鵬砂阿魏薰陸產真珠玻璃蜜沙華三  
酒交易用錢官自鑄三分其齊金銅相半而銀居一分禁私  
鑄元豐六年使保順郎將層伽尼再至神宗念其絕遠詔頒賚  
如故事仍加賜白金二千兩



紂纏其首貿易以金銀其主所居廣袤五里無城郭出則乘象  
車亦有小駟地出犀象鍤石蘇木諸藥四時炎熱無雪霜  
未嘗至中國

注輦國異產 宋史

注輦國東距海五里西至天竺千五百里南至羅蘭二千五百  
里北至頓田三千里自古不通中國水行至廣州約四十一萬  
一千四百里其國有城七重高七尺南北十二里東西七里每  
城相去百步凡四城用磚二城用土最中城以木為之皆植花  
果雜木其第一至第三皆民居環以小河第四城四侍郎居之  
第五城主之四子居之第六城為佛寺百僧居之第七城即王  
之所居室四百餘區所統有三十一部落地產真珠象牙珊瑚  
頗黎檳榔巨寇吉貝布獸有山羊黃牛禽有山鷄鸚鵡果有餘  
甘藤羅千年棗椰子甘羅崑崙梅娑羅蜜等花有白末利散蘇  
蛇臍佛桑麗秋青黃碧娑羅瑤蓮蟬紫水蕉之類

層檀國俗宋史

層檀國在南海傍城距海二十里熙寧四年始入貢海道便風  
行百六十日經勿巡古林三佛齊國乃至廣州其王名亞美羅  
亞眉蘭傳國五百年十世矣人語音如犬食地春冬暖貴人以  
越布纏頭服花錦白氎布出入乘象馬有奉祿其法輕罪杖重  
罪死穀有稻粟麥食有魚畜有綿羊山羊沙牛水牛橐駝馬犀  
象藥有木香血竭沒藥鵬砂阿魏薰陸產真珠玻璃蜜沙華三  
酒交易用錢官自鑄三分其齊金銅相半而銀居一分禁民私  
鑄元豐六年使保順郎將層伽尼再至神宗念其絕遠詔頒賚  
如故事仍加賜白金二千兩



銅鼓集衆 宋史

徽宗大觀二年融州蠻其俗鑄銅為大鼓初成懸庭中置酒以召同類爭以金銀為大釵叩鼓去則以釵遺主人相攻擊鳴鼓以集衆號有鼓者為都老衆推服之唐末諸酋分據其地自為刺史

父質與子 宋史

徽宗大觀二年有融州屬蠻大丘洞首領楊光朝請內附又有楊克端等百三人來歸皆納之諸蠻族類不一大抵依阻山谷並林木為居椎髻跣足走險如履平地言語侏離衣服褊爛畏鬼神喜淫祀刻木為契不能相君長以財力雄疆每忿怒則推刃同氣加兵父子間復讎怨不顧死出入腰弓矢匿草中射人得牛酒則畢然矣親戚比隣指授相賣父子別業父貧則賣

於子去禽獸無幾

稻粟再熟 宋史

西南諸夷漢牂牁郡地武帝元鼎六年定西南夷置牂牁郡唐置費珍莊琰播郎牂牁等州其地北距充州百五十里東距辰州二千四百里南距交州一千五百里西距昆明九百里無城郭散居村落土熟多霖雨稻粟皆再熟無徭役將戰征乃屯聚刻木為契其法劫盜者償其主三倍殺人者出牛馬三十頭與其家以贖死疾病無醫藥但擊銅鼓銅沙鑼以祀神

交趾地理風土 宋史

交趾本漢初南越之地漢武平南越分其地為儋耳珠崖南海蒼梧鬱林合浦交趾九真日南凡九郡置交趾刺史以領之後漢置交州晉宋齊梁陳因之又為交趾郡隋平陳廢郡置州場



帝初廢州置郡唐武德中改交州總管府太宗端拱元年加黎桓檢校太尉進邑千戶實封五百戶遣戶部郎中魏庠虞部員外郎直史館李度往使焉太宗淳化元年夏加黎桓特進邑千戶實封肆伯戶遣左正言直史館宋鎬右正言直史館王世則又使焉明年六月歸闕上令條列山川形勢及黎桓事迹以聞鎬等具奏曰去歲秋末抵交州境桓遣牙內都指揮使丁承正等以舩九艘卒三百人至太平軍來迎由海口入大海冒涉風濤頗歷危險經半月至白藤徑入海汊乘潮而行凡宿泊之所皆有茅舍三間營葺尚新目為館驛至長州漸近本國桓張皇虛誕務為誇詫盡出舟師戰懼謂之軍自是宵征抵海岸至交州僅十五里有茅亭五間題曰茅徑驛至城一百里縣部民畜產妄稱官牛數不滿千揚言十萬又廣率其民混於軍旅以雜

色之衣乘船鼓噪近城之山虛張白旗以為陳兵之象俄而擁從桓至展郊迎之禮桓歛馬側身問皇帝起居畢按轡偕行時以檳榔相遺馬上食之此風俗待賓之厚意也城中無居民止有茅竹屋數十百區以為軍營而府署湫隘題其門曰明德門桓質陋而目眇自言近歲與蠻寇接戰墜馬傷足受詔不拜信宿之後乃張筵飲宴又出臨海汊以為娛賓之遊桓跣足持竿入水標魚每中一魚左右皆叫譟歡躍凡有宴會預坐之人悉令解帶冠以帽子桓多衣花纈及紅色之衣帽以真珠為飾或自歌勸酒莫能曉其詞嘗令數十人扛大蛇長數丈饋於使館且曰若能食此當治之為饌以獻焉

流求國風土宋史

流求國在泉州之東有海島曰澎湖煙火相望其國塹柵三重



環以流水植棘為藩以刀稍弓矢劍鼓為兵器時月盈虧以紀時無他奇貨商賈不通厥土沃壤無賦歛有戶則均稅旁有毗舍邪國語言不通袒裸時雖殆非人類

榴花成酒 宋史

黎洞唐故瓊管之地在大海南距雷州泛海一日而至其地有黎毋山黎人居焉舊說五嶺之南人雜夷獠朱崖環海豪富兼并役屬貧弱婦人服總縷績木皮為布陶土為釜器用甌駝人飲石汗又有椒酒以安石榴花著甕中即成酒俗呼山嶺為黎居其間者號曰黎人

### 土產

夷狄之國所產物者

漢使取實來獻史記

宛左右多以蒲陶為酒富人藏酒至萬餘石久者數十歲不敗俗嗜酒馬嗜苜蓿漢使取其實來於是天子始種苜蓿蒲陶肥饒地及天馬多外國使來衆則離宮別觀旁盡種蒲陶苜蓿

哀牢出蘭干細布 後漢

哀牢夷明帝時置哀牢博南二縣哀牢人皆穿鼻僂耳其渠帥自謂王者耳皆下肩三寸庶人則至肩而已土地沃美宜五穀蠶桑知染采文繡罽毼帛疊蘭干細布織成文章如綾錦有梧桐木華績以為布幅廣五尺潔白不受垢汙先以覆亡人然後服之其竹節相去一丈名曰濮竹出銅鐵鉛錫金銀光珠虎魄水精瑠璃軻蟲蚌珠孔雀翡翠犀象猩猩貊獸

斯調國火布 魏書

斯調國有火州在南海中其上有野火春夏自生秋冬自死有



木生於其中而不消也枝皮更活秋冬火死則皆枯瘁其俗常冬采其皮以為布色小青黑若塵垢滂之便投火中則更鮮明也

崑崙墟火布魏書

崑崙之墟有炎火之山山上有鳥獸草木皆生於炎火之中故有火浣布非此山草木之皮集則其鳥獸之毛也

南荒火鼠魏書

南荒之外有火山長三十里廣五十里其中皆生不燼之木晝夜火燒得暴風不猛猛雨不滅火中有鼠重百斤毛長二尺餘細如絲可以作布常居火中色洞赤時時出外而色白以水逐而沃之即死績其毛織以為布

大宛汗血馬晉書

大宛西去洛陽萬三千三百二十里南至六月氏北接康居大小七十餘城土宜稻麥有蒲酒多善馬馬汗血其人皆深目多鬚其俗娶婦先以金同心指以為娉又以三婢試之不男者絕婚姦淫有子皆卑其母與人而乘不調墜死者馬主出斂具善賈爭分銖之利得中國金銀輒為器物不用為幣也太康六年武帝遣使揚顯拜其王藍廋為大宛王藍廋卒其子摩之立遣使貢汗血馬

大秦以金銀為錢晉書

大秦國一名犁鞬在西海之西其地東西南北各數千里有城邑其城周迴百餘里屋宇皆以珊瑚為椽椽琉璃為牆辟水精為柱礎其王有五官其官相云各十里每旦於一宮聽事終而復始若國有災異輒更立賢人放其舊王被放者亦不敢怨有



官曹簿領而文字習胡亦有白蓋小車旌旗之屬及郵驛制置一如中州其人長大貌類中國人而胡服其土多出金玉寶物明珠大具有夜光壁駭雞犀及火浣布又能刺金縷繡及織錦縷罽以金銀為錢銀錢十當金錢之一安息天竺人與之交市於海中其利百倍鄰國使到者輒廩以金錢

林邑出產金貝南史

林邑國本漢日南郡象林縣古越蒙界也後漢伏波將軍馬援開南境置此縣其國有金山石皆赤色其中生金金夜則出飛狀如螢火又出瑇瑁貝齒古貝沈木香古貝者樹名也其華成時如鵝毳抽其緒紡之以作布布與紵布不殊亦染成五色織為班布沈木香者土人所斷積以歲年朽爛而心節獨存置水中則沈故名曰沈香次淳者檳香

扶南國出產金寶南史

扶南國日南郡之南海西大灣中去日南可七千里在林邑西南三千餘里城去海五百里有大江廣十里從西流東入海其國廣輪三千餘里土地洿下而平博氣候風俗大較與林邑同出金銀銅錫沈木香象犀孔雀五色鸚鵡其南界三千餘里有頓遜國在海崎上地方千里城去海十里有五王並羈屬扶南頓遜之東界通交州諸賈人其西界接天竺安息徼外諸國往還交易其市東西交會日有萬餘人珍物寶貨無不有又有酒樹似安石榴采其花汁停瓮中數日成酒

倭國異產南史

倭國其先所出及所在事詳北史其官有伊支馬次曰彌馬羅支次曰奴往鞮人種禾稻紵麻蠶桑織績有薑桂橘椒蘇出黑



雄真珠青玉有獸如牛名山鼠又有大地吞此獸地皮堅不可  
斫其上有孔乍開乍閉時或有光射中而蛇則死矣

扶桑以皮作錦 南史

扶桑國者齊永元元年其國有沙門慧深來至荊州說云扶桑  
在大漢國東二萬餘里地在中國之東其土多扶桑木故以為  
名扶桑葉似桐初生如笋國人食之實如梨而赤績其皮為布  
以為衣亦以為錦作板屋無城郭有文字以扶桑皮為紙

扶南火樹皮堪紡績 南史

扶南國東界即大漲海海中 有大洲洲上有諸薄國國東有馬  
五洲復東行漲海十餘里至自然大洲其上有樹生火中洲左  
近人剥取其皮紡績作布以為手巾與蕉麻無異而色微青  
若小垢澇則投火中復更精潔或作燈炷用之不知盡

高昌白疊子 南史

高昌國蓋車師之故地南接河南東近敦煌西次龜茲北隣敦  
勤其地高燥築土為城架木為屋土覆其上寒暑與益州相似  
備植九穀人多噉麵及牛羊肉出良馬蒲桃酒石鹽多草木有  
草實如薊薊中絲如細纒名曰白疊子國人取織以為布布甚  
軟白交市用焉

大秦神龜白馬 北史

大秦國一名黎軒多瑇瑁琅玕神龜白馬朱鬣明珠夜光璧西  
海水之西有河河西南流河西有南北山山西有赤水西有白  
玉山山西有西王母山玉為堂室

龜茲流膏 北史

龜茲國在尉犁西北白山之南一百七十里其國西北大山中



有如膏者流出成川行數里入地狀如餅餠甚臭服之髮齒已落者能令更生痛人服之皆愈

高昌赤白鹽北史

高昌者車師前王之故地也氣候溫暖厥土良沃穀麥一歲再熟宜蠶多五果人饒漆有草名羊刺其上生蜜而味甚佳引水溉田出赤鹽其味甚美復有白鹽其形如玉高昌人取以為枕貢之中國多蒲桃酒俗事天神兼信佛法國中羊馬牧在隱僻處以避寇非貴人不知其處

大食產龍馬唐書

大食本波斯地歲獻貴人蒲陶大者如雞卵有千里馬傳為龍種

拂菻出奇寶唐書

拂菻古大秦也其土多金銀夜光璧明月珠大貝車磔礪磁水難乳翠虎魄織水羊毛為布曰海西布海中有珊瑚洲海人乘大舶墮鐵網水底珊瑚初生磐石上白如菌一歲而黃三歲赤枝格交錯高三四尺鐵發其根繫網舶上絞而出之失時不取即腐

扶南出剛金唐書

扶南在日南之南七十里地卑窪與環王同俗有城郭宮室王姓古龍居重觀柵城桔葉以覆屋王出乘象其人黑身鬚髮保行俗不為寇盜田一歲種三歲穫國出剛金狀類紫石英生水底石上人沒水取之可以刻玉扣以殺角

吐火羅有神馬唐書

吐火羅或曰土豁羅元魏謂吐呼羅者少女多男北有頗黎山



其陽穴中有神馬國人游牧牝于側生駒輒汗血其王號葉護

地大洲產火珠唐書

環王東南至地大洲多馬亦號馬禮衣長數千里多火珠大者如雞卵圓白照數尺日中以艾藉珠輒火出產瑤瑁文螺石珉初取柔可治既鑊刻即堅有舍利鳥通人言俗黑身朱髮而奉鷹爪獸牙穿耳傳璫以古貝橫一幅繚于腰古貝草也緝其祀為布粗曰貝精曰鬘

吐蕃宜馬五代史

吐蕃國當唐之盛時河西隴右三十三州涼州最大土沃物繁而人富樂其地宜馬唐置八監牧馬三十萬匹

西夏土產遼史

西夏土產大麥華豆青裸床子古子蔓鹹地蓬實菘菹苗小燕

美席雞草子地黃葉登麻草沙葱野韭拒反蔣白蒿鹹地松實

閩婆國俗宋史

閩婆國在南海中其國東至海一月汎海半月至崑崙國西至海四十五日南至海三日汎海五日至大食國北至海四日西至汎海十五日至勃泥國又十五日至三佛齊國又七日至古邏國又七日至柴曆亭抵交趾遠廣州其地平坦宜種植產稻麻粟豆無麥民輸十一之租煮海為鹽多魚鱉雞鴨山羊無椎牛以食果實有木瓜椰子蕉子甘蔗芋出金銀犀牙箋沉檀香苗香胡椒檳榔硫黃紅花蘇木方務蠶織有薄綃絲絞吉貝布剪銀葉為錢博易

拂菻國俗宋史

拂菻國東南至滅力沙北至海皆四十程西至海三十程東自



西大食及于闐回紇青唐乃抵中國歷代未嘗朝貢元豐四年十月其王威力伊靈改撒始遣六首領修斯都令斯孟判來獻鞍馬刀劍真珠言其國地甚寒土屋無瓦產金銀珠西錦牛羊馬獨峰馳梨杏千年棗巴欖粟麥以蒲萄釀酒樂有箜篌壺琴小箏篋偏鼓

占城物產 宋史

占城國在中國之西南東至海西至雲南南至真臘國北至驪州界汎海南去三佛齊五日程陸行至賓佗羅國一月程其國隸占城焉土地所出箋沉香檳榔烏楠木蘇木白藤黃蠟吉貝花布絲絞布白氈布藤篋貝多葉篋金銀鐵錠等物五穀無麥有秔米粟豆麻子官給種一斛計租百斛果實有蓮甘蔗蕉椰子椰子鳥獸多孔雀犀牛畜產多黃牛水牛而無驢亦有山牛不

任耕耨但殺以祭鬼

自恃

倚恃本國之強者

宛國不肯予馬 史記

漢武帝時使者多言宛有善馬上仕貳師城匿不肯與漢使天子既好宛馬聞之甘心使壯士車令等持千金及金馬以請宛王二師城善馬宛國饒漢物相與謀曰漢去我遠而鹽水中數敗出其北有故寇出其南乏水草又且徃徃而絕邑乏食者多漢使數百人為輦來而常乏食死者過半是安能致大軍乎無柰我何且貳師馬宛寶馬也遂不肯予

詭詐

夷狄有詭譎虛詐者



阿保機智殺諸部五代史

契丹阿保機亦不知其何部人也為人多智勇而善騎射是時劉守光暴雷幽涿之人多亡入契丹阿保機乘間入塞以陷城邑俘其人民依唐州縣置城以居之漢人教阿保機曰中國之王無代立者由是阿保機益以威制諸部而不肯代其立九年諸部以其久不代共責謂之阿保機不得已傳其旗鼓而謂諸部曰吾立九年所得漢人多矣吾欲自為一部以治漢城可乎諸部許之漢城在炭山東南樂河上有鹽鐵之利乃後魏滑鹽縣也其地可植五穀阿保機率漢人耕種為治城郭邑屋廛市如幽州制度漢人安之不復思歸阿保機知衆可用用其妻述律策使人告諸部大人曰我有鹽池諸部所食然諸部知食鹽之利而不知鹽有主人可乎當禾稿我諸部以為然共以牛酒

會鹽池阿保機伏兵其旁酒酣伏發盡殺諸部大人遂立不復

代

兀欲執趙延壽五代史

兀欲東丹王子也兀欲妻趙延壽以為妹五月朔旦兀欲召延壽及張礪李崧馮道等置酒酒數行兀欲謂延壽曰妹自上國來當一見之延壽欣然與兀欲俱入食頃兀欲出坐笑謂礪等曰燕王延壽謀反鎖之矣諸君可無慮也又曰先帝耶律德先在汴州與我筭子一莖許我知南朝軍國事昨聞寢疾無遺命燕王安得自擅耶礪等罷去兀欲召延壽廷立而詰之延壽不能對乃遣人監之而籍其家貲

借擅

夷狄借妄而擅為者



社論強大 北史

社論與姚興和親魏道武遣材官將軍和突襲黠弗素古延諸部社論遣騎救素古延突逆擊破社論遠遁漠北侵高車深入其地遂并諸部凶勢益振北徙弱洛水始立軍法千人為軍軍置將一人百人為幢幢置帥一人先登者賜以虜獲退懦者以石擊首殺之或臨時捶撻無文記將帥以羊屎粗計兵數後頗知刻木為記其西北有匈奴餘種國尤富疆部帥曰拔也稽舉兵擊社論逆戰於頰根河大破之後盡為社論所并號為疆盛隨水草畜牧其西則烏著之地東則朝鮮之地北則渡沙漠窮瀚海南則臨大磧其常所會庭敦煌張掖之北小國皆苦其寇抄羈縻附之於是自號豆代可汗豆代猶魏言駕馭開張也可汗猶魏言皇帝也懦懦之俗君及大臣因其行能即為稱號若

中國之盛既死之後不復追稱

耶律德光以晉王為子五代史

遼太宗耶律德光時唐遣趙德均延壽救敬遠而德鈞父子按兵圍柏谷不救德光謂石敬瑭曰吾三千里赴義義當徹頭乃集壇晉城南立敬瑭為皇帝自解衣冠被之冊曰咨爾子晉王子視爾猶子爾視予猶父已而楊光遠殺敬遠降晉晉高祖自太原入洛陽德光送至潞州趙德鈞延壽出降德光謂晉高祖曰大事已成吾命大相溫從爾渡河吾亦留此俟爾入洛而後北臨訣執手虛歛脫白貂裘以衣高祖遺以良馬二十匹戰馬千二百匹戒曰子子孫孫無相忘

高麗自立 宋史

高麗本曰高句麗高麗九州屬冀州之地周為箕子之國漢之



玄菟郡也在遼東蓋扶餘之別種以平壤城為國邑漢魏以來常通職貢亦屢為邊寇隋煬帝再舉兵唐太宗親駕伐之皆不克高宗命李勣征之遂拔其城分其地為郡縣唐末中原多事遂自立君長

### 暴雷

夷狄有之強暴而殘雷者

突欲吮血五代史

元欲東丹王突欲子也突欲奔于唐元欲留不從號永康王契丹好飲人血突欲左右姬妾多刺其臂吮之其小過輒挑目封灼不勝其毒

麻谷酷雷五代史

麻谷者契丹之德光之從弟也德光滅後晉以為邢州節度使

元欲立命守鎮州麻谷元酷雷多略中國人剥面抉目拔髮斲腕而殺之出入常以鉗鑿挑割之具自隨寢處前後掛人肝脛手足言笑自若鎮定之人不勝其毒

### 篡逆

夷狄之篡主自立者

林邑奴文自立晉書

林邑國主范逸死奴文篡位文曰南西卷縣夷帥范雅奴也嘗牧牛澗中獲二鯉魚化成鐵用以為刀刀成乃對大石嶂而呪之曰鯉魚變化治成雙刀石嶂破者是有神靈進斫之石即瓦解文知其神乃懷之隨商估往來見上國制度至林邑遂教逸作宮室城邑及器械逸甚愛信之使為將文乃譖逸諸子或徙或奔及逸死無嗣文遂自立為王以逸妻妾悉置之高樓從已



者納之不從者絕其食於是乃攻大歧界小歧界式僕徐狼屈  
都乾魯扶單等諸國并之有衆四五萬人

## 惡逆

夷狄弑逆者

蓋蘇文弑君 唐書

高麗蓋蘇文者或號蓋金姓泉氏自云生水中以惑衆性忍暴  
父為東部大人大對盧死蓋蘇文當嗣國人惡之不得立頓首  
謝衆請攝職有不可雖廢無悔衆哀之遂嗣位殘凶不道諸大  
臣與其君建武議誅之蓋蘇文覺悉召諸部給云大閱兵列饌  
具請大臣臨視實至盡殺之凡百餘人馳入宮殺建武殘其尸  
投諸溝更立建武弟之子藏為王自為莫離支專國猶唐兵部  
尚書中書令職云

兀欲幽囚祖母 五代史

兀欲為人雋偉亦工畫能飲酒好禮士耶律德光嘗賜以絹數  
千匹兀欲散之一日而盡兀欲已立先遣人報其祖母述律述  
律怒曰我兒平晉取天下有大功業其子在我側者當立人皇  
王背我歸中國其子豈得立邪乃率兵逆兀欲將廢之兀欲留  
其將麻荅守鎮州晉諸將相隨德光在鎮州者皆留之而去以  
翰林學士徐台符李瀚從行與其祖母述律相距于石橋述律  
所將兵多亡歸兀欲兀欲乃幽述律於祖州祖州阿保機墓所  
也

## 窮夷

窮極邊夷之遠者

契丹欲窮所見 五代史



契丹嘗選百里馬二十匹遣十人賞乾餼北行窮其所見其人自黑車子歷牛蹄國以北行一年經四十三城居人多以木皮為屋其語言無譯者不知其國地山川部族名號其地氣遇平地則溫和山林則寒冽至三十三城得一人能鐵甸語其言頗可解云地名頡利烏于耶堰云自此以北龍蛇猛獸魑魅羣行不可往矣

### 邊害

夷狄寇邊為患害者

遼東西部落寇邊魏書

漢末遼西烏丸大人丘力居衆五千餘落上谷烏丸大人難樓衆九千餘落各稱王而遼東屬國烏丸大人蘇僕延衆千餘落自稱峭王右北平烏丸大人烏延衆八百餘落自稱汗魯王皆

有計勇健中山太守張純叛入丘力居衆中自號彌天安定王為二郡烏丸元帥寇略青徐幽並四州殺略吏民靈帝末以劉虞為幽州牧募胡軻純首北州乃定後丘力居死子樓班年八從子蹋頓有武略代立總攝三二部衆皆從其教令袁紹與公孫瓚連戰不決蹋頓遣使詣袁紹求和親助紹擊瓚破之紹矯制賜蹋頓難數瑄王汗魯王印綬皆以為單于

### 論學中國立法北史

魏道武謂尚書崔宏曰蠕蠕之人其米號為頑器每來抄掠駕犂牛奔遁驅犂牛隨之犂牛伏不能前異部人有教其以犂牛易之者蠕蠕曰其母尚不能行而況其子終於不易遂為敵所虜今社論學中國立法置戰陣卒成邊害道家言聖人生大盜起信矣



羅鬼邊報宋史

羅氏鬼國理宗寶祐四年遣報思播言大元兵屯大理國取道西南將大入邊詔以銀萬兩使思播結約羅鬼為援

羅氏鬼國外志卷之六





